

ЯРАТЫЛЫВ





Яратылынан гъакъындагъы хабар

1 ¹Инг башлап Аллагъ кёкню ва ерни яратгъан. ²Ер бош ва гёлемсиз болгъан, терен сувланы уьстюон къарангылыкъ къуршагъан болгъан. Аллагъны Ругъу сувланы уьстюонде къалкып айлангъан. ³Аллагъ: «Ярыкъ болсун», – деген. Ярыкъ да болгъан. ⁴Аллагъ ярыкъ яхши экенни гёрюп, ону къарангылыкъдан айыргъан. ⁵Ярыкъга Аллагъ «гюндюз» деп, къарагъылыкъга буса «гече» деп ат къойгъан. Ахшам болгъан, эртен болгъан – бу биринчи гион болгъан.

⁶Аллагъ: «Сувланы ортасы булан оланы эки бёлекен гюmez болсун», – деген. Шолай болма да болгъан. ⁷Гюmezни яратып, Аллагъ ону тюбюндеги сувланы ону уьстюндеги сувлардан айыргъан. ⁸Гюmezге «кёк» деп ат къойгъан. Ахшам болгъан, эртен болгъан – бу экинчи гион болгъан.

⁹Аллагъ: «Кёкню тюбюндеги сувлар биригип, къуру гёрюнсion», – деген. Шолай болма да болгъан. ¹⁰Аллагъ къуругъя «топуракъ» деп, бириккен сувлагъя буса «денгизлер» деп ат къойгъан. Аллагъ бу затлар яхши экенни гёрген. ¹¹Аллагъ: «Топуракъдан урлукъ береген отлар, гъарисини оъзюно журасына гёре урлугъу булангъы емиш береген тюрлю тереклер оъссion», – деген. Шолай болма да болгъан. ¹²Топуракъдан урлукъ береген тюрлю отлар, гъарисини оъзюно журасына гёре урлугъу булангъы

емиш береген тюрлю тереклер оысген. Аллагы бу затлар яхшы экенни гёр-ген. ¹³ Ахшам болгъан, эртен болгъан – бу учюнчю гон болгъан.

¹⁴ Аллагы: «Кёкню гюмезинде гечени гюндюзден айырмакъ учун ярыкъ береген затлар болсун. Олар болжалланы гёрсетсисин, гюnlени ва йылланы оылчесин. ¹⁵ Олар кёкню гюмезинден ярыкъ берип, ер юзюн ярыкълан-дырысын», – деген. Шолай болма да болгъан. ¹⁶ Аллагы кёкде ярыкъ бере-ген эки затны яратгъан: гюндюзлеге гъакимлик этмек учун уллусун, гече-леке гъакимлик этмек учун гиччисин ва юлдузланы яратгъан. ¹⁷⁻¹⁸ Аллагы оланы ер юзюне ярыкъ берсін учун, гюндюзлеге, гечелеге гъакимлик эт-син учун ва къарантылыкъыны ярыкъдан айырмакъ учун кёкню гюмезинде ерлешдирген. Аллагы бу затлар яхшы экенни гёрген. ¹⁹ Ахшам болгъан, эртен болгъан – бу дёртюнчю гон болгъан.

²⁰ Аллагы: «Сувлар кёп жанлардан толсун. Оырде – кёкню гюмезинде күвшлар учсун», – деген. ²¹ Аллагы зор уллу денгиз аждагъаланы, сувда ту-рагъан жан-жаныварны, гъар тюрлю күвшланы яратгъан. Аллагы бу затлар яхшы экенни гёрген. ²² Аллагы оланы: «Артыгызы, кёп болугъуз, денгизни сувларын толтуругъуз. Ерде де күвшлар кёп болсун», – деп шабагъатла-гъан. ²³ Ахшам болгъан, эртен болгъан – бу бешинчи гон болгъан.

²⁴ Аллагы: «Топуракъда тюрлю жанлар: гъайван-мал, ерде юрюп айланагъан жанлар ва кыыр жанланы тюрлю журалары түвсун», – деген. Шолай болма да болгъан. ²⁵ Аллагы кыыр жанланы, гъайван-малны ва ерде юрюп айланагъан гъар-бир жанны тюрлю жураларын яратгъан. Аллагы бу затлар яхшы экенни гёрген.

²⁶ Аллагы булай деген: «Бизин келпетибизге, Оызюбюзге ошатып адам-ны яратайыкъ. О денгиздеги балыкълагъа да, кёкдеги күшлагъа да, гъай-ван-малгъа да, бютюн ер юзюндеги кыыр жанлагъа да, ерде юрюп айланагъан гъар-бир жанлагъа да гъакимлик этсисин».

²⁷ Аллагы адамны Оызюню, Аллагыны келпетине ошатып яратгъан. О эргишини ва къатынгишини яратгъан.

²⁸ Аллагы оланы шабагъаттай туруп, булай деген: «Кёп яшлар тапды-рыгъызы, артып йиберигиз, ер юзюн толтуругъуз, ону елегиз. Денгизлер-

деги балыкълагъа, кёкдеги күшлагъа, ерде юрюп айланагъан гъар-бир жангъа гъакимлик этигиз.²⁹ Мен сизге ер юзюндеги урлугъу булангъы бары да отланы, емиш береген тереклени беремен.³⁰ Ичинде жаны бар бары да затгъа буса: жанлагъа, күшлагъа, ерде юрюп айланагъан гъар-бир жангъа Мен ашамагъа деп яшыл оьсюмлюклени беремен». Шолай болма да болгъан.³¹ Аллагъ Оъзю яратгъан затлагъа къарап, олар бек яхши экенин гөрген. Ахшам болгъан, эртен болгъан – бу алтынчы гюн болгъан.

2¹ Шолай кёкню, ерни, шолардагъы бары да затны бир низамгъа гелти-² рип яратылыву тамамлангъан. ² Еттинчи гюнге Аллагъ яратыв ишле-³ рин тамамлагъан. Яратыв ишлерин тамамлап, О еттинчи гюн парахат тур-⁴ гъан. ³ Аллагъ еттинчи гюнню шабагъатлап, ону сыйлы этген. Неге тюгюл де, О яратыв ишлерин тамамлап, шо гюн парахат тургъан. ⁴ Муна кёкню ва ерни, олар яратылгъан заманны гъактындағы хабар.

Адам ва Гъава Эдемни бавунда

Раббибиз Аллагъ кёкню ва ерни яратгъанда,⁵ дюньяда не уылкю, не от болмагъан. Раббибиз Аллагъ дюньягъа янгур йиберип битмеген болгъан, топуракъны ишлетме адамлар да болмагъан.⁶ Ерден чыгъагъан сув бютюн топуракъны сугъара болгъан.⁷ Раббибиз Аллагъ ердеги хумдан адамны яратгъан, ону бурнуна яшав береген тынышны уьфюрген, адам* жанлы зат болуп къалгъан.

⁸ Раббибиз Аллагъ Эдемде, гюнчыгышда бав къуруп, онда Оъзю яратгъан адамны ерлештирген.⁹ Раббибиз Аллагъ бавда гөзге арив гөрюнеген, тизив емишлери булангъы кёп тюрлю тереклер оьсдюрген, бавну ортасында буса яшав береген терекни ва яхшыны-яманы гъактында билим береген терекни оьсдюрген.

* ^{2:7} Ягъуди тилдеги «адам» деген сёзню айтылышы шо тилдеги «топуракъ» деген сёзню айтылышына ошашлы геле.

¹⁰ Эдемни ичинден бавну сугъарагъан оyzен агъа болгъан, сонг о дёрт бутакъга бёлюне болгъан. ¹¹ Оланы бирисини аты Пишон, о Гъабила элинден таба айланып-айланып агъа. Гъабилада алтын бар. ¹² (Шо элде тизив алтын, атир ийисли чайыр ва багъалы шогъам ташлар бар.) ¹³ Экинчи оyzенни аты Гигъон, о Куш элинден таба агъа. ¹⁴ Учюнчю оyzен – Тигър, о Ашшурну гүңчыгъыш янындан агъа. Дёртюнчю оyzен – Фират.

¹⁵ Эдемдеги бавгъа къуллукъ ва къаравул этсин деп, адамны онда ерлешдире. ¹⁶⁻¹⁷ Раббибиз Аллагъ оғъар бурай деп бувара: «Яхшыны-яманны гъакында билим береген терекден къайры сагъа шу бавдагы къайсы төрекни емишин де ашамагъа ярай. Ону емишин ашап къойма! Эгер де ашасанг, шо гүн ойлюп къалажакъсан».

¹⁸ Раббибиз Аллагъ: «Адамгъа янгыз турма яхши тюгюл, Мен оғъар оyzоне къыйышывлу ёлдаш яратайым», – дей. ¹⁹ Раббибиз Аллагъ Ойзу топуракъдан яратгъан бары да жанланы ва къушланы яратып, олагъа нечичик атлар къояр экен деп, оланы адамны янына гелтире. Жанлар адамдан шолай оyzлеге атлар ала. ²⁰ Адам бары да гъайван-малгъа, къушлагъа, жан-жанываргъа атлар къоя, тек оланы арасында оyzоне къыйышывлу ёлдаш тапмай. ²¹ Шо заман Раббибиз Аллагъ адамны къатты юхугъа батдыра, ону бир къабургъасын чыгъарып алып, шо ерге гён къаплай. ²² Къабургъадан къатынгишини яратып, Раббибиз Аллагъ ону адамны янына гелтире. ²³ Адам бурай дей:

– Бу мени сюегимден алынгъан сюек, этимден алынгъан эт.

Муну аты къатынгиши* болур, неге тюгюл эргишиден алынгъан.

²⁴ Шогъар гёре, адам ата-анасыны уюнден чыгъып, къатыны булан бирлешежек, экевиу де туташ бир къаркъара болуп къалажакъ. ²⁵ Эргиши де, къатынгиши де – экевиу де ялангъач болса да, уялмай болгъанлар.

* ^{2:23} Ягъуди тилдеги «къатынгиши» деген сёзню айттылышы шо тилдеги «эргиши» деген сёзню айттылышына ошашлы геле.

Биринчи гюнағы

3 ¹Раббибиз Аллагъ яратгъан жанланы арасындан йылан инг де гыллачысы болған. О къатынгишиге:

— Сизге Аллагъ шу бавдагъы бир емишден де ашама къоймайгъаны тюзмю? — деп сорай.

²Къатынгиши:

— Бизге емишлерден ашама ярай. ³Тек Аллагъ шу бавну ортасындағы терекни емишлерinden ашамагызы, тийип де къарамагызы, ёғьесе оълемжеккисиз деди, — дей.

⁴Йылан къатынгишиге:

— Ойлажексиз. ⁵Аллагъ, сиз шо терекни емишлерinden ашагъанда, гёзлеригиз ачылып, Оъзю йимик яхшыны ямандан айырып билеген болуп къалажагызызыны биле, — дей.

⁶Къатынгиши шо терекни емишлери ашама яхшы экенни, гёзге арив гёрюнегенни гёре ва терекни емиши оъзюн гъакъыллы эте деген зат ону айрокъда бек иштагъландыра. О емишни уъзюп алыш ашай. Къатынгиши булан ону эри де болгъан. Емишден о эрине де бере, о да ашай. ⁷Оланы гёзлери ачылгъандай болуп къала. Оъзлени ялангъач экенин гёрюп, олар инжир терекни япыракъларындан байламлар этип, беллерине байлай.

⁸Олар ахшам салкында Раббибиз Аллагъ бавда юрюйгенни эшитип, тереклени артына яшына. ⁹Раббибиз Аллагъ Адамны:

— Сен къайдасан? — деп чакъыра.

¹⁰— Сени бавдан гелегенингни эшитдим. Оъзюм ялангъач экенимден къоркъуп яшынды, — дей о.

¹¹— Ким айтды сагъа сен ялангъач экенингни? Мен сагъа ашама деген терекни емишлерин ашадынгмы? — деп сорай Раббибиз Аллагъ.

¹²— Сен магъа деп берген къатынгиши берди магъа шо емишлени, мен де ашадым, — дей Адам.

¹³— Неге этдинг шону? — деп сорай Раббибиз Аллагъ къатынгишиге.

— Йылан алдатды мени, мен де ашадым, — дей о.

¹⁴ Йылангъя Раббибиз Аллагъ булай дей:

— Налат болсун сагъя да, этген ишинге де. Бары къыр жанланы ва гъайван-малны арасында, налатланып, къурсагъынгдан сюйкелип юрюп туражакъсан. Сав оымрюонг хум ашап туражакъсан. ¹⁵ Сени де, къатынгишини де ва сени наслуларынгны да, къатынгишини наслуларын да бир-биригизге душман этежекмен. Оланы наслулары сени башынгны янчып туражакъ, сен бусанг оланы табанындан тигип туражакъсан.

¹⁶ Къатынгишиге Раббибиз Аллагъ:

— Сени яшгъя токътагъан вакътингдеги азап чегивионгню артдыражакъман; яшларынгны азап чеге туруп табажакъсан. Эринге гъасирет къалып туражакъсан, о буса сагъя гъакимлик этип туражакъ, — дей.

¹⁷ Адамгъя буса Раббибиз Аллагъ булай дей:

— Къатынгишиге тынглап, Мен сагъя ашама деген емишни ашап токътадынг! Гъали сен саялы топуракъ налатланды. Рызкы болдурмакъ учун сен сав оымрюонг авур загъмат тёгюп туражакъсан. ¹⁸ О сагъя тегенеклер, чёп отлар оьсдюрежек. Сен авлакъ оьсюмлюклени ашап туражакъсан. ¹⁹ Тап сен оьзюнден алынгъан топуракъга гирип къалгъанча, авур загъмат тёгюп туражакъсан, рызкынгны да тер тёге туруп табажакъсан. Сен хумсан, къайтып хумгъя айланып да къала-жакъсан.

²⁰ Адам къатынына Гъава* деп къоя, неге тюгюл о яшайгъан бары да адамланы баш анасы болуп токътай. ²¹ Сакътияндан опуракъ этип, Раббибиз Аллагъ Адамны ва ону къатынын гийиндире.

²² Раббибиз Аллагъ:

— Гъали яхшыны-яманны билеген болуп, адам Бизин бирибиз йимик болуп къалды. Гъали энни яшав береген терекни емишин де ашап, бир де ойлмейген болуп къалмагъай эди! — дей. ²³ Озю алынгъан топу-

* ^{3:20} Гъава — бу атны ягъуди тилдеги «яшав» деген маънасы болма имканлы.

ракъга къуллукъ этсин деп, Раббибиз Аллагы Адамны Эдемдеги бавдан къувалай.²⁴ Адамны къувалай, Эдемдеги бавну алдында буса, гюнчыгъыш ягъында, яшав береген терекге багъып элтеген ёлну сакъламакъ учун, макътавлу малайиклени* ва дёгерек айланып турған ялынлы къылышы сала.

Къабил ва Гъабил

4 ¹Адам къатыны Гъавагъа ювукълукъ эте. О яшгъа авур болуп, Къабил** деген уланын таба.

— Раббимни кёмеги булан мен инсан тапдым! — дей о. ²Сонг о Къабилни ииниси Гъабилни таба. Гъабил къойлар сакълай болгъан, Къабил буса топуракъга къуллукъ эте болгъан. ³Раббибизге къурбан этмек учун, бир гюн Къабил топуракъ берген емишлеринден гелтире. ⁴Гъабил буса сиривюно башлапгы къозуларыны ичмайын гелтире. Раббибиз Гъабилни савгъатына рази къала, ⁵Къабилни савгъатына буса рази къалмай. Къабил ачувлана, ону бети бузула. ⁶Раббибиз Къабилге бурай дей:

— Неге ачувландынг? Неге бузулду бетинг? ⁷Яхшылыкъ эте бусанг, сени къабул этермен, этмей бусанг, эшик алда гюнагъ яшынып тура. О сатыя гъасирет къалып тура, тек сен ону енгме герексен.

⁸Къабил ииниси Гъабилге:

— Авлакъга чыгъайыкъ, — дей*** . Олар авлакъга чыгъя. Шонда Къабил Гъабилни уystюне чабып йиберип, ону оылтуре.

⁹Сонг Раббибиз Къабилге:

— Ининг Гъабил къайда? — деп сорай.

— Билмеймен, иниме къаравулчуманмы мен? — деп жавап бере Къабил.

* ^{3:24} *Макътавлу малайик* — мунда ягъуди тилдеги «гъерубим» деген сёз къолланған. Шо сёз малайиклени къанатлы гыйванланы келпетиндеги тайпасын англата.

** ^{4:1} *Къабил* — бу атны айтылышы ягъуди тилдеги «алмакъ» яда «етмек» деген сёзлени айтылышына ошашли геле.

*** ^{4:8} Бир-бир къольязывларда «авлакъга чыгъайыкъ» деген сёзлер ёлукъмай.

¹⁰ Раббибиз булагай дей:

— Сен не этип къойдунг? Инингни къаны Магъя топуракъдан таба ялбара. ¹¹ Налат болсун сагъя! Инингни къаны тёгюлген топуракъ сени гери уражакъ. ¹² Сен нечакъы къуллукъ этсенг де, топуракъ сагъя рызкъы бермежек. Энниден сонг сен къуваланып, ер юзүнде уйсюз-эшиксиз юрюп айланы къалажакъсан.

¹³ — Бу авур жаза, мен ону гётерип болмажакъман. ¹⁴ Сен мени топурагъымдан къувалайсан, мен Сенден яшынарман. Къувалангъанман, уйсюз-эшиксизмен, магъя къарышылашгъан гъар ким мени оылтюрюп къояжакъ, — дей Къабил.

¹⁵ Тек Раббибиз:

— Къабилни ким оылтюрсе, шондан етти къабат артыкъ оыч алынажакъ, — дей. Къарышылашгъанлар ону оылтюрюп къоймасын деп, Раббибиз Къабилге бир айры белги сала. ¹⁶ Раббибизни гёз алдындан тайып, Къабил Эдемден гюнчыгъышда ерлешген Нод элде ерлеше.

Къабилни наслусу

¹⁷ Къабил къатынына ювукълукъ эте. О яшгъя авур болуп, Гъаногъ деген улан таба. Къабил шо вакътиде шагъар къура болгъан, шо ша-гъаргъя Гъаногъ деп уланыны атын къоя. ¹⁸ Гъаногъгъя Ират деген улан тува, Иратгъя — Мекиел, Мекиелге — Метушел, Метушелге буса Ламегь тува.

¹⁹ Ламегь эки къатын ала, бирини аты — Ада, бирисиники — Цилла.

²⁰ Ада Явал деген улан таба. Явалдан чатырларда да яшай туруп тувар сакълайгъан халкъ амалгъя геле. ²¹ Ону иниси Ювалдан къомуз ва зурнай согъагъанланы барысы да амалгъя геле. ²² Цилладан Тубал-Къабил деген улан тува. О багъыр ва темир токъялайгъан темир уста бола. Тубал-Къабилни Наама деген къызыардаши бола.

²³ Ламегь оызюно къатынларына булагай дей:

— Ада, Цилла, тынглагызы магъя! Тынглагызы, къатынларым, мен айтагъянгъя!

Эгер де эргиши мени яраласа, мен де ону оылтюроп къояжакъман.

Эгер де уланъяш магъя урса, мен де ону оылтюроп
къояжакъман.

²⁴ Эгер де Къабил учун етти керен овч ала буса, Ламегъ учун
етмиш етти керен алар.

Сет ва Энош

²⁵ Адам къатынына дагъы да ювукълукъ эте, о да улан таба. Яшгъя Сет деп къоя, неге тюгюл, Гъава оъзю айтагъан кюиде, Къабил оылтюрген Гъабилни орнуна Аллагъ оъзюне башгъа урлукъ салгъан болгъан. ²⁶ Сетни Энош деген уланы болгъан. Шо замандан тутуп инсанлар Раббибизни атын тутуп, Огъар сужда этме башлайлар.

Сетни наслусу

5 ¹Муна Адамны ва ону наслуларыны тайпа-тухуму. Аллагъ инсанны яратгъанда, ону Оъзюне ошатып ярата. ² О эргишини ва къатынгишини яратып, оланы шабагъаттай. Яратгъанда, олагъа инсан деп ат къоя.

³ Адамгъя юз отуз йыл болагъанда, ондан ону келпетине, огъар ошайгъан улан тува. Адам огъар Сет деп къоя. ⁴ Сет тувгъан сонг, Адам сегиз юз йыл яшай. Ондан дагъы да уланлар ва къызлар тува. ⁵ Адам тогъуз юз отуз йыл яшап гечине.

⁶ Оъзюне юз беш йыл болагъанда, Сетге Энош деген уланы тува. ⁷ Энош тувгъан сонг, Сет сегиз юз етти йыл яшай. Ондан дагъы да уланлар ва къызлар тува. ⁸ Сет тогъуз юз он эки йыл яшап гечине.

⁹ Эношгъя тогъуз юз йыл болагъанда, ондан Кенан деген улан тува. ¹⁰ Кенан тувгъан сонг, Энош сегиз юз он беш йыл яшай. Ондан дагъы да уланлар ва къызлар тува. ¹¹ Энош тогъуз юз беш йыл яшап гечине.

¹² Кенангъя етмиш йыл болагъанда, ондан Магъалал деген улан тува.

¹³ Магъалал тувгъан сонг, Кенан сегиз юз къыркъ йыл яшай. Ондан дагъы да уланлар ва къызлар тува. ¹⁴ Кенан тогъуз юз он йыл яшап гечине.

¹⁵ Магъалалгъа алтыш беш йыл болагъанда, ондан Гьерет деген улан тува.
¹⁶ Гьерет тувгъан сонг, Магъалал сегиз юз отуз йыл яшай. Ондан дагы да уланлар ва кызылар тува. ¹⁷ Магъалал сегиз юз токъсан беш йыл яшап гечине.

¹⁸ Гьереттеге юз алтыш эки йыл болагъанда, ондан Гъаногъ деген улан тува. ¹⁹ Гъаногъ тувгъан сонг, Гьерет сегиз юз йыл яшай. Ондан дагы да уланлар ва кызылар тува. ²⁰ Гьерет тогъуз юз алтыш эки йыл яшап гечине.

²¹ Гъаногъгъа алтыш беш йыл болагъанда, ондан Матушалагъ деген улан тува. ²² Матушалагъ тувгъан сонг, Гъаногъ учь юз йыл яшай. Ону яшаву Аллагъ булан бола. Ону дагы да уланлары ва кызылары бола. ²³ Гъаногъ учь юз алтыш беш йыл яшай. ²⁴ Ону яшаву Аллагъ булан бола. Гъаногъ гечинген сонг, Аллагъ ону Озынню янына ала.

²⁵ Матушалагъгъа юз сексен етти йыл болагъанда, ондан Ламегъ деген улан тува. ²⁶ Ламегъ тувгъан сонг, Матушалагъ етти юз сексен эки йыл яшай. Ондан дагы да уланлар ва кызылар тува. ²⁷ Матушалагъ тогъуз юз алтыш тогъуз йыл яшап гечине.

²⁸ Ламегъге юз сексен йыл болагъанда, ондан улан тува. ²⁹ Ламегъ оғъар Нугъ* деп къюоп:

— Раббибиз налатлагъан топуракъда о бизге ишибизде, загъматыбызда юрекге маслагъат болуп туражакъ, — дей. ³⁰ Нугъ тувгъан сонг, Ламегъ беш юз токъсан беш йыл яшай. Ондан дагы да уланлар ва кызылар тува. ³¹ Ламегъ етти юз етмиш етти йыл яшап гечине.

³² Нугъгъа беш юз йыл болагъанда, ондан Сим, Гъам ва Яфет деген уланлар тува.

Нугъ

❶ ¹Дюньяда инсанлар бирден-бир артып тербей, олардан кызылар тува.
² Шо заман инсанланы кызыларыны аривлюгюн гёрюп, Аллагъны уланлары оъзлер ушатгъанларын къатын этип алалар. ³ Раббибиз:

* 5:²⁹ *Нугъ* — бу атны айтылыши ягъуди тилдеги «гёнгюн алмакъ» деген сёзлени айтылышина ошашлы геле.

— Мени тынышым инсанда гъаман болуп турмажакъ. О къаркъарадан къайры бир зат да тюгюл, ону яшавуну мезгили юз йигирма йыл болсун, — дей.

⁴ Шо заманларда (шондан сонг да йимик) дюньяда девлер – бырынгы деворлерден берли белгили игитлер – яшай болгъан, неге тюгюл Аллагъны уланлары инсанланы къызларына ювукълукъ эте болгъан, олар да яшлар таба болгъан.

⁵ Раббибиз дюньяда инсанлардан чыгъағъан яманлықъ кёп экенни гёре, неге тюгюл оланы бары ойлары яманлықъга бакъгъан болгъан. ⁶ О дюньяда инсанны яратгъанына гъёкюне, Ону юрегине къайгъы тюше ва:

⁷ — Мен яратгъан инсанланы барын да ер юзүндөн ёкъ этежекмен, олар булан бирче гъайванланы, ерде юрюп айланагъан жанланы ва къушланы ёкъ этермен, неге тюгюл Мен оланы яратгъаныма гъёкюнгемен, — дей. ⁸ Амма Раббибиз Нугъы рази болгъан.

⁹ Муна Нугъыну ва ону наслусуну гъакъындагы хабар. Шо замангъы инсанланы арасындан янгыз Нугъ мұммин ва айыпсыз болгъан. о Аллагъны ёлунда юрой болгъан. ¹⁰ Нугъын Сим, Гъам ва Яфет деген уыч уланы болгъан.

¹¹ Дюнья Аллагъны алдында пасат ёлгъа тюшме баштай, о яманлықълардан тола. ¹² Аллагъ дюнья пасат ёлгъа тюшме башлагъанны гёре, неге тюгюл инсанланы барысы да пасатлықъны ёлунда юрой болгъан. ¹³ Аллагъ Нугъы бурай дей:

— Дюньяда яшайгъанланы мен ёкъ этежекмен, неге тюгюл дюнья олары яманлықъларындан толгъан. Мен оланы ва олар булан бирче сав дюньяны ёкъ этежекмен. ¹⁴ Тек сен кипарис ағаачдан геме этип, ону ичинде бёлмелер эт, тыш ва ич яғындан буса сылама сюорт. ¹⁵ Ону узуну юз отуз беш, генги йигирма эки, бийиклиги буса он уыч къари болсун. ¹⁶ Гемени уыст янында бир къари оылчевдеги терезе, къабургъасында буса эшик эт. Гемеде биринчи, экинчи, уьчюнчю къабатлар болсун. ¹⁷ Мен дюньяны сувгъа батдырып, ичинде яшавну тынышы бар бары затны ёкъ этежекмен. Дюньяда яшайгъанланы бары да оылжек. ¹⁸ Тек сени булан

Мен разилемшив бегетермен. Сен уланларынг, къатынынг ва уланларынгны къатынлары булан гемеге гирерсен.¹⁹ Сени булан бары жанлардан, жут этип, эркегин де, тишисин де аларсан, шолар сени булан сав къалсын.²⁰ Күшланы гъар жынсындан, гъар гъайвандан ва ерде юроп айланагъан гъар жандан жутларын ал, олар да сав къалсын.²¹ Гъазирлик гёрюп, олагъа да, оъзюнге де гъар тюрлю азыкъдан да ал.

²² Нугъ Аллагъ буюргъан затланы барын да кюте.

Сув алыв

7 ¹Раббибиз Нутыгъа булагъай дей:

— Агълюнгню де алып, гемеге гир. Неге тюгюл, гъали яшап турагъанлана арасында Мени алдымда биргине-бир сен мұмын экенингни гёрюп турман.² Гъалал этилген бары да жанлардан, еттишер жут этип, эрекклерин ва тишилерин ал, гъарам этилген бары да жанлардан да, экишер жут этип, эрекклерин ва тишилерин,³ кёкдеги күшланы бары да жынсындан да, еттишер жут этип, эрекклерин ва тишилерин оъзюнг булан ал. Дюньяда шоланы журалары да сакълансын.⁴ Етти гюндөн сонг Мен дюньягъя янгур явдуражакъман — о кыркъ гече, кыркъ гюн яважакъ. Мен яратгъан бары затны ер юзюндөн ёкъ этежекмен.

⁵Нугъ Раббибиз буюргъан затны барын да кюте. ⁶Нутыгъа алты юз йыл болагъанда, дюньяны сув алма баштай. ⁷Нугъ уланлары, къатыны, уланларыны къатынлары булан, сувдан яшынып, гемеде сыйына.⁸ Гъалал ва гъарам этилген гъайванланы жынсларындан, күшлардан ва ерде юроп айланагъан жанлардан⁹ гемеге ону янына, Аллагъ буюргъан күйде, эркеги де, тишиси де жут-жут болуп гирелер.¹⁰ Етти гюндөн сонг дюньяны сув алма баштай.

¹¹Нутыну оымрюнью алты юзюнчю йылында, йылны экинчи айында, айны он еттинчи гюнүнде терен сувланы алды йырыла, кёк тешилгендей,¹² кыркъ гече, кыркъ гюн дюньягъя янгур явуп турға.¹³ Шо гюн Нугъ уланлары Сим, Гъам, Яфет, къатыны, уланларыны къатынлары булан гемеге мине.¹⁴Олар булан гъар кыр жанны, гъар гъайван-малны, ерде юроп айланагъан гъар жанны ва гъар къушнұ жынслары гирелер.¹⁵ Гемеге

Нугыну янына ичинде жаны бар бары да затдан да экишер жут гирелер.¹⁶ Раббибиз Нугъга буюргъан күйде, гъар жынсдан эркеги де, тишиси де гирелер. Раббибиз Нугыну арты булан гемени эшигин яба.

¹⁷ Сув алыв къыркъ гюн узатылып тура. Сув кёп болгъан сайын геме гётерилип тура ва о юзме башлай. ¹⁸ Сув кёп болуп, дюньяны батдырып тура, геме буса юзюп тура. ¹⁹ Сув буса, кёклени тюбюндеги инг бийик тавланы башларын япъянча, бирден-бир гётерилип тура. ²⁰ Сув тавлардан етти метрге оырге гётериле ва олар сувну тюбюнде гёрюнмейген болуп къала. ²¹ Шо заман ер юзюнде яшайгъан бары да зат: къушлар, гыйванлар, къыр жанлар, ерде юрюп айланагъан жанлар, бары да инсанлар – къырыла. ²² Къурудагъы тыныш алып яшайгъан бары да зат къырыла. ²³ Дюньядагъы бары да зат: инсанлар, гыйванлар, ерде юрюп айланагъан жанлар, кёддеги къушлар – бары да ер юзюнден ёкъ бола. Биргина-бир Нугъ да, ону булан бирче гемеде болгъанлар да сав къалалар. ²⁴ Ер юзюн сув алыв юз элли гюн узатылып тура.

Сув алывну ахыры

8 ¹ Аллагъ Нугыну, ону булан бирче гемеде болгъан уй ва къыр жанлана эсге ала. Аллагъ ер юзюнде ел чыгъара ва сувлар аз болма башлай.

² Терен сувланы алды бегиле, кёк ябыла, янгурну явагъаны токътай. ³ Астаракъ ер юзюнден сув тайма башлай. Юз элли бешинчи гюн сув кемиме башлай. ⁴ Еттинчи айны он еттинчи гюнүнде геме Аарат тавланы устыюнде токътай. ⁵ Йылны онунчу айы етишгенче, сув астаракъ артгъя тартылып тура. Онунчу айны биринчи гюнүнде тавланы башлары гёрюне.

⁶ Къыркъ гюн оьте. Оъзю этген терезени ачып, ⁷ Нугъ къыргъа къаргъаны учура. Ер юзю къуругъунча, къаргъа бир учуп гетип, бир де къайтып гелип тура. ⁸ Арты булан Нугъ сув алыв битгенми экен деп, гёгюрчонню йибере. ⁹ Тек гёгюрчон къонма ер тапмай, къайтып геле, неге тюгюл ер юзю сувну тюбюнде къалып тура болгъан. Къолун узатып, Нугъ гёгюрчонню гемеге ала. ¹⁰ Етти гюндөн сонг Нугъ гёгюрчонню янгыдан учуруп йибере. ¹¹ О ахшам авзунда зайдун терекни янгы болгъан япырагъы да булан

къайтып геле. Шо заман Нугъ сув алыв токътагъаны англай.¹² Дагы да етти гюн токътап, о гёгюрчонню янгыдан учура, о буса дагы къайтып гелмей.

¹³ Нугъну оымрюоню алты юз биринчи йылында, биринчи айны биринчи гюнүндө сув кемий. Нугъ гемени ача ва ер юзүндөн сув тайгъаннын гөре.¹⁴ Экинчи айны йигирма еттинчи гюнүндө ер юзю къуруй.

¹⁵ Шо заман Аллагы Нугъга булай дей:

¹⁶ – Къатынынгны, уланларынгны ва уланларынгны къатынларын да алыш, гемеден чыкъ.¹⁷ Бары жанланы да: къушланы, гъайванланы, ерде юрюп айланагъан жанланы чыгъар. Олар ер юзүн толтуруп къойсун, олар яйылып артып тербесин.

¹⁸ Нугъ да уланлары, къатыны, уланларыны къатынлары булан гемеден чыгъалар.¹⁹ Ону арты булан ер юзүндө яшайгъан бары гъайванланы, ерде юрюп айланагъан бары жанланы, бары къушланы гъар жынсы чыгъалар.

Аллагыны Нугъга этген вадасы ва ону булан бегетген разилемшивю

²⁰ Сонг Нугъ Раббиизге къурбанлыкъны салагъан ер къура, гъалал этилген жанланы ва къушланы гъар жынсындан яллатып къурбан эте.

²¹ Къурбанлыкълардан гелеген арив ийислени сезе туруп, Раббииз Оъз-оъзюне булай дей:

– Энниден сонг инсанлар себеп болуп, Мен топуракъны налатламажакъман. Тап жагыл чагындан тутуп оланы ойлары яманлыкъга бакъгъан буса да, Мен дагы бары жанлы затны ёкъ этмежекмен.²² Дюнья бар чакыры ча-чыв ва орув, сувукъ ва яллав, яз ва къыш, гюн ва гече болуп туражакъ.

9 ¹ Аллагы Нугъну ва ону уланларын булай деп шабагъаттай:

– Кёп яшлар тапдырыгъыз, артып йиберигиз, ер юзүн толтуругъуз.

² Ер юзүндеги бары да жанлар, кёкдеги бары да къушлар, ерде юрюп айланагъан бары да жанлар, денгизлердеги бары да балыкълар сизден къоркъсун ва титиресин. Олар сизин къолугъузгъа берилди.³ Алда яшыл оъсюмлюклени бергеним йимик, Мен сизге ашамакъ учун бары да жанлы

затны беремен. ⁴Тек ичинде къаны булангы этни ашамагызы, неге тюгюл де къан яшавдур. ⁵Сизин къаныгызы, демек къыйылгъан жаныгызы учун, Мен къан тёкгенни – о жан буса да, оyzге инсанны жанын къыйгъан инсан буса да – жавапъа тартажакъман. ⁶Биревню къанын тёкген инсанны башгъасы ону оъзюню де къанын тёксюн, неге тюгюл Аллагы инсанны Оъзюню келпетине ошатып яратды. ⁷Яшлар тапдырыгызы ва артып йиберигиз чи, ер юзюн толтуруп, шонда ерлешигиз!

⁸Аллагы Нугъя ва ону уланларына булай дей:

⁹⁻¹⁰ – Мен сизин ва сизин наслуларапыгызы булан ва бары да гемеден чыкъгъан жанлы зат булан: күшлар, гъайван-мал ва къыр жанлар булан – ер юзюндеги бары да жанлар булан разилешив бегетемен. ¹¹Мени сизин булангызы разилешивиом будур: энниден сонг сув алыв булан бары да жанлы затны кырмажакъман, дагъы дюньяны сув алыв булан дагъытмажакъман.

¹² Аллагы дагъы да булай дей:

– Муна Мен сизин булан ва бары да жанлы зат булан бегетген даймлик разилешивиомню белгиси: ¹³Мен булатлагъа жаямны, демек энемжаяны илдим. О Мени де, дюньяда яшайгъанланы да арасындагы даймлик разилешивию белгисидир. ¹⁴ Ер юзюню уьстюне Мен булатлар жыйгъанда, булатларда энемжая гёрюнежек. ¹⁵ Шо заман Мен сизин булан ва буютон жанлы зат булангызы разилешивиомню эсге алажакъман. Дагъы буютон жанлы затны сув алыв булан дагъытмажакъман. ¹⁶ Булатларда энемжаяны гёргенде, Мен дюньяда яшайгъанланы барысы да булан бегетген даймлик разилешивиомню эсге алажакъман.

¹⁷ Аллагы Нугъя:

– Шо зат дюньяда яшайгъанланы барысы да булан Мен бегетген разилешивию белгисидир, – дей.

Нугъын уланлары

¹⁸ Нугъын гемеден чыкъгъан уланлары булардыр: Сим, Гъам ва Яфет. (Гъам – Гъананны атасы). ¹⁹ Олар уьчев болгъан, олардан ер юзюндеги бары да халкълар баш ала.

²⁰ Нугъ топуракъгъа къуллукъ эте болгъан. О биринчилей болуп юзюм орнатгъан инсан. ²¹ Чагъыр ичиp эсириp, Нугъ ялангъач күйде чатырыны ичинде ятгъан болгъан. ²² Гъам (Гъананы атасы) ону ялангъачлыгъын гё-рюп, чыгъып ағыаларына о гъакъда айта. ²³ Шо заман Сим де, Яфет де ин-башларына абаларын да салып, артларын да берип, атасыны чатырына гирелер ва аба булан атасыны ялангъачлыгъын яба. Оъзлер буса башла-рын бир якъгъа бургъан болгъан, шо саялы да атасыны ялангъачлыгъын гёрмейлер. ²⁴ Айыгъып уянгъан Нугъ гиччи уланы этген затны англап, ²⁵ булай дей:

— Налат болсун Гъанангъя!

О ағыаларыны къара къулу болуп къалажакъ!

²⁶ Дагъы да булай дей:

— Симни Аллагы болгъан Раббибизге макътав болсун!

Гъанан буса Симни къулу болуп къалсын.

²⁷ Аллагъ Яфетни* топуракъларын генглешдирсин!

Яфетни наслулары Симни наслулары яшайгъан ерге гелип,
олар булан бирче орунлашып къалсын!

Гъанан буса Яфетни къулу болуп къалсын.

²⁸ Нугъ сув алывдан сонг да дагъы да уьч юз элли йыл яшай. ²⁹ О тогъуз юз элли йыл яшап гечине.

Нугъну уланларыны наслулары

10 ¹ Муна Нугъну уланлары Симни, Гъамны ва Яфетни гъакъындагъы ва оланы наслуларыны гъакъындагъы хабар. Сув алывдан сонг Симден, Гъамдан ва Яфетден яшлар тува.

² Яфетни уланлары: Гъомер, Магъогъ, Мадай, Яван, Тубал, Мешегъ ва Тирас. ³ Гъомерни уланлары: Ашкеназ, Рипат ва Тогъарма. ⁴ Яванны улан-

* ^{9:27} Яфет – бу атны айтылыши ягъуди тилдеги «генглешдирмек» деген сёзню айттылышина ошашлы геле.

лары: Элиша, Тариш, Киттим ва Доданим.⁵ Яванны наслулаты денгизни боюндағы топуракъларда ерлешелер. Булар къавумларына, тиллерине, топуракъларына, халқъларына гёре Симни наслулаты.

⁶ Гъамны уланлары: Күш, Мисрайим, Пут ва Гъанан. ⁷ Күшнү уланлары: Сева, Гъабила, Савта, Рагъама, Савтегъя. Рагъаманы уланлары: Шева ва Дедан. ⁸ Күшнү Намруд деген уланы болгъан. О ер юзүнде биринчи батыр ⁹ ва Раббибизни алдындағы гючлю гъавчу болгъан. (Шо саялы «Раббибизни алдындағы уллу гъавчу Намруд йимик» деген айтыв да бар). ¹⁰ Бир башлап ону пачалығына Бабил, Эретъ, Аккад ва Гъалне деген шагъарлар гире болгъан. Булар бары да Шинар элиндеги шагъарлар болгъан. ¹¹ Шо элден Ассириягъа гетип, о шонда Ниневия, Регъоботир, Ка-лагъ ¹² ва шолай да Ниневияны да, аслу шагъар гысапланагъан Ка-лагъны арасындағы Ресен шагъарлары къура.

¹³ Мисрайимден лут, анам, легъав, наптуг ¹⁴ патрус, каслугъ ва каптор тухумлар амалгъа геле. Капторлардан филистим тухумлар чыгъя.

¹⁵ Гъанандан Сайдан (бу ону биринчи уланы), Гъет, ¹⁶ ва шолай да гъевус, амор, гиргаш, ¹⁷ хив, арк, син, ¹⁸ арвад, цемар, гъамат тухумлар амалгъа геле. Гече таба гъанан къавумлары чачылып ерлешелер. ¹⁹ Оланы топуракълары Сайдандан башлап Герар ва Газа шагъарлагъа ерли узатыла, мундан буса Содом, Гъомора, Адым ва Севоим шагъарлагъа багъып Лаша шагъаргъа ерли узатыла. ²⁰ Булар къавумларына, тиллерине, топуракъларына, халқъларына гёре Гъамны наслулаты.

²¹ Симники де яшлары бола. О бары да эвер халқъларыны ата-бабасы, Яфетни ағьасы. ²² Симни уланлары: Элам, Ашшур, Арпагышат, Лут ва Арам. ²³ Арамны уланлары: Уц, Гъул, Гетер ва Маш. ²⁴ Арпагышатны Шелагъ деген уланы, Шелагъны буса Эвер деген уланы бола. ²⁵ Эверден эки улан тува. Оланы бирине Пелегъ* деп къоя, неге тюгюл ону заманында дюньяны халқълары гъариси гъар якъыя чачыла. Экинчиси

* 10:25 *Пелегъ* – бу атны айтылышы яғуди тилдеги «айырмакъ», «бёлмек» деген сөзлени айтылышына ошашлы геле.

Йокътан бола. ²⁶ Ону Алмадад, Шелеп, Гыцармавет, Ярагъ, ²⁷ Гъадарам, Узал, Дикла, ²⁸ Авал, Авимаел, Шева, ²⁹ Апир, Гъабила ва Явав деген уланлары бола. Булар бары да Йокътанны уланлары. ³⁰ Олар Мешени ва гюнтувшдагы тавланы арасындағы топуракъда яшайлар. Меше буса Сепар улыкеге тийип тура. ³¹ Булар къавумларына, тиллерине, топуракъларына, халқъларына гёре Симни наслулаты.

³² Бу Нугын уланларыны ағылуперини оызлени халқъларына гёре тайпа-тухумудур. Дюнъядагы бары да халқълар сув алывдан сонг олардан амалгъа геле.

Бабилдеги бийик бина

11 ¹Шо заманларда биютон дюнъяда ортакъ бир тил ва бир сёйлев болған. ² Инсанлар гюнтувшдан таба гелип, Шинар элдеги бир тозлюкге етишелер ва шонда ерлешелер. ³ Олар бир-бирине:

— Балчықдан керпич гесип, ону отда къыздырып къатдырайыкъ, — дейлер. Шолай олар ташны орнуна керпични, киречни орнуна сылама къоллама башлайлар. ⁴ Инсанлар:

— Бийиклиги кёклеге етердей бинасы булангъы шагъар да къуруп, атыбызын белгили этейик, ёғьесе гъарибиз гъар якъынча чачылып къалажакъбыз, — дейлер.

⁵ Раббибиз инсанлар къурған шагъаргъя ва бинағын къарамакъ учун ерте тюше. ⁶ Раббибиз булай дей:

— Булар бир халқъ, барысыны да тили бир. Бу чу оланы ишлерини янгыз аввалы! Булар чы не затгъя урунса да, артына чыгып болар! ⁷ Оларны ягына тюшүп, бир-бирин англап болмасын учун, оланы тилин булгыйыкъ чы!

⁸ Раббибиз оланы гъарисин гъар якъынча чачып ийбере, адамлар да оызлеши шагъарын къурагъынын токътата. ⁹ (Шо саялы шо шагъаргъа Бабил* деп

* ^{11:9} *Бабил* — бу атны айтылыши ягъуди тилдеги «айырмакъ», деген сёзню айтылышина ошашлы геле.

айтыла, неге тюгюл Раббибиз онда ер юзүнде яшайгъанланы барысыны да тилин булгъай ва гъарисин дюньяны гъар ягына чачып йибере).

Симни наслулаты

¹⁰ Муна Симни ва ону наслулатыны гъакындағы хабар. Сув алыв битип, эки йылдан сонг, Симге юз йыл болагъанда, ондан Арпагышат деген улан тува. ¹¹ Арпагышат тувгъан сонг, Сим беш юз йыл яшай; ону дагыы да уланлары ва кызылары бола.

¹² Арпагышаттагы отуз беш йыл болагъанда, ондан Шелагъ деген улан тува. ¹³ Шелагъ тувгъан сонг, Арпагышат дөрт юз уыч йыл яшай; ону дагыы да уланлары ва кызылары бола.

¹⁴ Шелагъга отуз йыл болагъанда, ондан Эвер деген улан тува. ¹⁵ Эвер тувгъан сонг, Шелагъ дөрт юз уыч йыл яшай; ону дагыы да уланлары ва кызылары бола.

¹⁶ Эверге отуз дөрт йыл болагъанда, ондан Пелегъ деген улан тува.

¹⁷ Пелегъ тувгъан сонг, Эвер дөрт юз отуз йыл яшай; ону дагыы да уланлары ва кызылары бола.

¹⁸ Пелегъге отуз йыл болагъанда, ондан Рав деген улан тува. ¹⁹ Рав тувгъан сонг, Пелегъ эки юз тогъуз йыл яшай; ону дагыы да уланлары ва кызылары бола.

²⁰ Равғыа отуз эки йыл болагъанда, ондан Серугъ деген улан тува. ²¹ Серугъ тувгъан сонг, Рав эки юз етти йыл яшай; ону дагыы да уланлары ва кызылары бола.

²² Серугъга отуз йыл болагъанда, ондан Нагъор деген улан тува. ²³ Нагъор тувгъан сонг, Серугъ эки юз йыл яшай; ону дагыы да уланлары ва кызылары бола.

²⁴ Нагъорғыа йигирма тогъуз йыл болагъанда, ондан Терагъ деген улан тува. ²⁵ Терагъ тувгъан сонг, Нагъор юз он тогъуз йыл яшай; ону дагыы да уланлары ва кызылары бола.

²⁶ Терагъга етмиш йыл болагъанда, оғъар Ибраим, Нагъор, Аран деп уланлар тува.

Терагъны наслулаты

²⁷ Муна Терагъны ва ону наслулатыны гъакындағы хабар. Терагъдан Ибраим, Нагъор ва Аран деген уланлар тува. Аранны Лут деген уланы бола. ²⁸ Аран буса атасы Терагъны савунда, оғыз ватанында, Гъалдей элиндеги Ур деген шагъарда гечине. ²⁹ Ибраим ва Нагъор уйленелер: Ибраимге къатын болуп Сарай, Нагъоргъа буса Аранны кызы Милка геле. (Аран – Милканы ва Исканы атасы). ³⁰ Сарайдан яш болмай болгъан, шо саялы ону авлетлери болмай.

³¹ Терагъ Гъалдейдеги Ур шагъарындан чыгъып, уланы Ибраим, уланыны уланы Лут (Аранны уланы) ва гелини Сарай (Ибраимни къатыны) булан Гъанан топурагъына чыгъып гете. Олар Гъарран деген шагъаргъа етишип, онда ерлешелер. ³² Терагъ шонда эки юз беш йыллыкъ чагында гечине.

Аллагъ Ибраимни танглай

12 ¹ Аллагъ Ибраимге буладай дей:
— Оыз уылкенгни, къардашларынгны ва атангдан къалгъан ожакъны къой. Мен сагъа гөрсеген уылкеге багъып бар. ² Мен сенден бир уллу халкъ болдуражакъман ва сени шабагъатлажакъман. Мен сени атынгны белгили этежекмен, сенден таба башгъялар да шабагъатланажакъ! ³ Сени шабагъатлагъанны Мен де шабагъатлажакъман! Сени налатлагъанны Мен де налатлажакъман! Дюньяны бары да халкъларына сенден таба шабагъат болажакъ!

⁴ Раббибиз оызюне буюргъан күйде, Ибраим ёлгъа тюше; Ибраим булан Лут да бара. Гъаррандан чыкъгъанда, Ибраимте етмиш беш йыл бола болгъан. ⁵ Оызю булан о къатыны Сарайны, ағъасыны уланы Лутну, бары жыйгъан мал-матагъын ва Гъарранда уюнде болгъанланы барын да алып, олар булан бирче Гъанангъа ёл чыгъа.

Олар Гъанангъа етише. ⁶ Ибраим Шегемни ювугъундагы Море деген уллу эмен терекни ягына геле. Шо заманларда бу топуракъда гъананлылар яшай болгъан. ⁷ Шо заман Раббибиз Ибраимге гөрүнүп:

— Мен шу топуракъны сени наслуларынга бережекмен, — дей.

Шонда Ибраим гёрюнген Раббибизге къурбанлыкъны салагъан ер къура.⁸ Сонг о Бет-Эл деген шагъарны гюнтувш ягында ерлешген тавлагъа багъып тербене ва онда овзюню чатырларын къура. Бет-Эл шо ерни гюнбатыш ягында, Гай деген шагъар буса гюнтувш ягында болгъан. Шонда Ибраим Раббибизге къурбанлыкъны салагъан ер къуруп, Ону атын тутуп сёйлей.⁹ Сонг о кыбыла якътъя, Негевге багъып бара.

Ибраим Сарай булан Мисриде

¹⁰ Шо вакъти Гъананда ачлыкъ бола. Ибраим бир гесекте Мисриге яшама чыгъя, неге тюгюл ачлыкъ шонча да гючлю бола.¹¹ Мисриге етише туруп, о Сарайгъа булав дей:

— Мен сен нечик арив экенингни билемен.¹² Мисрилилер сени гёрюп, сен мени къатыным экенни англажакъ. Сени сав къояжакъ, мени буса оылтюрүп къояжакъ!¹³ Олагъа сен мени къызардашымсан деп айтып къоярсан. Шолай этсенг, бары зат яхшы болажакъ, мени оылюмден къутгъаражакъсан.

¹⁴ Ибраим Мисриге гелгенде, мисрилилер Сарайны аривлюгун гёре-лер.¹⁵ Вазирлер Сарайгъа къарап, ону аривлюгун Мисрини пачасына макътамагъа башлайлар. Шону учун Сарайны пачаны къаласына ала-лар.¹⁶ Ибраим Сарайны эркъардашы деп ойлашып, пача огъар рагымулу бола. Ибраимге тувар, къойлар, эшеклер, къуллар, къаравашлар ва тюелер бере.

¹⁷ Тек пача овзюне Ибраимни къатыны Сарайны алгъаны саялы, Раббибиз огъар ва ону къаласындагылагъа уллу балагълар гелтире.¹⁸ Ибраимни чактырып, пача огъар:

— Сен этип къойгъан недир? О сени къатынынг экенни неге яшыргъан эдинг?¹⁹ Неге къызардашым деп айтдынг?²⁰ Мен чи шолайдыр деп, ону къатын этип алгъан эдим! Алып къатынынгны да, гет! — дей.²⁰ О Ибраимни къатыны да, бары мал-матагы да булан къувалап ийбермеге буйрукъ бере.

Ибраимни Лутдан айрылысу

13 ¹Ибраим къатыны ва бары малы-матагы булан Мисриден къайтып, Негевге гете; ону булан Лут да гете. ²Энни Ибраим гъайван-малы, гюмюшю, алтыны булан бек бай бола. ³⁻⁴Ёлун узата туруп, Ибраим Негевден Бет-Элге багып гете. О тап алда оъзюню чатырларын къургъан ва къурбанлыкъыны салагъан ерни къургъан ерге багып бара. Шонда Ибраим Раббибизни атын тутуп сёйлей.

⁵ Ибраим булан гёчюп юрюйген Лутну да оъз гъайван-малы ва чатырлары бола. ⁶ Экевге топуракъ азлыкъ эте: оланы малы-мюлкю шонча да кёп бола чы, гъатта олагъа бирче яшама тыгызылыкъ эте. ⁷ Ибраимни ва Лутну къойчуларыны арасында эришивлюклер башлана. (Шо заманларда бу ерлерде гъананлылар ва перислилер яшай болгъан).

⁸ Ибраим Лутгъя бурай дей:

— Бизин арабызыда — мени къойчуларымны да, сени къойчуларынгны да арасында — эришивлюк болмайгъан кюйнү этейик, биз чи къардашларыбыз. ⁹ Муна алдынгда топуракъ — гел, биз айрылайыкъ. Сен сол якъгъа багып барсанг, мен онг якъгъа багып баарман. Сен онг якъгъа багып барсанг, мен сол якъгъа багып баарман.

¹⁰ Лут къарап, савлай Ёрдан Къолу тап Соаргъа ерли, Раббибизни бавудай, Мисрини топурагъыдай, сугъарылып турагъынын гёре. (Бу затлар Раббибиз Содомну ва Гъомораны дагыытгынча бола). ¹¹ Лут Ёрдан Къолун сайлап, гюнтувшгъа багып тербене. Буланы ёллары шолай айрыла.

¹² Ибраим Гъананда, Лут буса Къолну шагъарларыны къырыйында ерлеши. О Содомну къырыйында чатырларын да къуруп яшавлукъ эте. ¹³ Содомну халкъы яман адамлар болгъан. Олар Раббибизге къаршы кёп гюнагъ ишлер эте болгъанлар.

¹⁴ Лут ва Ибраим бир-бириндөн айрылгъандан сонг, Раббибиз Ибраимге бурай дей:

— Айлананга къара! Мундан таба темиркъазыкъынга ва къыблагъа, гюнтувшгъа ва гюнбатышгъа къара. ¹⁵ Сен гёрюп турагъан бу бары топуракъ-

ны Мен даймликге сагъа ва сени наслуларынга бережекмен.¹⁶ Мен сени наслунгну денгиз ягъадагы къайыр бюртюклени санавудай кёп этежекмен. Къайыр бюртюклени санама бажарылмайгъанда йимик, шолай сени наслуларынгны да санама бажарылмажакъ.¹⁷ Бар чы, топуракъын узунуна да, генгине де юрюп чыкъ, неге тюгюл Мен шону сагъа бережекмен.

¹⁸ Оъзюню чатырларын гёчюрюп, Ибраим Гьеврон шагъарда, Мамре деген адамны эменлигини ювугъунда орунлаша. Шонда о Раббизиге къурбанлыкъын салагъан ер къура.

Ибраим Лутну къутгъара

14 ¹⁻² Шо вакътилерде Шинарны пачасы Амрапел, Элласарны пачасы Ариогъ, Эламны пачасы Кедарламер ва Гоимни пачасы Тидал бирче жыйылып, Содомну пачасы Беругъя, Гъомораны пачасы Биршугъя, Адманы пачасы Шинавгъя, Севаимни пачасы Шемеверге, Беланы (гъали Соар деп айтылагъан) пачасына къаршы дав этмеге баралар.³ Артда эсгерилген беш де пача Сиддим къолда, гъалиги Тузлу денгиз бар ерде, бир-бирине къошуулалар.⁴ Олар он эки йылны узагъында Кедарламерни зулмусуну тюбюнде туралар, он учюнчюй йыл буса баш гёттерелер.

⁵⁻⁶ Он дёртюнчюй йыл буса оъзлер де булан бирлешип иш гёрген пачалар да булан Кедарламер геле. Олар Аштерот-Карнаимде рефаимлилерден, Гъамда зузулардан, Шав-Кирьятайымда эмлилерден, дангылны ягъасындагы Эл-Паранда оъз тав эли Сейирде хорлулардан уyst гелелер.⁷ Шондан олар Эн-Мишпатгъя (гъали Кадеш деп айтылагъан) багып бурулалар ва Гъасисан Тамар деген ерде яшайгъан амалакетлилерден ва аморлулардан уyst чыгъалар.

⁸⁻⁹ Содомну пачасы, Гъомораны пачасы, Адманы пачасы, Цевоимни пачасы ва Беланы (гъали Соар деп айтылагъан) пачасы Сиддим къолда Эламны пачасы Кедарламерге, Гоимни пачасы Тидалъя, Шинарны пачасы Амрапелге, Элласарны пачасы Ариогъыга къаршы чыгъып, олар булан дав юрютөлөр. Дёрт пача беш пачагъа къаршы ябушалар.¹⁰ Сиддим къолда буса сымадан толгъан кёп къюулар болгъан. Содомну да,

Гъомораны да пачаларыны асгерлери, къачма башлап, шо къюларда батылып къалалар. Къалгъанлары буса тавлагъа къачып гетелер.¹¹ Усть болгъанлар Содомну ва Гъомораны бары байлыгъын, оланы бары сурсатын да алыш, ёкъ болуп гетелер.¹² Олар Содомда яшайъян Ибраимини агъасыны уланы Лутну да алыш гетелер. Ону бары малын-мюлкүон де чыгъарып алалар.

¹³ Сав къалгъанланы арасындан бириси, аморлу Мамрени эменлигини къырыйында яшайъян гелгинчи Ибраимни ягына гелип, оғтар болгъан ишни гъакъында хабарлай. Мамре, Эшкол, Анер деген агъа-инилер Ибраим булан бирлешивде болгъанлар.¹⁴ Лутну есирилкде экенин билгенде, Ибраим тувгъандан берли оъзюню уюнде тувгъан, дав юрютүп бажарагъан учь юз он сегиз адамын да жыйып, оланы артындан тюше. Душманланы о Дан деген шагъаргъа ерли гызызлап юрой.¹⁵ Гече душманланы къуршавгъа алыш, оланы янча ва тап Шамны темиркъазыкъ ягында ерлешген Гъовагъа ерли къувалап юрой.¹⁶ Душманлардан о бары талагъан затын, Лутну, ону мал-матагъын, къатынгишилени ва есирлени къайтара.

Мелгъиседек Ибраимни шабагъаттай

¹⁷ Кедарламерден ва ону булан бирлешивдегилерден усть болуп къайтып гелегендө, Шаве деген къолда (гъали Пача къол деп айтыла-гъан) Ибраимни алдына Содомну пачасы чыгъя.¹⁸ Аллагъу-Тааланы дин къулукъчусу ва Салимни пачасы болгъан Мелгъиседек Ибраимге экмек ва чагыр чыгъара.¹⁹ Мелгъиседек ону бурай деп шабагъаттай:

— Кёкню ва ерни Яратывчусу Аллагъу-Таала Ибраимни
шабагъатласын!

²⁰ Душманларынгны сени къолунга берген Аллагъу-Таалагъа
макътав болсун!

Ибраим оъзюне тюшген затыны ондан бир пайын Мелгъиседекге бере.
²¹ Содомну пачасы Ибраимге:

— Мени адамларымны къайтар, тюшген затынгны буса оъзюнгэ къой, — дей.

²²⁻²³ Амма Ибраим пачагъя бурай дей:

– Раббибизни, Аллагыу-Тааланы, кёклени де, ерлени де Яратывчусуну алдында къолумну гётере туруп, сени бир затынгны да, гъатта чарыкъла-рынгны бавларын да алмасман деп ант эте тураман мен. Шо заман сен бирдокъда: «Ибраимни бай этген меммендир», – деп айтып болмассан.²⁴ Адамларыма ашавлукъыгъа гетген затдан къайры магъя бир зат да тарыкъ тюгюл. Мени булан бирче давгъя гелген Энер, Эшкова Мамре оъзлеге ти-еген пайларын алсынлар.

Аллагыны Ибраим булан бөгөтген разилемшивю

15¹ Шо агъвалатлардан сонг бираз заман оътиоп, Ибраимге Раббибиз бир гыйран гёрюнүш гёрсете. О Раббибизни бурай сёзлерин эшите:

– Къоркъма, Ибраим, Мен сени Къалкъанынгман. Сагъя уллу савгъат берилежек.

² Ибраим буса бурай дей:

– Есим мени, Раббим. Мен авлетсиз оължек бусам, Сени савгъатла-рынг магъя негердир? Мени варисим – Шам деген шагъарлы Элиезер.

³ Сен магъя авлет бермеген сонг, мени варисим уюмде тувгъан шо къул болуп токътажакъ.

⁴ Ибраим Раббибизни бурай сёзлерин эшите:

– Сенден улан туважакъ, о да сени варисинг болуп токътажакъ.

⁵ Ибраимни чатырдан къыргъа чыгъарып, Раббибиз оғъар:

– Кёкге къара, юлдузланы бир санап къара: шоланы санап боламысан? Сени наслуларынг да шончакъы болажакъ! – дей. ⁶ Ибраим Аллагыга иман сала, шо саялыш Аллагы ону къабул эте.

⁷ Раббибиз Ибраимге:

– Шу топуракъын сагъя есликке бермек учун, Мен сени Гъалдейдеги Ур деген шагъардан гелтирдим, – дей.

⁸ – Есим мени, Раббим! Бу топуракъ меники болажакъны белгиси къайдадыр? – дей Ибраим.

9 – Магъа мунда уыч йыллыкъ сыйырны, уыч йыллыкъ эчкини, уыч йыллыкъ къойну, уй ви кыр гёгюрчонлерден де бирерни гелтир, – дей Раббибиз огъар.

¹⁰ Ибраим жанланы гелтирип, оланы тенг этип, экишер гесекге бёле, чархларын буса бир-бирине къарши сала. Къушланы буса бёлмей къоя.

¹¹ Кыргыйлар учуп гелип, чархлагъя ябушуп йибере, тек Ибраим оларны кюшлей.

¹² Гюн арта туруп, Ибраимни къатты юху басма башлай, ону къара къоркъунчлукъ къуршап ала. ¹³ Раббибиз Ибраимге булай дей:

– Билип къой: сени наслуарынг ят элде дёрт юз йылны узагъында есирилкде ва къурбатлыкъда къалажакъ. ¹⁴ Тек оланы есири эттен халкъгъа Мен дуван этежекмен. Шондан сонг сени наслуарынг шо ерден уллу байлыкъ булан чыгъажакъ. ¹⁵ Сени гъакынгда айтсакъ, сен аталарынгны янына парахатлыкъда гёчежексен, къабурунга абурул къарт гысапда ги-режексен. ¹⁶ Мунда сени халкъынг дёрт наслу гетип къайтажакъ, неге тю-гюл аморлуланы гюнагълары гъали де етишип битмеген.

¹⁷ Гюн арта ва бары ерни къарангылыкъ къуршап ала. Бирден бёлюнген гъайванланы арасындан тютейген очакъ ва башы янгъян таякъ оытюп гете. ¹⁸⁻²¹ Шо гюн Раббибиз Ибраим булан булай разилешив бегете:

– Сени наслуарынга Мен Мисри оyzенден тутуп уллу Фират оyzенге ерли кенилени, кенислилени, кадмонуланы, хетлилени, перислилени, рефаимлилени, аморлуланы, гъананлыланы, гиргашлыланы ва евуслуланы бу топуракъларын барын да беремен.

Гъажар ва Исмайыл

16 ¹ Ибраимни къатыны Сарайдан яш болмай болгъан. Ону Гъажар деген мисрили къаравашы болгъан. ² Сарай Ибраимге:

– Раббим магъа авлет бермей. Мени къаравашыма ювукълукъ эт, балики, о сама да магъа яш табар, – дей.

Ибраим Сарай айтгъанны эте. ³ Сарай да огъар къатын этип оyzюно къаравашы мисрили Гъажарны бере. Шо вакъти Ибраим Гъанан элде ер-

лешгенден берли он йыл бите болған. ⁴Ибраим Гъажаргъа ювукълукъ эте. Гъажар айлы болуп, оyzюню еси Сарайгъа оыктем къарама баштай.

⁵Сарай Ибраимге:

— Мени абурсуз болғынтыгъыма сен жаваплысан. Мен сагъа къатын этип къаравашымны берген эдим, о буса айлы болуп, магъа оыктем къарай. Экевибүзгө де тюз дуванын Раббибиз этсин дагыы, — дей.

⁶— Къаравашынг оyzюнгню ихтиярынгда. Оyzюнг тюз гёрген күйде эт, — деп жавап бере Ибраим. Сарай Гъажаргъа зулму этме баштай. Гъажар да ондан къачып гете.

⁷Данғылда, Шургъа багыып элтеген ёл уystдеги булакъны ягъында, ону уystюне Раббибизни малайиги гелип:

⁸— Сарайны къаравашы Гъажар, къайдан гелесен, къайда барасан? — деп сорай.

— Есим Сарайдан къачып бараман, — дей о.

⁹Раббибизни малайиги оғъар булагай дей:

— Есинге къайтып барып, оғъар таби болуп къал. ¹⁰Мен сени наслула-рынгны санап болмасдай кёп этежекмен. ¹¹Сен айлысан, сени уланынг болажакъ. Оғъар Исмайыл* деп къоярсан, неге тюгюл Раббинг сени агынгны эшитди. ¹²Уланынг къыр эшекдей болажакъ. О бары халкъына къаршы, бары халкъ буса оғъар къаршы болажакъ. Къардашлары булан эришивлюкде яшап къалажакъ.

¹³Оyzю булан сейлекен Раббибизге Гъажар: «Сен Эл-Ройсан», — деп ат къоя. Шо: «Мени гёрген Аллагъыны оyz гёзюм булан гёрдюм!» — деген затны англата болған. ¹⁴Шо саялы да къуюгъа Бегъер-Лагъай-Рой** деп айтыла. Шо Кадешни ва Бередни арасында ерлешген.

¹⁵Гъажар Ибраимге улан таба. Ибраим Гъажардан тувгъан уланына Исмайыл деп къоя. ¹⁶Шо вакътиде Ибраимге сексен алты йыл битген болған.

* ^{16:11} *Исмайыл* — бу ат ягъуди тилде «Аллагъ эшите» демекдир.

** ^{16:14} *Бегъер-Лагъай-Рой* — бу «гъакъ, мени гёрген Аллагъ» демекдир.

*Разилемшивню белгиси гысапда
сүннөт этидирип*

17 ¹Ибраимге токъсан тогъуз йыл болагъанда, огъар Раббибиз гёрюнүп, булагай дей:

— Мен бары да затны Еси болгъан Аллагъман. Мени гёз алдында яшап тур ва мұммин болуп тур. ²Мен сени булан разилемшив бегетежекмен, Мен сенден бир уллу халкъ болдуражакъман.

³Ибраим Ону алдында ерге къапланып ята. Аллагы булагай дей:

⁴— Къара чы! Муна, Мен сени булан бегетеген разилемшив: сен кёп халкъланы ата-бабасы болуп токътажакъсан. ⁵Сени атынг да Ибраим* тюгюл, Ибрагым** болажакъ, неге тюгюл Мен сени кёп халкъланы ата-бабасы этежекмен. ⁶Сени наслуларынгны артдыражакъман: бир хыйлы халкълар сенден таба баш алажакъ, сени наслуларынгдан чыкъгъянлар пачалар болажакълар! ⁷Мени разилемшивом, сени булан ва сени наслуларынг булан даймликге бегетилип, наслудан-наслугъа берилип туражакъ. Мен сени ва сени наслуларынгны Аллагы болажакъман. ⁸Буссагъат сен заманлыкъга орунлашып яшап турагъан топуракъны Мен сағыа ва сени наслуларынга бережекмен. Бютюн Гъанан топуракъны Мен сени наслуларынга даймликге есликке бережекмен ва оланы Аллагы болажакъман.

⁹⁻¹⁰Сонг Аллагы Ибрагымге булагай дей:

— Тек сен де, сени наслуларынг да Мени булан бегетеген разилемшивню наслудан-наслугъа күтмеге герексиз. Муна, Мен сизин булан бегетеген разилемшив: сизин бары да эргишилеригиз сүннетленме герек. ¹¹Мени булан бегетилген разилемшивню белгиси гысапда сүннөт этидиригиз. ¹²Сизин янгы тувгъан гъар уланъяшыгъыз сегизинчи гүон сүннөт этилме герек. Шолай наслудан-наслугъа юрюлюп турсун. Сени ожагъында тув-

* 17:5 *Ибраим* – бу ат ягъуди тилдеги «гүюрметли ата» демекдир.

** 17:5 *Ибрагым* – бу ат ягъуди тилдеги «кёплени атасы» демекдир.

гъян гъар уланъяш, сени наслунгдан болмай, ят халкълардан сатылып алынгъан буса да, сюннет этилме герек.¹³ Сёэсюз осу да, башгъасы да – уйде тувгъаны да, сатып алынгъаны да – сюннет этилме герек. Шолай кварткъарагъызыда Мени булан бегетилген даймлик разилешивню белгиси къалажакъ.¹⁴ Сюннет этилмеген адам буса, Мени булан этилген разилешивню кютмегени саялы, оъз халкъындан айрылажакъ.

¹⁵ – Аллагъ Ибрагымге дагъы да булагай дей:

– Энниден сонг сени къатыныңгы аты Сарай тюгюл, Сара болажакъ.

¹⁶ Мен ону шабагъатлажакъман, сагъа ондан улан тувдуражакъман. Мен Сараны шабагъатлажакъман, ондан таба бир хыйлы халкълар баш ала-жакълар. Ону наслуларындан чыкъгъанлар пачалар болажакълар.

¹⁷ Ибрагым ерге къапланып ята, оъзю буса кюлемсирей туруп:

– Юз йыллыкъ къартдан яшлар тувамы? Токъсан йыл болагъан Сараны яш табагъян заманымы дагъы? – деп ойлаша.¹⁸ О Аллагыгъя:

– Исмайыл сама мени варисим болсун, – дей.

¹⁹ – Къатыныңг Сара улан табажакъ, сен оғъар Исгъакъ* деп къояжакъсан. Мен ону ва ону наслулары булан даймлик разилешив бегетежекмен.

²⁰ Сени Исмайыл булан байлавлу тилевюнгю де къабул этдим. Мен ону шабагъатлажакъман, ону наслусун артдыражакъман ва оғъар көп санавда наслулар бережекмен. Исмайылдан он эки бий туважакъ, о уллу халкъны ата-бабасы болажакъ.²¹ Тек Мени разилешивюм Исгъакъ булан болажакъ. Сара сагъа ону бир йылдан сонг шу вакътилерде табажакъ, – дей Аллагъ оғъар.²² Ибрагымге шолай да айтып, Аллагъ гете.

²³ Шо гюн Ибрагым Аллагъ оъзюне буюргъан күйде уланы Исмайыл-гъя, ожагъындагъы бары да эргишилеге: тувмадан ожагъы булан байлавлу эргишилеге ва бары да сатып алгъан къуллагъя – сюннет эте.²⁴ Сюннет-ленген заманында Ибрагымге токъсан тогъуз йыл,²⁵ уланы Исмайылгъя буса он уч йыл бола болъян. ²⁶⁻²⁷ Бир гюнню ичинде Ибрагым, ону уланы Исмайыл, Ибрагымни ожагъындагъы бары да эргишилер: тувмадан

* 17:19 *Исгъакъ* – бу ат ягъуди тилдеги «ол кюлей» демекдир.

ожагы булан байлавлу эргишилер ва ят халкълардан сатылып алынгъан къуллар – сюннет этиле.

*Ибрагымге Сарадан улан тувмакъны
гъакъындагъы вадда*

18 ¹Тюшню яллавунда Мамре эменликде Ибрагым чатырыны алдында олтуруп турагъанда, оғтар Раббибиз гёрюне. ²⁻³Ибрагым гёзлерин гётегирип къарай – алдында уйч адам эретуруп тура. Чабып олагъа багъып барып, алдында ерге къапланып ятып, Ибрагым булагай дей:

– Бийим, ярай буса, сени къулунг болгъан мени ягъымдан оытуп гетип къалма хари. ⁴Сизге аякъларыгъызын жувма сув гелтирип, терек тюпде олтуруп ял яларсыз. ⁵Къулугъуз болгъан мени ягъымдан оытуп бара болгъан сонг, ёлугъузгъа чыкъынча, сизге хапма аш да берермен.

– Яхши. Шолай эт, – деп жавап бере олар.

⁶Чабып чатыргъа гирип йиберип, Ибрагым Сарагъя:

– Инг яхшысындан тез бир дорба ун ал, хамур басып, эмек биширип, – дей.

⁷Сонг Ибрагым туварына багъып чабып йиберип, яхши семиз бузавну ала ва тез гъазир этсин деп, къуллукъчусуна бере. ⁸Ибрагым оызю къонакълагъа къаймакъ, сют, бузав эт бере. Олар ашап турагъан заманны ичинде о оланы къырыйында, терек тюпде эретуруп тура.

– Къатынынг Сара къайда? – деп сорай олар Ибрагымге.

– Шунда, чатырда, – деп жавап бере о.

¹⁰ – Мен сени ягъынга тогъуз айдан къайтып гележекмен. Шо заман Сараны уланы болажакъ, – дей олардан бири.

Сара буса чатырны ичинде Ибрагымни артында эретуруп тынглап тура болгъан. ¹¹Ибрагым ва Сара бек къарт болгъан, Сара буса яш табып болагъан чагъындан оытген болгъан. ¹²Ичинден кюлемсиреп, Сара булагай деп ойлаша:

– Мени девюрюм гетди, есим де къарт. Яш тапма насиpler де къайда-дыйр гъали?

¹³Шо заман Раббибиз Ибрагымге булагай дей:

— «Къарт да болуп, мен гертиден де яш табып болурманны дагы?» — деп де айтып, неге кюлеп къойду Сара? ¹⁴ Раббигиз этип болмасдай гъеч зат бармы? Мен айтылгъан болжалдан, тогъуз айдан, къайтып гележек-мен, шо заман Сараны уланы болажакъ.

¹⁵ Къоркъян Сара:

- Мен кюлемедим, — деп ялгъан айтып къоя.
- Ёкъ, сен кюлей эдинг, — дей Раббибиз огъар.

Ибрагымни Содом саялы ялбарызыу

¹⁶ Гетмеге деп онгарыла туруп, эргишилер эртуралар ва Содомгъа ба-гъып къарайлар. Эргишилени узатмакъ учун, Ибрагым олар булан бара.

¹⁷ Раббибиз булай дей:

— Мен Ибрагымден Оъзюмню хыялларымны яшырмасман. ¹⁸ Ибра-гымден таба чы бек уллу ва гючлю халкъ амалгъа гележек. Ондан таба ер юзүндеги бары халкълагъа шабагъат этилежек. ¹⁹ Оъзюню авлетлерине ва наслулатына Аллагыны ёлунда, демек адилли ва тюз кюиде юрюмекни бу-юрсун деп, Мен Ибрагымни сайладым. Шоллукъда Мен, Рабби, огъар этген вайтамны күтежекмен.

²⁰ Шо заман Раббибиз булай дей:

— Мен Содомгъа ва Гъоморагъа къаршы бакъдырылгъан бек гючлю айыплавлани эшитдим. Оланы гюнагы оьтесиз уллу. ²¹ Мен эшитген айыплавлар гертиден де тюзмю экен деп билмек учун, тюпге багъып бар-ма тарыкъман.

²² Шондан сонг эки де эргиши гете ва Содомгъа багъып бара, амма Раб-бибиз Ибрагым булан бола. ²³ Ибрагым, Огъар ювукъ болуп, булай дей:

— Яманлар булан бирге Сен гъали мұмминлени де дагытажакъымы-сан? ²⁴ Балики, шу шагъарда элли мұммин адам бардыр. Шо элли адамны хатириндеп сама, шагъаргъа языкъсынмай, Сен шону дагытажакъымысан?

²⁵ Шо ишни этmessен Сен! Мұмминлени яманлар булан бирге кырмас-сандыр, мұммин де, яман да бир къысматгъа тарымас. Шолай болма яра-мас! Бютюн дюньяны Дуванчысы адилсиз дуван этип болармы дагы?

²⁶ — Мен Содомда элли мұмминни тапсам, оланы хатириңден шо шағарға язықсынажакъман, — деп жавап бере Раббибиз.

²⁷ — Шо заман Ибрагым булай деп сёзүн узата:

— Мен бир чант, хум бусам да, амма Есиме айтма болушлукъ этейим:

²⁸ эгер әллиге беш мұммин етишмесе, етишмейген шо бешевни хатириңден Сен бютөн шағарны дагытартмысан дагы?

— Ёкъ, эгер де шонда кыркъ беш мұмминни тапсам, дагытасман, — деп жавап бере Раббибиз.

²⁹ — Эгер онда янгыз кыркъ мұммин табулса? — деп узата Ибрагым.

— Кыркъ болса да, шону этмесмен, — деп жавап бере Раббибиз.

³⁰ — Айтажакъ сёзлериме мени Есим къазапланмасын. Эгер де онда янгыз отуз мұммин болуп къалса? — дей Ибрагым.

— Эгер де шонда отуз мұмминни тапсам, шағарға язықсынажакъман, — деп жавап бере Раббибиз.

³¹ — Есиме сорамагъа болушлукъ этейим: шонда олар янгыз йигирма бар буса? — дей Ибрагым.

— Йигирманы хатириңден язықсынарман, — деп жавап бере Раббибиз.

³² — Есим къазапланмасын, бу ахырынчы соравум — эгер де онда олар янгыз онав болса? — дей Ибрагым.

— Онавну хатириңден язықсынарман, — деп жавап бере Раббибиз.

³³ Шону да айтып, Раббибиз гете, Ибрагым буса уюне къайта.

Аллагъ Содомну ва Гъомораны дагытыа

19 ¹ Ахшам болғанда, Содомгъа эки малайик геле. Лут шағарны къапуларыны алдында олтуруп тұра болған. Малайиклени гёрюп, Лут оланы къаршылама чыгъя ва алдында ерге къапланып ята. ² О булай дей:

— Бийлерим, сизин къулугъуз болған мени уюме гелигиз. Бизде гече къаларсыз, аяқъаларғызын жуварсыз, әртенинде буса ёлугъузну узатарсыз.

— Ёкъ. Биз гече майданда къалайыкъ, — дей олар.

³ Амма Лут олагъа шолай бек тилей чи, олар рази болуп къалалар. Лут оланы уюне гелтире, ахшамгъы ашны гъазирлей, чапелеклер бишире ва

олар ашай. ⁴Олар ятып да битгинче, шагъарда яшайғанлар – Содомнұ бары да әргишилери, яшы-уллусу булан – Лутну уюн дёрт де яғындан аралап алалар. ⁵Олар Лутгъа бурай кызырылар:

– Къайда сағыа гече къалма гелгенлер? Чыгъар оланы мунда, биз ола-гъя ювукълукъ этейик чи!

⁶Лут, посагъагъя чыгъып, арты булан эшикни яба ⁷ва бурай дей:

– Къардашлар, тилеймен сизге, яман затны этмегиз! ⁸Мени гъали де санына әргиши тиймеген эки къызыым бар. Оланы берейим сизге, не сой-сегиз этигиз олагъя, тек мени ожагъыма гелгенлени къоюгъуз.

⁹ – Ёкъ бол гъали шундан! Сен гелгинчisen, сен къалғанмысан мунда буйруқъ этме? Гъали сағыа ондан да бетерин этербиз! – дейлер оғыар. Олар ону уystюне басып гелип, эшикни бузуп ачма айлана. ¹⁰Тек Лутну къонакълары ону тартып, къайтарып уйтеги гийирит, эшикни де бегителер. ¹¹Эшик алда әретургъанланы барын да буса, уллусу-гиччиси булан, сокъур этип къоялар. Олар нечакъы излеп айланса да, эшикни табып болмайлар.

¹²Къонакълар Лутгъа:

– Бу шагъарда дагъы да киминг бар? Уланларынг, къызларынг, гиевле-ринг, дагъы оyzге адамларынг бармы? Барын да чыгъар мундан, ¹³неге тюгюл биз бу шагъарны дагъытажакъбыз! Раббибиз Содомда яшайғанла-гъя къаршы бакъдырылған бек гючлю айыплавланы эшилди. О бизин муну дагъытма йиберди! – дейлер.

¹⁴Лут барып къызларыны гелешмишлерине:

– Тез бу шагъардан гетигиз! Раббибиз гъали муны дагъытажакъ, – дей. Олар буса Лут масхара этедир деп къоялар.

¹⁵Танг билинип гелегенде, малайиклер Лутну:

– Тез бол, къатыныңны да, эки де къызыңны да алып гет! Ёғесе, гюнагъ-лы шагъар булан бирге оyzюнг де оылжексен! – деп алгъасатма башлайлар.

¹⁶Лут буса аста айлана болған. Шо заман малайиклер, Лутну, ону къа-тыныны ва эки де къызыны къолларындан тутуп, оланы шагъардан чыгъарапар, неге тюгюл Раббибиз Лутгъа языкъысна. ¹⁷Чыкъгъанда, ма-лайик Лутгъа бурай дей:

— Къачып къутул, артынга бурулуп къарама! Къолда да узакъ токътамай, тавлагъя багып къач, ёгъесе ойлеккесен!

¹⁸ — Ёкъ, мени Есим! ¹⁹ Сени къулунг болғын магъя нече де рагъмулусан! Сени магъя бакъын якъдагы рагъмунг зор уллу: сен мени ойлюмден къутгъардынг! Тек тавлагъя ерли мен чабып етишип болмасман — балагъ артымдан етишер, мен де ойлюп къаларман. ²⁰ Къара, бираз ариде бир гиччирек шагъар бар. Шо чу бир гиччирек шагъар, магъя шонда багып къачма изну бер. Шонда чабып етишип, мен къутгъарылажакъман, — деп жавап бере Лут.

²¹ — Яхшы. Шону да этежекмен сени хатириңген. Сен айтагъан шагъарны мен сакълажакъман. ²² Тек тез чабып йибер шонда. Неге тюгюл, сен шонда етишмей туруп, мен башлап болмайман, — дей малайик. (Шо саялы да шо шагъаргъя Соар деп айтыла.)

²³ Лут Соаргъя гелгенде, гюнеш гётерилме башлай. ²⁴ Содомгъя ва Гьоморагъя Раббибиз кёклерден таба яллайгъан кюкортню явдуруп йибере. ²⁵ Раббибиз эки де шагъарны, къолну, онда яшайгъанланы барын да ва то-туракъда ойсеген бары да затны дагъытып къоя. ²⁶ Амма Лутну къатыны артына бурулуп къарай ва туз багъанагъя айланып къала.

²⁷ Эртен тез Ибрагым алдындағы гюн ойзу Раббибизни алдында токътагъан ерге геле. ²⁸ Содомгъя, Гьоморагъя, къолгъя къараса — топуракъдан отбашдан йимик тютюн гётерилип тұра. ²⁹ Къолдагыы шагъарланы дагъыта туруп, Аллагъ Ибрагымни эсге ала. Лут яшагъан шагъарланы дагъытса да, Аллагъ Лутну ойлюмден къутгъара.

Лут ва ону къызылары

³⁰ Эки де къызын да алып, Лут Соардан тавлагъя чыгъып гете, неге тюгюл о Соарда къалмагъя къоркъа. Олар бир анақъда ерлеше. ³¹ Уллу къызы гиччисине буладай дей:

— Бизин атабыз къарт. Бу бүтюн уылкеде бизден яш болагъан күйде бизин къатын этип алардай бир эргиши де ёкъ. ³² Атабызгъя чагъыр ичирип, ону булан ятайыкъ. Атабыздан таба тухумбузну, сёнме къоймай, узатайыкъ!

³³ Гече олар атасын чагъыр булан эсиртелер. Уллу кызызы атасыны кырыйына гелип, ону булан ята. О буса бир затны да – кызыы оъзю булан не ятгъанны, не гетгенни – билмей къала. ³⁴ Артындагы гюн уллусу гиччиши кызызардашына:

– Гетген гече атабыз булан мен ятдым. Бу гече де ону ичирейик, сен гелип, ону булан ятарсан. Атабыздан таба тухумбузну, сёнме къоймай, узатайык! – дей. ³⁵ Олар гече янгыдан атасын чагъыр берип эсиртелер. Гиччи кызызы гелип, атасы булан ята. О буса бир затны да – кызыы оъзю булан не ятгъанны, не гетгенни – билмей къала.

³⁶ Шолай Лутну эки де кызызы оъз атасындан айлы болалар. ³⁷ Уллусу улан таба ва огъар *Моав** деп къоя. О гъалиги моавлуланы ата-бабасы.

³⁸ Гиччиши де улан таба ва огъар *Бен-Амми*** деп къоя. О гъалиги аммонулуланы ата-бабасы.

Ибрагым ва Авимелегъ

20 ¹Ибрагым шо ерлерден кыблагъя, Негевге багъып гетип, Кадешни ва Шурну ортасында яшама башлай, сонг буса Герар деген шағъарда ерлеши. ²О адамлагъя къатыны Сара оъзюню кызызардашы деп айттып юрюй. Шо саялы Герарны пачасы Авимелегъ Сараны артындан ийберип, ону оъзюне ала. ³Тек Авимелегъге гече тюшүнде Аллагъ гёрюнүп, бурай дей:

– Шо къатынны алгъанынг саялы сен оълежексен. Ону эри бар.

⁴Авимелегъ буса огъар тийме де тиймеген болгъан.

– Есим! Гертилей де, Сен айыпсыз халкъны оылтурежекмисен? – деп ялbara о. ⁵Шо адам чы огъар кызызардашым деп оъзю айтды! Къатын да шолай дей эди! Мени намусум таза, мунда мени гюнагым ёкъ!

* ^{19:37} *Моав* – бу атны айтылыши ягъуди тилдеги «атадан» деген сёзню айтылышина ошашлы геле.

** ^{19:38} *Бен-Амми* – бу ат ягъуди тилдеги «мени халкъымны уланы» яда «мени атамны уланы» демекдир.

⁶⁻⁷ – Герти, Мен сени намусунг таза экенни билемен. Шо саялы да Мен сени шо къатынгъа тийме къоймадым, Мени алдында гюнағы этмекден сакъладым. Тек гъали энни ону эрине къайтар. О пайхаммар, о сен сав къалсын деп дуа этежек, сен де сав къалажакъсан. Эгер сен ону эрине къайтармасанг, оъзунг ва бары да уюнгдегилер де оълежекни билип къой, – деп жавап бере огъар тюшүндө Аллагы.

⁸ Эртенине Авимелегь бары да вазирлерин де чактырып, бу сёzlени олагъа етишди. Олар бары да бек къоркъалар. ⁹ Авимелегь Ибрагымни оъзюню ягына чактырып, огъар булай деп бетлей:

– Недир сен бизге этегенинг? Мени де, савлай пачалыгымны да шу гюнағыга тарытardай сагъя не ачув этген эдим? Шолай этме ярамас чы!
¹⁰ Не саялы этдинг шо ишни?

¹¹ Ибрагым булай деп жавап бере:

– Мен бу якъларда Аллагыдан къоркъмайдыр деп ва къатынным саялы мени оылтурме болар деп ойлашгъан эдим. ¹² Ондан къайры да, о гертилей де мени къизардашым. О мени атамны башгъа къатынындан болгъан къызы. Мен ону къатын этип алгъан эдим. ¹³ Тек Аллагы магъа атамдан къалгъан уюмню къюоп сапар чыкъмагъа буйрукъ этгенде, мен огъар: «Тилеймен сагъя, магъа шу яхшылыкъыны эт: къайда барып къалсакъ да, мен сени эркъардашынг деп айттып тур», – деп айтгъан эдим.

¹⁴ Авимелегь Ибрагымге къойлар, сыйырлар, къуллар-къаравашлар савгъат эте, огъар Сараны къайтара. ¹⁵ О Ибрагымге булай дей:

– Мени бары топурагым сени алдынгда, не ерде сюе бусанг, шонда яшап тур.

¹⁶ Сарагъа буса булай дей:

– Мен сени эркъардашынга бир минг гюмюш акъча беремен. Шо бары да сени булангыланы алдында сен айыпсыз экенликни исбатлажакъ.

¹⁷ Ибрагым Аллагы дуа эте. Аллагы Авимелегыни, ону къатынын ва къаравашларын сав эте. Къатынгишилер къайтып яшлар табып болагъан болалар. ¹⁸ Ондан алда буса Ибрагымни къатыны Сара саялы Раббибиз Авимелегыни уюндеи бары да къатынланы яш тапмайгъан этген болгъан.

Исгъакъны тувмакълыгъы

21 ¹Раббибиз буса, Оyzю вайда этген койде, Сараны эсине ала ва вай-дасын күтө. ²Сара айлы бола ва Аллагъ токтатшыргъан болжалда къарт болуп турагъан Ибрагымге улан таба. ³Сарадан янгы тувгъан ула-нына Ибрагым Исгъакъ деп къоя. ⁴Сегизинчи гюн, Аллагъ оyzюне буюр-гъан койде, огъар сюннет эте. ⁵Исгъакъ тувгъан заманда Ибрагымге юз ийл бола болгъан. ⁶Сара бурай дей:

— Аллагъ мени къуванчлы гъалгъа салып къойду. Бу затны гъакъында эшиитген гъар ким мени булан бирче къуванып туражакъ. ⁷Ибрагымге Сара кёкюрегинден яш ичирежек деп ким айттар эди? Амма муна къарт чагъында менден огъар улан болду!

Гъажар яшы да булан къувалана

⁸ Яш торая. О эмчекден айрылгъан гюн Ибрагым уллу той эте. ⁹Ибра-гымни мисрили Гъажардан болгъан уланы Исгъакъ булан ойнайгъанны гёрюп, ¹⁰Сара Ибрагымге:

— Уланы да булан къаравашны къувалап чыгъар! Неге тюгюл де, къара-вашны уланы азат къатынны уланы булан бирче бир заманда да варис-ликге ортакъ чы болуп болмас, — дей.

¹¹ Ибрагымге оyzюно уланыны гъакъында шо сёзлени эшиитме авур бо-ла. ¹² Амма Аллагъ огъар бурай дей:

— Уланынгны ва къаравашны гъакъында къайгъырма. Сагъа Сара айт-гъан койде эт, неге тюгюл сени наслунг Исгъакъдан таба узатылажакъ. ¹³ Амма къаравашны уланындан да Мен бир халкъыны амалгъа гелтирежек-мен. О да сени баланг чы.

¹⁴ Эртенине Ибрагым Гъажаргъа аш ва тулукъ булан сув да берип, шо-ланы ону инбашына да салып, ону яшы да булан чыгъарып йибере. Гъа-жар гете ва Бер-Шеба дангылында айлана къала. ¹⁵ Тулукъдагы сув бит-гендө, Гъажар яшны уылкю тюпде къоя. ¹⁶ Яшны оылегенин гёrmес учун, юз аbat чакъы ариге де тайып, олтуруп, йылап йибере.

¹⁷ Тек Аллагъ яш йылайгъанны эшите ва Аллагъны малайиги кёклерден Гъажаргъа бурай дей:

— Не болгъан сагъа, Гъажар? Къоркъма! Сен къойгъан яшынгны йылайгъанын Аллагъ эшидди. ¹⁸ Тур, яшны янына бар, къолунга алып, ону рагъатландыр! Мен ондан уллу халкъ болдуражакъман.

¹⁹ Аллагъ Гъажарны гёзлерин ача, о да къю жөре. Ювукъ барып, о тулукъну толтура ва яшгъа ичире. ²⁰⁻²¹ Яш торая, Аллагъ да ону булан болуп турға. О Паран дангылында яшай ва яхши окъчу бола. Анасы огъар Мисриден къатын гелтире.

Ибрагым Авимелегъ булан разилешив бегете.

²² Шо вакъти Авимелегъ, янында асгербашы Пигъол да булан гелип, Ибрагымге бурай дей:

— Сен не эте бусанг да, сагъа Аллагъ кёмек эте. ²³ Магъа, мени яшларыма, яшларымны яшларына хыянатлыкъ этмежекге Аллагъны аты булан ант эт. Мен сени булан нечик рагъмулу болгъан бусам, сен де магъа ва сени сыйындыргъан элге шолай рагъмулу болажакъга ант эт!

²⁴ Ибрагым де ант эте. ²⁵ Шо заман Ибрагым Авимелегъни адамлары оъзюню къюсун чыгъарып алгъангъа кант эте.

²⁶ — Мен шону ким этгенни билмеймен. Сен магъа бир зат да айтмагъан эдинг. Мен шону гъакъында эшигеним биринчилей, — деп жавап береге Авимелегъ.

²⁷ Ибрагым Авимелегъге къойлар ва сыйырлар берип, ону булан разилешив бегете. ²⁸ О башгъаларындан айырып етти къойну сала. ²⁹ Авимелегъ огъар:

— Бу етти къойну, буланы неге айырып салгъансан? — деп сорай.

³⁰ — Менден бу къойланы къабул эт. Мен бу къюнүн къазгъанлыкъын шагъатлыкъ болуп токътажакъ шо, — дей Ибрагым. ³¹ Шо ерге Бер-Шеба* деп айтыла, неге тюгюл олар шонда бир-бирине ант этгенлер.

* ^{20:31} *Бер-Шеба* — бу ат ягъуди тилдеги «антны къюсү» яда «еттевнүү къюсү» демекдир.

³² Бер-Шебада Ибрагым булан разилемшив бегетип, Авимелегъ ва ону асгербашы Пигъол филистим топурагъына къайталар. ³³ Ибрагым Бер-Шебада тамариск терек орната ва Раббибизни, гъар дайм де Бар болгъян Аллагыны атын тутуп сёйлей. ³⁴ Ондан сонг Ибрагым филистим то-пурагъында дагызы да узакъ заман яшай.

Ибрагымни сынавгъа тарылышу

22 ¹Шо агъвалатлардан сонг бираз заман оьтюп, Аллагъ Ибрагымни сынавгъа тарыта.

- Ибрагым! — дей Аллагъ огъар.
- Вай! — деп жавап бере Ибрагым.

² — Биргине-бир, кёп сюеген уланынг Исгъакъны да алып, ону да булан Мориа деген вилаятгъя бар. Онда, Мен сагъа гёрсетген тавда, уланынгны яллатып къурбан эттерсен, — дей Аллагъ.

³ Эртенине Ибрагым эшегин де ерлеп, оъзю булан эки къуллукъусун ва Исгъакъны да ала. О яллатып къурбан этмек учун агъач да гесип, Аллагъ айтгъян ерге багъып ёл чыгъя. ⁴ Юрюй туруп, уьчюнчю гюн о арекден шо ерни гёре. ⁵ Къуллукъуларына о булай дей:

— Сиз эшек булан шу ерде токътап туругъуз, биз буса, яш да булан ба-рып, Аллагыгъа сужда этип, сизин яныгъызгъа къайтып гелербиз.

⁶ Яллатып къурбан этмек учун онгарылгъан агъачлани алып, о Исгъакъны инбашларына сала. Сонг отну ва бичакъны алып, Исгъакъ да бу-лан бирче дагызы да ариге юрюй. ⁷ Исгъакъ атасына:

- Атам! — дей.
- Вай, уланым? — деп жавап бере Ибрагым.
- Бизин отубуз да, агъачларыбыз да бар, яллатып къурбан этмек учун къозубуз къайда дагызы? — деп сорай Исгъакъ.

⁸ — Уланым, яллатып къурбан этмек учунгъу къозуну Аллагъ Оъзю бе-режек! — дей огъар Ибрагым. Олар экевиу де ёлун узата.

⁹ Оъзуне Аллагъ айтгъян ерге етгенде, Ибрагым къурбанлыкъыны сала-гъян ер къуруп, шонда агъачлани сала. О Исгъакъны байлап ийбериp, ону

күрбانبалықыны салагъан ердеги ағъачланы уьстюне сала. ¹⁰ Шо заман о уланын соймакъ учун бичагъын чыгъара. ¹¹ Амма огъар кёкден Аллагъыны малайиги:

- Ибрагым, Ибрагым! – деп чакъырыв эте.
- Вай! – деп жавап бере о.

¹² – Огъар къолунгну гёттерме. Огъар бир зат да этме. Гъали сен Аллагъдан къоркъагъанынгны билдим, неге тюгюл оъзюнгню биргине-бир уланынгны Огъар берме къызгъанмадынг! – дей малайик.

¹³ Шонда Ибрагым мююзлери чырхылыкъыгъа чырмалып турагъан иркни гёре. Ювукъ барып, о иркни ала ва уланыны орнуна ону яллатып күрбانبан эте. ¹⁴ Бары да шу затлар болгъан ерге Ибрагым Ягъве-Ире деп ат тагъа. («Раббибиз Оъзюню тавунда бережек» деген айтыв да мундан чыкъгъан).

¹⁵ Раббибизни малайиги кёкден янгыдан Ибрагымге шулай чакъырыв эте:

¹⁶ – Оъзюм булан ант этемен, – дей Рабби Аллагъ: сен шу затны этгенинг, демек биргине-бир уланынгны бермеге къызгъанмагъанынг саялы, ¹⁷ Мен сени шабагъатлама да бир шабагъатлажакъман дагы! Мен сагъа кёкдеги юлдузлани санаву чакты, денгиз ягъадагъы къайыр бюртюклер чакты кёп наслулар бережекмен. Сени наслуларынгны алдында душманларынгны къапулары дагъылып къалажак! ¹⁸ Мени буйругъумну күтгенинг саялы, сени наслуларынгдан таба дюньяны бары да халкъларына шабагъат этилежек.

¹⁹ Ибрагым күллукъуларын къюоп гетген ерге къайтып геле. Олар булан бирче Бер-Шебагъа къайтып, онда яшап тура.

Нагъорну наслулары

²⁰ Шо агъвалатлардан сонг бираз заман оътиюп, Ибрагымге ииниси Нагъорну къатыны Милка уланлар тапгъан деген хабар етише: ²¹ Уц (биринчи авлети), Буз, Кемуел (бу Арамны атасы), ²² Кесед, Гъасо, Пилдаш, Идлап ва Бетуел. ²³ Бетуелден Ребека деген кызы тува. Ибрагымни ииниси

Нагъоргъа къатыны Милка тапгъан сегиз де улан шулардыр. ²⁴ Ондан къайры да, Нагъорну Рейма деген экинчи къатыны огъар Тевагъ, Гагъам, Тагъаш, Маагъ деген уланлар таба.

Сараны оълюмю

23 ¹ Сара юз йигирма етти йыл яшай. ² О Гъанан топурагъында ерлеш-ген Кирият-Арба деген шагъарда (гъали огъар Гьеврон деп айтыла) гечине. Ибрагым гелип, Сарагъа йылап яс эте. ³ Сонг буса оълюмю ягъындан тайып, хет халкъына булай дей:

⁴ – Мен бу якълардан тюгюлмен, мен гелгинчимен. Магъа гечинген къатыннымны гёммек учун къабургъа ер беригиз.

⁵ Хетлилер булай жавап бере:

⁶ – Тынгла бизге, бийибиз. Бизин арабызда сен Аллагъыны бийисен. Къатынгны къабурларыбызын инг яхшысында гём. Бизин къайсыбыз да сагъа оъз тухумбузну къабурундан ер бережекбиз.

⁷ Ибрагым туруп йиберип, бу ерни халкъы болгъан хетлилени алдында ерге къапланып ятып, ⁸ булай дей:

– Эгер сиз магъа оълюмню гёмме ихтияр бере бусагъыз, ярай буса, Согъарны уланы Эпронгъа тилегиз, ⁹ о магъа оъзюндо авлагыны ягъасында ерлешген Магъепелни анагъын сатсын. Гёмелеген ер болсун учун, шо авлакъны мен сизин алдыгъында гюмюш берип толу багъасына сатып алажакъман.

¹⁰ Хетлилени арасында олтургъан Эпрон шагъар къапуларыны алдында олтургъан бары да хетлилер де эшитеген күйде Ибрагымге булай дей:

¹¹ – Ёкъ, бийим! Тынгла магъа, шу авлакъны анакъ да булан бирче мен сагъа беремен. Мени халкъым шагъатдыр: мен шу авлакъны сагъа оълонгню гёммек учун беремен! – дей.

¹² Шо вилаятны халкъыны алдында ерге къапланып ятып, ¹³ Ибрагым Эпронгъа булай дей:

Тынгла магъа, оълюмню гёмежек авлакъ саялы менден гюмюш ал!

¹⁴ Эпрон булагай жавап бере:

¹⁵ — Яхшы, бийим! Тынгla магъя! Шу авлакъны багъасы дёрт юз гюмюш акъча болуп токътай — оълюнгню гёммек учун шо магъя да, сагъа да кёпмю дагы?

¹⁶ Ибрагым Эпрон айтгъан багъагъа рази бола. Ибрагым Эпронгъа шатыят болгъан хетлилени алдында оъзю токъташдыргъан чакъы гюмюшню оылчеп бере: савдюгерчилени арасында юролеген оылчев булан дёрт юз гюмюш акъча.

¹⁷⁻¹⁸ Шолай Магъпелдеги, Мамрени ювугъундагы Эпронну авлагъы, ондагыы анакъ ва бары да тереклер де булан бирче Ибрагымни мюлкюне гире. Шагъар къапуланы алдында жыйылгъан бары да хетлилер шогъар шагъатлар болуп токътай. ¹⁹ Шондан сонг Ибрагым къатыны Сараны гъанан топурагъында Мамрени (гъали огъар Гьеврон деп айтыла) къырыйындагы Магъпелни авлагындан дагыы анакъда гёме. ²⁰ Авлакъ да, анакъ да, хетлилерден Ибрагымге къалып, гёмелеген ер болуп токътай.

Исгъакъ ва Ребека

24 ¹Ибрагым шайлы къарт болуп бите, Раббибизни шабагъаты бары да зат да ону булан болуп турға. ²⁻³ Оъзюн ожагъын ва уй ишлериин юрютоп турагъан баш къулун чакъырып, Ибрагым огъар булагай дей:

— Бутума да тийип, кёклени де, ерни де Аллагы болгъан Раббибизни аты булан уланыма къатын этип ерли гъананлы къызын алмажакъыя, ⁴ мени ватаныма, къардашларымны ягына барып, Исгъакътга къатын шондан гелтирежекге ант эт.

⁵ — Эгер къыз мени булан мунда, бу топуракъы гелме сюймесе, сен чыкъыгъан топуракъы уланынгны къайтарма герек болажакъманмы? — деп сорай къулу.

⁶ — Бирдокъда! Уланымны онда къайтарма! ⁷ Кёклени Аллагы болгъан Раббибиз мени атамны ожагъындан, ватанымдан чыгъарып алды, бу топуракъыны мени наслууларыма бережекмен деп магъя ант этди. Сен уланымна къатын гелтирисин деп, О сени алдынг булан Оъзюн малайигин

иiberежек. ⁸Эгер кызы сени булан гелмеге сюймесе, сен антдан азат этилежексен. Тек мени уланымны онда къайтарма! – деп жавап бере Ибрагым.

⁹Къул есими бутуна да тийип, ант эте. ¹⁰О есими он тюесин ва кёп тюрлю багъалы савгъатларын алыш, Месопотамияда Нагъор яшайгъан шагъаргъа ёлгъа тюше. ¹¹О шагъаргъа гелип, ону алдындагы къуюну ягъында тюелерин токъатгъанда, ахшам, шагъардагы кызылар сув алма чыгъагъан вакъти болгъан.

¹²Ибрагымни къулу булай дуа эте:

– Раббим, бийим Ибрагымни Аллагы! Бугун ишлерим тюзелсин да-гы, есим Ибрагымге рагьму эт дагы! ¹³Муна, мен гъали шагъардагы къызлар сув алма гелеген къуюну кырыйында токъатгъанман. ¹⁴Къызла-ны бирине: «Кажинингден сув ичме къой» – деп айтарман. Эгер де шо кызы: «Ич, мен тюелеринге де гелтирирмен сув», – деп айтса, шо къызыны къуллукъунг Исгъакъга танглагъанынг ачыкъ болажакъ. Сен есими рагьму этгенни белгиси шо болсун!

¹⁵О шо дуасын этип де битгинче, инбашында кажини де булан Ибра-гымни ииниси Нагъорну ва къатыны Милканы уланы Бетуелни къызы Ре-бека геле. ¹⁶О бек арив ва санына эргиши тийип де битмеген кызы бол-гъан. О къуюгъа багъып тюшүп йиберип, кажинин толтура. Къайтып ге-тип бара турагъанда, ¹⁷Ибрагымни къулу чабып ону ягъына барып:

– Кажинингден ичме магъа сув бер! – деп тилем.

¹⁸– Ич, бийим, – деп, кызы шоссагъат инбашындагы кажинин тюшю-рюп, Ибрагымни къулuna бере.

¹⁹О ичген сонг, кызы:

Буссагъат мен сени тюелеринге де сув гелтирирмен, олар да тойгъунча ичин, – дей.

²⁰Чалт сувнан гъайванлар ичеген ерге де тёгюп, къайтып къуюгъа багъып чабып гете. Шолай бары да тюелер тойгъунча сув ташып тура. ²¹Раббииз озююно ишлерин тюзелтгенине мекенли инанмакъ учун, къул сёйлемей къарап тура.

²² Тюелер сувдан тойгъан сонг, о кызыгъа бурнуна тагъагъан багъалы сыргъа ва авур тартагъан эки алтын билезик де бере. ²³ Сонг о:

— Кимни кызысын? Атангны уюнде гече къалмагъа ер табулармы? — деп сорай.

²⁴ — Мен Милканы да, Нагъорну уланы Бетуелни де кызыыман. ²⁵ Гъайванлар учун бизин кёп саламыбыз да, тирлигибиз де бар. Гече ятма ер де табулар, — деп жавап бере кызы.

²⁶ Шо заман Ибрагымни къулу Раббибизни алдында ерге къапланып ятып сужда эте ²⁷ ва булай дей:

— Бийим Ибрагымни Аллагы Раббибизге макътав болсун! О бийиме гъакъ герти кюйде рагымусун гёрсетди. Раббим мени тувра бийимни къардашларыны уюне гелтирип къойду!

²⁸ Ребека чабып уюнде, анасыны ягына гелип, гелген къонакъыны гъакъында айта. ²⁹⁻³⁰ Ребеканы эркъардаши Лабан къызардашында сыргъаны ва билезиклени гёргенде ва гелген адам ону булан нени гъакъында сёйлегенни билгенде, къуюгъа багъып алгъасай, Ибрагымни къулууну ягына багъып бара. О буса тюелери де булан къуюну къырыйында токътап тура болгъан. Лабан оғыар:

³¹ — Хошгелдинг, Раббибизни шабагъаты болгъан адам! Не этесен мунда эретуруп? Мен чи сагъа уйи гъазирлегенмен, тюелеринге де ер онгарғынман, — дей.

³² Ибрагымни къулу уйиге гире. Тюелени ерлерин чечип, олагъа салам да, тирлик де салалар, къонакъыга ва ону ёлдашларына буса аякъларын жувма деп сув бере. ³³ Ону алдына аш салына. Ибрагымни къулу буса буладай дей:

— Мени шунда неге йибергенни айтмай туруп, мен ашамажакъман.

— Айт, — деп жавап бере оғыар.

³⁴ О да хабарлама башлай:

— Мен Ибрагымни къулуман. ³⁵ Раббибиз бийиме аявсуздан шабагъатын гёрсетип къойду, ону кёп бай этди: оғыар къойлар, сыйырлар, гюмюш, алтын, къуллар, къаравашлар, тюелер, эшеклер берди. ³⁶ Бийимни

къатыны Сара къарт болуп турагъанда, огъар улан тапды. О бары да мюлкүн уланына берди.³⁷⁻³⁸ Бийим уланына ерли, гъананлы къызын алмажакъгъа, овзюню ватанына, къардашларыны янына барып, уланына къатын шондан гелтирежекте мени ант эттирди.³⁹ Мен бийиме: «Эгер къыз мени булан гелмес?» – деп сорадым.⁴⁰ О магъя: «Алдында бары яшавум ойтген Раббибиз Овзюню малайигин йиберип, уланыма мени халкъымдан, мени къардашларымдан къатын гелтиирсинг деп, сени ишлерингни тюзлежек», – деп айтды.⁴¹ Дагы да о: «Тек сен къардашларымны къырыйна барып, олар да сагъа къыз бермесе, сен антдан азат этилежексен», – деди.

⁴²⁻⁴³ Шолай бугюн къуюну ягына геле туруп, мен булагай дедим: «Раббим, бийим Ибрағымни Аллагы, эгер Сен ишлерим тюзелгенни сюе бусанг, муна мен гъали къуюну ягында токътап тураман. Шунда сув алма деп къыз гелгенде, мен огъар: „Кажинингден сув ичме къой“, – деп айтажакъман.⁴⁴ Эгер о: „Ич, мен тюелеринге де гелтиирмен сув“, – деп айтса, Раббибиз шо къызын бийимни уланына къатын этип танглагъаны ачыкъ болажакъ».

⁴⁵ Шону гъакъында дуа этип де битмеген эдим, къарайман, инбашында кажини де булан, къуюгъа багъып тюшюп йиберип, Ребека сув ала. Мен ондан сув тиледим.⁴⁶ О шоссагъат магъя кажинин берип: «Ич, мен тюелеринге де гелтиирмен сув», – деди. Мен ичдим, сонг о тюелеге де сув гелтириди.⁴⁷ Мен огъар: «Кимни къызысан?» – деп сорадым. О: «Милканы да, Нагъорну уланы Бетуелни де къызыман», – деп жавап берди. Шо заман мен огъар бурнуна тагъагъан сырғы да, билезиклер де бердим.

⁴⁸ Мен де Раббибизни алдында ерге къапланып ятып сужда этдим. Бийимни уланына ону къардаш тайпасындан къыз алмакъ учун мени тұвра шунда гелтиргени саялы, бийим Ибрағымни Аллагы болғын Раббибизге алғыш этдим.⁴⁹ Гъали сөз энни сизде: бийиме гъакъ герти күйде рагъмугъузну гёrsетме хыялтыгъызы бармы? Магъя жавап беригиз, не этме герегимни билейим.

⁵⁰ Лабан ва Бетуел булай жавап берелер:

— Бу иш Раббиизден экенни гёрюп турabyз, огъар къаршы не айтып болабыз дагъы биз? ⁵¹ Муна Ребека — ону оъзюнг булан алыш гет. Раббииз сюеген күйде, о сени бийингни уланыны къатыны болсун, — дей.

⁵² Шону эшитип, Ибрагымни къулу янгыдан Раббиизни алдында ерге къапланып ята. ⁵³ Сонг о Ребекагъа гийимлер, гюмюш ва алтын тагымчакъылар, ону эркъардашына ва анасына багъалы савгъатлар чыгъярып бере. ⁵⁴ Шондан сонг о ва ону ёлдашлары ашап, юхлама яталар. Эртенинде буса Ибрагымни къулу:

— Изну берсегиз, мен бийимни янына къайтар эдим, — дей.

⁵⁵ Ребеканы эркъардашы ва анасы:

— Бир он гюн сама турсун о бизин булан, сонг гетерсиз, — дей.

⁵⁶ Ибрагымни къулу:

— Токътматмагъыз мени. Мени ишлеримни Раббииз тюзлеген сонг, ма-гъя бийимни янына къайтма изну беригиз! — дей.

⁵⁷ — Къызыны чакъырайыкъ, оъзю не дейгенине тынглап къарайыкъ, — дей олар.

⁵⁸ Ребеканы чакъырып, огъар:

— Ну адам булан барамысан? — деп сорай.

— Бараман, — дей о.

⁵⁹ Шо заман олар, Ребека, ону эмчек анасы, Ибрагымни къулу ва ону ёлдашлары булан савболлаша туруп, ⁶⁰ Ребеканы булай деп шабакъатлайлар:

— Къызардашым, сени наслуларынг мингден де, он мингден де артыкъ болсун!

Сени авлетлерингни алдында душманланы къапулары дагъылып къалсын!

⁶¹ Ребека ва ону къаравашлары тюелеге де минип, Ибрагымни къулуну артына тюшелер. Олар Ребеканы да алыш гетелер.

⁶² Истъакъ буса Бегъер-Лагъай-Ройдан янгы къайтып, Негевде яшай болгъян. ⁶³ Ахшам о бир затланы гъакъында ойлашма деп авлакъыга

чыкъгъанда, ювукълашып гелеген тюелени кериванын гёре.⁶⁴ Ребека Иsgъакъны гёргенде, тюеден атылып тюшюп,⁶⁵ Ибрагымни къулuna:

– Бизге багъып гелеген адам кимдир? – деп сорай.

– О мени бийим, – деп жавап бере къул. Шонда Ребека шаршавну алыш ийберип, огъар чырмала.

⁶⁶ Шо заман къулу Иsgъакъга сапарыны гъакъында хабарлай.⁶⁷ Иsgъакъ Ребеканы анасы Сарадан къалгъан чатыргъа гийире ва Ребека ону къатыны болуп къала. Иsgъакъ Ребеканы сююп къала, сонг ону гечинген анасы булан байлавлу къайгъысы кемип турған.

Ибрагымни башгъа наслулаты

25 ¹Ибрагым янгыдан къатын ала. Кетура деген янгы къатыны² огъар Зимран, Йокъшан, Медан, Мадиан, Ишбакъ ва Шуагъ деген уланланы таба.³ Йокъшандан Шева ва Дедан тува. Деданны наслулаты – ашшурлар, летушлар ва леумлар.⁴ Мадианны уланлары: Эпа, Эпер, Гъаногъ, Абира ва Элдагъя. Булар бары да Кетураны наслусу.

⁵ Озюню бары да мюлкюн Ибрагым Иsgъакъга бере.⁶ Бириси къатынларындан болгъан уланларын буса Ибрагым озюню савунда, аявсуздан савгъатлар да берип, гюнтувш топурактълагъа багъып, Иsgъакъдан ариге чыгъарып ийбере.

Ибрагымни оылюмю

⁷ Ибрагым юз етмиш беш йыл яшай.⁸ О яшавдан тазза тоюп, шайлы къарт чагында гечине ва ата-бабаларыны ягъына гёче.⁹ Уланлары Иsgъакъ ва Исмайыл ону Согъарны уланы хетли Эпронну Мамренi ютугъунда ерлешген авлагындашы Магъпел анагында гёме.¹⁰ Ибрагым шо авлакъын хетлилерден сатып алгъан болгъан. Ибрагым ва Сара шонда гёмюлгенлер.¹¹ Ибрагым оылген сонг, Раббибиз ону уланы Иsgъакъны шабагъаттай. Иsgъакъ Бегъер-Лагъай-Ройну ютугъунда яшай болгъан.

Исмайылны наслулаты

¹² Муна Ибрагымни Сараны къаравашы мисрили Гъажардан тувгъан уланы Исмайылны ва ону наслулатыны гъакъындагъы хабар. ¹³ Исмайылны уланларыны атлары, уллусундан башлап: Невайот (Исмайылны биринчи уланы), Кедар, Адбеел, Мивсам, ¹⁴ Мишма, Дума, Масса, ¹⁵ Гъадад, Тема, Этур, Напиш ва Кедма. ¹⁶ Булар он эки къавумну он эки бийи болгъан Исмайылны уланлары. Оланы атлары юртлагъя ва къонушлагъя къоюлгъан. ¹⁷ Исмайыл юз отуз етти йыл яшай. О гечине ва ата-бабаларыны ягъына гёче. ¹⁸ Ону наслулаты Гъабиладан башлап Ашишургъя барагъан ёлдагъы Мисрини дазусундагъы Шургъя етгинче ерлешген. Олар агъа-ини-лери булан татывсуз яшай болгъанлар.

Исавну ва Якъубну туумакъылдыгъы

¹⁹ Муна Ибрагымни уланы Исгъакъыны ва ону наслулатыны гъакъындагъы хабар. Ибрагымден Исгъакъ деген улан тұва. ²⁰ Озынде къыркъ йыл бола-гъанда Исгъакъ Месопотамиядан арамейли Бетуелни кызызы ва арамейли Лабанны кызыардашы Ребеканы къатын этип ала. ²¹ Исгъакъ къатыны Ребека учун Раббибизге дуа эте, неге тюгюл ондан яш болмай болгъан. Раббибиз де ону дуасын къабул эте ва Ребека айлы бола. ²² Тек ону къарнындагъы уланлар бири-бири булан ябушма баштай. Дуа да этип, Ребека Раббибизге:

— Неге бола экен бу зат магъя? — деп сорай.

²³ Раббибиз оғыар бурай дей:

— Сени къурсагъынгда эки къавум бар,
къарнындан эки башгъя халкъ чыгъажакъ.
Оланы бириси бирисинден гючлю болуп чыгъажакъ,
уллусу гиччисине къуллукъ этежек.

²⁴ Чагъы етишип, эки эгиз тұва. ²⁵ Биринчисини устью кызылсув тюслиу ва гъайваннны гёнюдей тюкге батгъан болгъан. Оғыар Исав* деп къоялар. ²⁶ Ону

* 25:25 *Исав* — бу ат ягъуди тилдеги «тюклю» демекдир.

арты булан, Исаңнұ табанын да тутуп, бириси де чыгъя. Оғыар Яқыуб^{*} деп къоялар. Олар тувгъанда, Ислықъа алтыш йыл бола болгъан.

Исаң баш авлет болмагъын сатып къоя

²⁷ Уланъяшлар оьсeler. Исаң гүнерли гъавчу, авлакъланы адамы, Яқыуб буса юваш хасиятлы, уйй бавурлу бола. ²⁸ Буланы атасы Ислықъ къыр эчкини этин сюе болгъан, шо саялы да Исаңнұ артыкъ гёре болгъан. Анасы Ребека буса Яқыубгъа яхшы гёзден къарай болгъан.

²⁹ Бир керен Яқыуб шорпа этип турагъанда, Исаң гъавдан талып къайтып геле.

³⁰ – Магъа шу къызыл затдан ашама бер. Мен талгъанман! – дей о Яқыубгъа. (Шо саялы да оғыар Эдом^{**} деп ат тақъынлар).

³¹ – Сен магъа баш авлет болма ихтиярны бер, – дей Яқыуб.

³² – Баш авлет болмагъым магъа башгъа не бере? Оыле тураман чы, – дей Исаң.

³³ – Бириңчилей ант эт! – дей Яқыуб.

Исаң баш авлет болма ихтиярны Яқыубгъа беремен деп ант эте. ³⁴ Шо заман Яқыуб Исаңгъа экмек де, бурчакъ шорпа да бере. О ашап, ичиp, туруп гете. Баш авлет болма ихтиярны гъакъында буса ону бир гайы да болмай.

Ислықъ ва Авимелегъ

26 ¹Уылкеде алда, Ибраһимни заманларында йимик, ачлыкъ бола. Ислықъ Авимелегъ деген филистим пачаны ягъына Герар шагъаргъа багъып гете. ² Раббибиз Ислықъгъа гёрюнүп, булай дей:

– Мисриге барма, Мен сагъа гёrsетежек уылкеде яшап тур. ³ Шо уылке сени сыйындыражакъ, Мен буса сени булуп туражакъман ва сени

* 25:26 Яқыуб – бу атны айтылыши ягъуди тилдеги «табан» деген сөзни айтылышина ошашил геле.

** 25:30 Эдом – бу ат ягъуди тилдеги «къызыл» демекдир.

шабагъатлажакъман. Сени атанг Ибрагымге берген антымны күтежекмен: Мен шо бары да топуракъланы сагъа ва сени наслуларынга бережекмен.⁴ Мен сагъа кёкдеги юлдузланы санаву чакъы кёп наслулар бережекмен. Олагъа бары да шу топуракъланы бережекмен. Сени наслуларынгдан таба дюнъяны бары да халкъларына шабагъат этилежек.⁵ Ибрагым Магъа таби болгъаны, бары да буйруқъларымны, уйретивлеримни күтгени саялы, Мен олагъа шабагъат этежекмен.

⁶ Шо саялы Исгъакъ Герарда ерлеше. ⁷ Мунда яшайгъанлар оғыар Ребеканы гъакъында сорагъанда, о: «Бу мени къызардашым», – деп жавап берип къоя. Исгъакъ: «О мени къатыным», – деп айтма къоркъя, неге тюгюл де ондагъы эргишилер бек арив Ребеканы алмакъ учун, оyzюн оылтурер деп ойлаша. ⁸ Заман гетип тура. Бир керен филистим пачасы Авимелегь тере- зеден таба Исгъакъ Ребеканы къучакълап айланагъанын гёрюп къоя. ⁹ Исгъакъны оyzюню ягъына чакъырып:

– О чу сени къатынынг экен?! Къызардашым деп неге айтдынг? – деп сорай.

– О саялы мени оылтурюп къояр деп къоркъя эдим, – деп жавап бере Исгъакъ.

¹⁰ – Недир сен бизге этегенинг? Арабыздан ким буса да бирев сени къатынынга ювукълукъ этип къойгъан буса, уystюбюзге чи бек уллу гюнаға тюшер эди! – дей Авимелегь.

¹¹ Авимелегь бары да халкъына:

– Ким бу адамгъа яда муну къатынына тийсе, о оылюмге тарыла- жакъ, – деп билдире.

¹² Шо уылкеде де ерлешип, Исгъакъ ашлыкъ чачма башлай. Ону гели- ми юз керен артыкъ бола, неге тюгюл Раббибиз ону шабагъатлай болгъян. ¹³ Ону байлыгъы артып тербей ва о бек бай адам болуп токътай.

¹⁴ Ону къой сиривлери, сыйыр туварлары ва кёп къуллукъчулары бола. Филистимлилер оғыар гюнчюлюк этме башлай. ¹⁵ Олар Ибрагымни заманында Ибрагымни къуллары къазгъан къюлларын топуракъ тёгюп толтуралар.

¹⁶ Авимелегъ де Иsgъакъя:

— Бизин кырыыйбыздан тайып, ари гет, неге тюгюл де сен бизден эсек хйлы гючлю болуп токътадынг, — дей.

¹⁷ Иsgъакъ да шо ерден тайып, ари гете. О Герар къолда чатыр къуруп орунлаша ва шонда ерлеше. ¹⁸ Онда о Ибрагымни заманында къазылып, о гечинген сонг буса филистимлилер топуракъ булан басдырып къойгъан къюланы янгыдан къазып ачма баштай. Шо къюлагъя о Ибрагым бир вакътилерде берген атларын къайтара.

¹⁹ Бир керен къолда Иsgъакъны къуллары къазып булакъ чыгъара.

²⁰ Тек герарлы къойчулар Иsgъакъны къойчулары булан: «Шо сув биzinки!», — деп эришме баштайлар. Шо саялы Иsgъакъ бу къуюгъя Эсек* деп ат тагъя, неге тюгюл де олар ону булан эрише болгъанлар. ²¹ Башгъя къую къазалар, тек шону устьюнден де эришивлюк бола. Шо саялы огъар Ситна** деп ат тагъалар. ²² Шо заман Иsgъакъ, дагъы да арекге гетип, бирдагъы къую къаза. Шону устьюнден буса эришивлюк болмай. Шо къуюгъя Иsgъакъ Регъобот*** деп ат тагъя. Шо «Биз шу топуракъда артсын деп, Раббибиз ахырда да бизге эркин топуракъ берди» деген затны англата болгъан.

²³ Сонг Иsgъакъ Бер-Шебагъя къайта. ²⁴ Онда тап биринчи гечесинде огъар Раббибиз гёрюне.

— Мен сени атанг Ибрагымни Аллагыман. Къоркъма, Мен сени буланман. Мен сени шабагъатлажакъман, сени наслунгну артдыражакъман. Мен шону къулум Ибрагым саялы этежекмен, — дей О. ²⁵ Иsgъакъ шо ерде къурбанлыкъны салагъан ер къуруп ва Аллагыны атын тутуп сйлей. Шонда чатырларын къура ва къуллары къую къазма баштайлар.

²⁶ Шо заман Герардан Авимелегъ вазири Агъузат ва астербашы Пигъол булан Иsgъакъны ягына геле.

* ^{26:20} Эсек — бу ат ягъуди тилдеги «оъчешив» яда «эришивлюк» демекдир.

** ^{26:21} Ситна — бу ат ягъуди тилдеги «душманлыкъ» демекдир.

*** ^{26:22} Регъобот — бу ат ягъуди тилдеги «душманлыкъ» демекдир.

²⁷ – Неге гелдигиз мени ягыма? Сиз чи мени сюймейген болуп, къувалап йиберген эдигиз! – деп сорай Иsgъакъ.

²⁸ – Раббибиз сени булан экенни биз гёрюп турабыз, шо саялы да биzin ант байлагынан сюебиз. Разилешив бегетейик! ²⁹ Сен бизге яманлыкъ этмежекмен деп ант эт: биз де сагъа яманлыкъ этмедиц чи, яхшылыкъ этдик, сени парахат гетме къойдуқъ. Гъали Аллагъ сени шабагъатлағынан англашылды, – дей олар.

³⁰ Иsgъакъ олар учун уллу къонакълыкъ эте. Олар ашайлар, ичелер. ³¹ Эртенине олар бир-бирине ант этелер. Иsgъакъ оланы йибере, олар да ону ягындан парахатлыкъ булан гете.

³² Иsgъакъны янына гелип, оғъар сув тапгъанын билдирилер. ³³ Иsgъакъ шо къуюгъа Шеба* деп ат тагъя. (Шагъарны аты бугюнлеге ерлиде Бер-Шеба.)

³⁴ Оъзюне къыркъ йыл болагъанда, Исав хетли Беерни къызы Егъудитни ва хетли Элонну къызы Басематны къатынлар этип ала. ³⁵ Иsgъакъга ва Ребекагъа оланы экевиу де булан яшама къыйын бола.

Иsgъакъ Якъубын шабагъаттай

27 ¹ Бир керен къарт болгъан, гёзлери гёrmейген Иsgъакъ ягына уллу уланын чакъыра.

– Уланым! – дей о Исавгъя.

– Вай, атам! – деп жавап бере о.

² – Мен гъали къарт болгъанман, магъа яшама нечакъы къалгъанны да билмеймен, – дей Иsgъакъ.

³ Жаянгны да, окъларынгны да алып, авлакъы къыр эчкиге гъавгъа барып гел. ⁴ Гелтиргенде, мен сюеген күйде татывлу этип аш биширерсен. Мен де ашап, оълюмомден алда сени шабагъатлажакъман.

⁵ Ребека буса оланы лакъырына тынглап тура болгъан. Исав къыр эчкигеге деп гетгенде, ⁶ о Якъубгъа бурай дей:

* ^{26:33} Шеба – бу ат ягъуди тилдеги «антлар» яда «етти» демекдир.

— Мен сени атанг Исавгъя къыр эчки гелтирип,⁷ ондан татывлу аш этмеге буюргъанны эшитдим. Атанг ашажакъ, сонг буса оълюмюнден алда Раббибизни алдында Исавну шабагъатлажакъ.⁸ Гъали тынгла чы, уланым, мен айтагъанны эт.⁹ Сиривге барып, эки улакъ айырып гел. Мен оланы атанг сюеген күйде татывлу этип биширермен,¹⁰ сен буса огъар алып баарсан. О ашап, оълюмюнден алда сени шабагъатлажакъ.

¹¹ — Агъам Исавну къаркъаrasы тюкге батгъан, мени буса гёнюм таза.
¹² Атам магъя тийип йиберсе? Эгер де о мен оъзюн алдатагъанны англаса, мени шабагъат тюгюл, налат къаравуллай, — дей Якъуб.

¹³ — Шо налат магъя болуп къалсын, уланым. Сен мен айтагъанны эт. Бар, алып гел, дей анасы.

¹⁴ Якъуб улакъланы гелтире. Ребека оланы Истъакъ сюеген күйде татывлу этип биширип онгара.¹⁵ Сонг о уллу уланы Исавну уйде бар инг яхши опуракъларын алып, оланы гиччиси уланы Якъубгъя гайдире.
¹⁶ Якъубну къолларына ва тюксуз бойнуна о улакъланы терилерин байлай.¹⁷ Сонг огъар этни ва экмекни бере.

¹⁸ Якъуб атасыны ягына гирип:

— Атам! — дей.

— Вай, уланым! Сен къайсисан? — деп жавап бере Истъакъ.

¹⁹ — Мен биринчи уланынг Исавман. Мен бары да затны сен айтагъан күйде этдим. Бираз ётерилип олтур, къыр эчкиден аша, сонг магъя шабагъатынгны бер, — деп жавап бере Якъуб.

²⁰ — Уланым, къыр эчкини бурай нечик тез тутуп болдунг? — деп сорай Истъакъ.

— Раббибиз, Сени Аллагынг, мени ишимни тюзелтди, — деп жавап бере Якъуб.

²¹ — Юувукъ гел, уланым. Гел, мен сагъя тийип къарайым чы, гертилей де, Исавму экенсен? — дей Истъакъ.

²² Якъуб атасыны ягына геле, атасы огъар тийип къарап:

— Тавушу Якъубнуки, къоллар буса Исавнуки, — дей.

²³ Якъубну къоллары да Исавну къоллары йимик тюкге батгъан саялы, Иsgъакъ ону танымай ва ону шабагъатлай.

— Сен мени уланым Исавсан дагы? — деп сорай о Якъубгъа.

— Дюрмен, атам, — деп гертилей о.

²⁵ Шо заман Иsgъакъ:

— Бер, кыр эчкини этинден ашайым, уланым, сени шабагъатларман, — дей.

Якъуб атасына аш да, чагыр да узата. Ашап-ичип битгенде, ²⁶ Иsgъакъ:

— Ювукъ гел, уланым, оьп мени, — дей.

²⁷ Якъуб, ювукъ гелип, атасын оьбе. Ону опуракъларыны ийисин сезип, Иsgъакъ Якъубну шулай сёзлер айттып шабагъатлай:

— Мени уланымны ийиси Рabbим шабагъатлагъан авлакъланы ийисидир.

²⁸ Аллагъ сагъа кёкдеги янгурдан, ерни берекетинден таба тюшюмню, ашлыкъыны, чагырны ниъматын берсин.

²⁹ Халкълар сагъа күллукъ этсин, къавумлар алдынгда баш ийсин.

Агъа-инилерингни арасында оланы бийи болажакъсан, анангны уланлары сени алдынгда баш иежеклер.

Сени налаттайгъангъа оъзюне налат болсун, сени шабагъаттайгъангъа оъзюне шабагъат болсун!

³⁰ — Иsgъакъ Якъубну шабагъатлап, уланы атасыны ягындан чыкъ-гъандокъ, гъавдан къайтып Исав геле. ³¹ О да татывлу этип аш биширип, атасына гелтирип:

— Атам! Бираз гётерил, мен гелтирген кыр эчкини этинден аша, мени шабагъатла! — дей.

³² — Сен кимсен? — деп сорай Иsgъакъ.

— Мен сени уланынгман, биринчи уланынгман, Исавман, — дей о.

³³ Иsgъакъ бек гъалек болуп:

— Сен гелгинче, кыр эчкини этин де табып, мени ашатгъан ким эди дагы?

Мен чи ону шабагъатладым, гъали энни шабагъат оғъар болажакъ чы! — дей.

³⁴ Шо сёзлени эшитип, Исау гючлю аччы тавуш этип къычырып йибере. Сонг атасына:

— Мени де шабагъатла, атам! — деп тилей.

³⁵ — Ининг мени ягъыма гелип, сагъа берилме герекли шабагъатны гылла булан алып токтады, — дей Исьякъ.

³⁶ — Негъакъ тюгюл огъар Якъуб деп къойгъаны, о менден алдынлыкъ этегени бу экинчи керен! Башлап о мени биринчи болма ихтиярымны алды, гъали буса мени шабагъатымны да алды! Магъа гъеч бир шабагъат да къалмагъанмы экен дагъы? — дей Исау.

³⁷ — Мен ону сени бийинг этдим, бары да агъа-инилерин огъар күуллар этдим, огъар ашлыкъыны да, чагъырны да бердим. Сени учун не этип боламан дагъы, уланым? — дей Исьякъ.

³⁸ — Атам, сени биргине-бир шабагъатынг тюгюл ёкъту эди дагъы? Мени де шабагъатла, атам! — деп, Исау йылап йибере.

³⁹ Исьякъ буса огъар бурай дей:

— Сени яшавунг ерни берекетинден, кёкдеги янгурдан йыракъда болажакъ. ⁴⁰ Сен къылышынг булан яшап туражакъсан, ининге къуллукъ этежексен. Тек шолай бир заман гележек — сен къарышлыкъ билдирип, бойнундагъы боюнсангны алып атажакъсан.

Якъуб Лабанны ягъына багъып къача

⁴¹ Атасыны шабагъатын алгъаны саялы, Исау Якъубгъа ойчлю бола.

— Узакъ къалмай мени атам гечинежек, биз де ону артындан къайгыра туруп къалажакъбыз. Сонг буса мен иним Якъубну оылтурежекмен, — деп ойлаша Исау.

⁴² Амма Ребекагъа уллу уланыны хыяллары гъакъында етишдирелер. О гиччиси уланы Якъубну ягъына чакъырып, огъар:

— Агъанг Исау сени оылтурме айлана. ⁴³ Уланым, мени сёзлериме тынгла: эркъардашым Лабанны ягъына, Гъаррангъа багъып къача.

⁴⁴⁻⁴⁵ Инингни къазапланызыу басылгъынча, сагъа бакъгъан якъдагъы ачуу тайгъынча, о сен ойзюне этген затны унутгъунча, онда яшап турарсан.

Сонг буса мен, артынгдан йиберип, сени гелтиермен. Ёғесе, мен бирче экевню тас этежек гюн гелип къалажакъ! – дей

⁴⁶ Ребека Истъакъы:

– Шу хетли тиштайпалар саялы яшавдан гёнгюм чыгъып турға. Эгер Якъуб да шулар йимик, ерли, хетли къызыны къатын этип алса, магъа шолай яшав негердир? – дей.

28

¹Истъакъ Якъубну чакъыра, ону шабагъатлап, булай буйрукъ эте:

– Гъананлы къызланы къатын этип алма. ²Месопотамиягъа, анангны атасы Бетуелни ягъына бар. Оъзунге къатын этип анангны эркъардашы Лабанны къызларындан бириң ал. ³Аллагъ сени наслунгну артдырысын ва сагъа көп санавда наслулар берсинг дагъы! Бир хыйлы халкъылар сенден таба болсун дагъы! ⁴Ибрагымге берген шабагъатын О сагъа да, сени наслуларынга да берсинг дагъы. Сен де Аллагъ Ибрагым-ге берген, сени гелгинчи болуп яшап турагъан топуракъы ес болуп токътажакъсан!

⁵Истъакъ уланын йибере, о да Месопотамиягъа, арамейли Бетуелни уланы Лабанны ягъына гете. Лабан Якъубну ва Исавну анасы Ребеканы эркъардашы болғын. ⁶Исав Истъакъ Якъубну шабагъатлагъаны, ону къатын алмакъ учун Месопотамиягъа йибергенни, атасы оғыар шабагъаты булан бирче гъананлы къызланы алма деп буварғаны, ⁷о да, ата-анасыны айтгъанын этип, Месопотамиягъа гетгенни биле. ⁸Шо заман Исав атасы гъананлы къызланы къабул этмейгенни англай. ⁹О Исмайылны ягъына барып, оъзуне бирдагы бир къатын этип Ибрагым-ни уланы Исмайылны къызы, Невайотну къызардашы Магъалат деген къызыны ала.

Якъуб Бет-Элде тюштөрү

¹⁰Шо вакътиде буса Бер-Шебадан чыгъып, Якъуб Гъаррангъа багъып ёл чыгъя. ¹¹О бир ерге етише туруп, гече бола. Шонда токътап, башыны тюбюне таш да салып, юхлама ята. ¹²Тюшонде о ерни де, кёкнү де

къошагъан батгычны гёре. Шо батгычдан Аллагыны малайиклери ми-
нип-тюшюп турғанлар. ¹³ Раббибиз Якъубну къырыйында токъ-
тап, оғыар булай дей:

— Мен Раббимен, атанг Ибрагымни, Иsgъакъыны Аллагыман. Шу
сен ятып турагъан топуракъын Мен сагъа ва сени наслулатынга бере-
жекмен. ¹⁴ Сени наслулатынг къайыр бүртюклер чакъы кёп бола-
жакъ. Олар гюнбатышгъа ва гюнтувшгъа, темиркъазыкъгъа ва къыбл-
лагъа багъып яйылажакълар. Сенден ва сени наслулатынгдан таба
дюньяны бары да халкъларына шабагъат этилежек. ¹⁵ Мен дайм сени
булан болуп туражакъман. Сен къайда барсанг да, Мен сени къоруп
сакълап туражакъман. Сени бу уылкеге къайтарып гелтирежекмен.
Мен сени къоюп къоймажакъман, ваъда этген бары да затымны
яшавгъа чыгъаражакъман.

¹⁶ Якъуб уянып йиберип:

— Гертиден де, шу ерде Раббибиз бар экен! Мен буса шону билмей тур-
гынман, — дей.

¹⁷ О къоркъуп, булай дей:

— Не къоркъунчлу ер экен бу ер! Бу чу Аллагыны ую, кёклени къапу-
лары!

¹⁸ Эртенине Якъуб оъзю башлыкъ этип ятгъан ташны ала, ону сыйлы
таш йимик эретургъузуп салып, уystюне зайдун май тёге. ¹⁹ Шо ерге о
Бет-Эл* деп ат тағъа. Шондан алда буса бу шагъарны аты Луз болгъан.

²⁰ Якъуб булай ант эте:

— Эгер де Аллаг мени яқылай туруп, магъа аш да, опуракъ да берип,
мени булан ёлда болуп турса, ²¹ мен де парахат күйде атамны уюнене
къайтсам, Рабби мени Аллагым болажакъ. ²² Мен салгъан сыйлы таш
Аллагыгъа сужда этеген ер болуп токътажакъ, Сен берген бары да затдан
он пайдан бир пайын Сагъа берип туражакъман.

* ^{28:19} *Бет-Эл* — бу ат ягъуди тилдеги «Аллагыны ую» демекдир.

Якъуб Месопотамияғъа етише

29 ¹Якъуб ёлун узата ва гюнтувш халкъланы топурагына етише. ²О авлакъда къую ва ону ягында убъ къой сирив гёре. Шо къюдан сиривлени ичире болгъанлар, амма къуюну устью уллу таш салынып ябылгъан болгъан. ³Бары да сиривлер жыйылгъанда, къойчулар шо ташны йылышдырып, къойлагъа сув ичирип, сонг къайтарып къуюну башын яба болгъанлар.

⁴ – Сиз къайдансыз, къардашлар? – деп сорай Якъуб къойчулагъя.

– Гъарранданбыз, – деп жавап бере олар.

⁵ – Нагъорну уланыны уланы Лабанны таныймысыз? – деп сорай Якъуб.

– Таныйбыз, – деп жавап бере олар.

⁶ – Нечикдир ону күйлери? – деп сорай Якъуб.

– Яман тюгюл, яхши. Гъона, ону къызы Рагыил де сиривлери де булан геле тура, – деп жавап бере олар.

⁷ – Гюн артгынча гъали де узакъ заман бар, сиривлени жыйима заман болмагъан. Сиривлени де ичирип, оланы отлавлукъга гъайдагызы, – дей Якъуб къойчулагъя.

⁸ – Бары да сиривлер жыйылмай туруп болмайбыз. Шо заман къюдан ташны йылышдыражакъ, биз де къойланы ичирежекбиз, – деп жавап бере олар.

⁹ Булар сёйлеп турагъанда, Рагыил атасыны сиривлерине ювукълаша. О къойчу къызы болгъан. ¹⁰Сиривлери де булан ону гелегенин гёрюп, Якъуб къуюгъа барып йиберип, ташны йылышдыра ва сиривлени ичире. ¹¹Сонг о Рагыилни де ойбюп, къычырып йылап йибере. ¹²Къызгъа ойзю ону атасыны къызардашы Ребеканы уланы экенни айттып бере. Чабып барып, Рагыил бу хабарны атасына айта.

¹³ Оызлеге къызардашыны уланы Якъуб гелегенни эшитип, Лабан къонакъыны алдына чабып чыгъа, ону къучакъылап, ойбюп, уюне элте. Якъуб огъар ойзюню гъакъында хабарлай. ¹⁴Лабан буса:

– Гертилей де, сен мени къардашымсан, къаным-жанымсан! – дей. Якъуб Лабанны уюнде яшайгъанлы бир ай ойте.

Якъуб Лияны ва Рагыилни къатынлар этип ала

¹⁵ Сонг Лабан огъар:

— Мени квардашым болгъан сонг, магъа гъавайын ишлеп туармысан дагъы? Нечик гъакъ тёлелегенимни сюегенингни айт? — дей.

¹⁶ Лабанны эки кызы болгъан, уллусуну аты Лия, гиччисиники Рагыил болгъан. ¹⁷ Лияны къуймур* гёзлери болгъан, Рагыилни буса бети де, бою-сою да исбайы болгъан. ¹⁸ Якъуб Рагыилни сююп къала ва Лабангъя:

— Сен магъа гиччи кызынгы Рагыилни къатын этип бережекге мен сағыа етти йыл ишлежекмен, — дей.

¹⁹ — Яхши. Ят адамгъа эрге баргынча, сагъа барсын. Яша бизде, — дей Лабан. ²⁰ Рагыил саялы Якъуб огъар етти йыл ишлей, тек шо етти йыл огъар бир нече гюн йимик гёрюне — шонча да бек сюе болгъан ону.

²¹ Артда да о Лабангъя:

— Магъа Рагыилни къатын этип бер. Болжал етишди, гъали энни огъар менини болма заман болду, — дей.

²² Шо заман бары да хоншууларын да чакъырып, Лабан той эте. ²³ Къаш-къаралгъанда, о Якъубну кырыйына Рагыилни орнуна Лияны гелтирип къоя. Якъуб да ону булан ювукълукъ эте. ²⁴(Лабан Лиягъя къуллукъчу этип овзюню къаравашы Зилпаны бере.) ²⁵ Эртен болгъанда, Якъуб къарай — алдында Лия!

— Недир сен магъа этгенинг? Рагыил саялы тюгюлмю эди мен сагъа ишлекеним? Сен мени неге алдатдынг? — дей Якъуб Лабангъя.

²⁶ — Бизин якъларда уллу кызын къюоп, гиччисин береген адат ёкъ.

²⁷ Муна шу тойну жумасы битсин, биз сагъа гиччисин де бережекбиз. Тек шо саялы сен магъа дагъы да етти йыл ишлеккесен, — деп жавап бере Лабан.

²⁸ Якъуб рази болуп къала. Той жумасы битген сонг, Лабан огъар гиччи кызы Рагыилни бере. ²⁹(Лабан Рагыилге къуллукъчу этип овзюню

* ^{29:17} «Къуймур» деп таржума этилген сёзню маңнасын ягъуди тилде мекенли токъташдырмак кыыйын

къаравашы Валланы бере.)³⁰ Якъуб Рагыил булан ювукълукъ эте. Ону Лиядан кёп сюе. Рагыил саялы о Лабангъя дагъы да етти йыл ишлей.

Якъубуну авлетлери

³¹ Якъуб Лияны сюймейгенни гёрюп, Раббииз ону яш табып болагъан эте. Рагыил буса яш табып болмай.³² Айлы болуп, Лия яш таба ва огъар Рубим* деп къоя.

— Раббим мени къайгымны гёрдю. Гъали энни чи эрим мени сюежек, — дей Лия.

³³ Сонг къайтып айлы болуп, бирдагъы улан таба.

— Эрим мени сюймейгенни Раббим эшиитди, магъя бирдагъы улан берди! — дей о. Уланына о Симон** деп къоя.

³⁴ Сонг къайтып айлы болуп, дагъы да улан таба.

— Гъали энни чи эрим магъя исинежек. Мен огъар учь улан тапдым чы! — дей о. Уланына о Левий*** деп къоя.

³⁵ Бирдагъы керен айлы бола ва къайтып улан таба.

— Гъали Раббиме макътавлар этейим! — дей о ва уланына Ягъуда**** деп къоя. Шондан сонг о бир гесекге яш тапмайған болуп къала.

30 ¹Рагыил буса Якъубгъя яш табып болмайғанын гёрюп, кызыардашын гюллеп турға.

— Магъя яш бер, ёгъесе мен ойлежекмен! — дей о Якъубгъя.

* 29:32 *Рубим* — бу атны айтылышы ягъуди тилдеги «ол мени къайгымны гёрдю» деген сөзлени айтылышына ошашлы геле.

** 29:33 *Симон* — бу атны айтылышы ягъуди тилдеги «эшиитди» деген сөзню айтылышына ошашлы геле.

*** 29:34 *Левий* — бу атны айтылышы ягъуди тилдеги «къошуулған» деген сөзню айтылышына ошашлы геле.

**** 29:35 *Ягъуда* — бу атны айтылышы ягъуди тилдеги «макътамакъ» деген сөзню айтылышына ошашлы геле.

² Якъуб буса ачувланып, огъар:

— Не эте, мен сагъя авлет бермейген Аллагы болуп къалгъанманмы? — деп жавап бере.

³ — Муна мени къаравашым Валла. Шону булан яшап тур, о магъя къу-
чагъыма тутуп болардай яш тапсын. Шолайлыхъда мени оъзюмню яшла-
рым болар! — дей Рагыил.

⁴ Рагыил эрине къатын этип къаравашы Валланы бере. Якъуб ону булан
иовукъулыкъ эте. ⁵ О да айлы болуп, огъар улан таба.

⁶ — Аллагы магъя рагьму этди. О мени тилевюмню къабул этип, магъя
улан берди — дей Рагыил. Улангъя о Дан* деп къоя.

⁷ Валла къайтып айлы бола ва Якъубгъя бирдагы улан таба.

⁸ — Мен къызардашым булан къаныгъып ябушдум, амма мен оър чыкъ-
дым, — дей Рагыил. Улангъя о Непталим** деп къоя.

⁹ Шо заман Лия оъзюнден дагъы яш болмас деп ойлашып, Якъубгъя
къатын этип къаравашы Зилпаны бере. ¹⁰ Зилпа Якъубгъя улан таба.

¹¹ — Ишим тюзелди! — дей Лия. Улангъя Гат*** деп къоя.

¹² Зилпа Якъубгъя экинчи уланын таба.

¹³ — Не наисиплимен дагъы мен! Гъали энни къатынлар магъя наисипли
деп туражакълар, — дей Лия. Улангъя Ашир деп къоя.

¹⁴ Бир керен, оракъны заманында, Рубим авлакъда адамот таба ва ана-
сы Лиягъя гелтире. Рагыил Лиягъя:

— Уланынг тапгъан адамотну магъя бер, — дей.

¹⁵ — Эримни чыгъарып алгъанынг азмы? Гъали уланым табып гелген
адамотну да алма сюемисен? — дей Лия.

* 30:6 *Дан* — бу атны айтылышы ягъуди тилдеги «ол дуван этди» деген сёзню айты-
лышина ошаалы геле.

** 30:8 *Непталим* — бу атны айтылышы ягъуди тилдеги «мени ябушувум» деген сёз-
лени айтылышына ошаалы геле.

*** 30:11 *Гат* — бу атны айтылышы ягъуди тилдеги «үстүстөнлюк» деген сёзню айты-
лышина ошаалы геле.

– Шо адамотну орнуна бу гече Якъуб сени булан ятсын, – дей Рагыил.

¹⁶ Шолай, ахшам Якъуб уйге къайтгъанда, Лия ону алдына чыгъып, огъар:

– Мени яныма гел. Мен сени къызардашымдан уланым тапгъан адам-отну орнуна алдым, – дей. Шо гече Якъуб Лия булан ята.

¹⁷ Раббивиз де Лияны тилевюн къабул эте: о къайтып айлы бола ва Якъубгъа бешинчи уланын таба.

¹⁸ – Муну Аллагы магъя эриме къаравашымны берген саялыш савгъат этип берди, – дей Лия. Уланына о Иссагъар* деп къоя.

¹⁹ Лия къайтып айлы бола ва Якъубгъа алтынчы уланын таба.

²⁰ – Аллагы магъя тизив савгъат берди! Гъали энни чи абурулажакъ эрим мени, мен огъар алты улан тапдым чы дагъы! – дей о. Уланына о Завулун** деп къоя. ²¹ Сонг Лия къызы таба ва огъар Дина деп къоя.

²² Аллагы Рагыилни де унутмай, тилевюн къабул этип, ону яш табып болагъан эте. ²³ Рагыил айлы болуп, улан таба.

– Аллагы мени авлетсиз къоймай, биябурлукъдан къутгъарды, – дей о.

²⁴ Уланына Юсуп*** деп къоя ва:

– Раббим магъя бирдагъы бир улан берсин дагъы! – деп тилей.

Якъубнү Лабан булангъы разилешивю

²⁵ Юсуп тувгъан сонг, Якъуб Лабангъа булай дей:

– Магъя уюме, ватаныма, къайтма изну бер. ²⁶ Оъзлер учун мен сагъа къуллукъ этген яшларымны да, къатынларымны да бер магъя. Мен сагъа яхши къуллукъ этгенимни билесен!

* ^{30:18} *Иссагъар* – бу атны айтылышы ягъуди тилдеги «савгъатлав» деген сөзню айтылышына ошаалы геле.

** ^{30:20} *Завулун* – бу атны айтылышы ягъуди тилдеги «макътав» яда «гьюрмет» деген сөзлени айтылышына ошаалы геле.

*** ^{30:24} *Юсуп* – бу атны айтылышы ягъуди тилдеги «къошсун» деген сөзню айтылышына ошаалы геле.

²⁷ – Тынгла магъя, ярай буса! Сени яхшылыгъынгдан Раббибиз мени шабагъатлады деген пал тюз чыкъгъанын билдим. ²⁸ Айт чы, сен нечик гъакъ тёлөгенимни сюесен? – дей огъар Лабан.

²⁹ – Мен саяга нечик яхши къуллукъ этгенин, мени яхшылыгъымдан сиривлеринг нечакъы артып гетгенни оызунг билесен. ³⁰ Мен гелгенде, гъайван-малынг кёп тюгюл эди, гъали, гёресен, нечакъы бар! Мен гелгенде, Раббибиз сени шолай шабагъатлады! Тек оызюмню ожагыма къачан ишлеме башлайым мен? – деп жавап бере Якъуб.

³¹ – Айт чы, нечик гъакъ бергенимни сюесен сен? – деп сорай Лабан.

– Сенден магъя бир зат да тарыкъ тюгюл. Эгер де магъя мен айтагъаны этсенг, сиривлерингни дагы да отлатып, сакълап туражакъман. ³² Гел, бугюн сиривлерингни айланып чыгъайыкъ. Мен сиривлерингден бары да увакъ, уллу дамгъалы, къара къойланы да, шолай да увакъ, уллу дамгъалы эчкилени де айырайым. Энниден сонг шолай къойлар, эчкiler сени магъя береген гъагынг болуп токътар. ³³ Мени гъалаллыгъымны тергеме саяга тынч болажакъ: энниден сонг, эгер де сен гъакъ гъисапда мен не алгъян деп къарама гелип, менде увакъ, уллу дамгъасы ёкъ эчкини яда къара тюгюл къойну тапсанг, шоланы мен урлагъангъа гъисап этип къоярсан, – деп жавап бере Якъуб.

³⁴ – Яхши, сёйлешдик. Сен айтагъан күйде болсун, – дей Лабан.

³⁵ Амма шо гюнденокъ Лабан бары да ала-къула, дамгъалы эркечлени де, увакъ, уллу дамгъалы (акъ къашгъалары булангъы) эчкилени де, бары да къара къойланы да айырып, оланы уланларына бере. ³⁶ Олар да Якъубдан юрюп учь гюнден етеген ерге гетелер. Якъуб Лабанны къалгъан сиривлерин багъып тура.

³⁷ О тал, бадам, уьрге тереклени яш бутакъларын алыш, оланы къабу-гъун гызыз-гызыз этип ёна. ³⁸ Сув ичме гелгенде, эчкiler, къойлар ёнулгъан бутакълагъа къарасын деп, шоланы олар сув ичеген ерге сала. Олар буса сув ичеген вакътисинде атылта болгъанлар. ³⁹ Атылтагъан вакътисинде эчкiler гызыз-гызыз этилип ёнулгъан бутакълагъа къарайгъан саялы, оланы улакълары, къозулары ала-къула, увакъ ва уллу дамгъалы болуп тувалар.

⁴⁰ Къойланы буса Якъуб айры сакълай, оланы Лабанны сиривлериндеги ала-къула ва къара къойларына къарап турардай буруп сала. Энни Якъуб-ну оъзюню сиривлери бола, оланы о Лабанны сиривлеринден айры сакълай. ⁴¹ Къойланы инг тизивлери атылтагъан вакътисинде Якъуб сув ичеген ерге, къойлар шо чубукъланы ягъында атылтсын деп, бутакъланы оланы гёз алдына сала. ⁴² Къойланы осал тайпасы атылтагъанда буса, о бутакъланы салмай. Шолайлықъда, осал къойлар Лабангъя тюше, тизив къойлар буса Якъубгъя тюше. ⁴³ Якъуб мекенли бай болуп токътай. Ону къой ва эчки сиривлери, къуллары ва къаравашлары, тюелери ва эшекле-ри бола.

Якъуб Лабандан къача

31 ¹ Якъубгъя Лабанны уланлары оъзюню гъакъында булагай сёйлейгени белгили бола: «Якъуб атабызын бары байлыгъын чыгъарып алыш токътады! Оъзюню бары да байлыгъын о бизин атабыз себепли болуп жыйиды!» ² Лабан оъзюне алда йимик янашмайгъанны Якъуб оъзю де эслей. ³ Шо заман Раббибиз де Якъубгъя:

— Ватанынга, къардашларынгны ягъына къайт. Мен сени булан болуп туражакъман, — дей.

⁴ Рагыл де, Лия да оъзюнию сиривлерин отлатагъан авлакъгъа чыкъысын дед айтып, Якъуб оланы артындан ийбере. ⁵ Якъуб олагъа булагай дей:

— Мен къарайман, сизин атагъыз магъя алда йимик янашмай. Амма атамны Аллагы дайм мени булан болуп тура. ⁶ Мен сизин атагъызгъа арымай-талмай ишлегенимни оъзюгюз билесиз. ⁷ Атагъыз буса мени ал-дата эди, сёйлешинген гъакъыны оылчевион гъар заман алышдырып тура эди. Янгыз Аллагы ону магъя зарал гелтирме къоймады. ⁸ Эгер атагъыз магъя: «Бары увакъ дамгъалы гъайванлар сеники болажакъ», — десе — бары да гъайванлар увакъ дамгъалы болуп тува эди. «Сени гъагъынг ала-къула гъайванлар болажакъ», — десе — бары да тувағъан гъайванлар ала-къула бола эди. ⁹ Шолай Аллагы магъя сизин атагъызын сиривлерин берди.

¹⁰ Якъуб олагъа бурай деп узата:

— Бир керен гъайванлар атылтагъан заманда мен тюш гёрдюм. Тюшомде эчкителеге атылагъан бары эркечлер неде ала-къула, неде увакъ дамгъалы, неде ёлакъ экенни гёрдюм. ¹¹ Аллагъны малайиги магъя тюшомде: «Якъуб!» — деди. «Вай!» — деп жавап бердим. ¹² О магъя бурай деди: «Къара чы, бары да эчкителеге атылагъан эркечлер неде ала-къула, неде увакъ дамгъалы, неде ёлакъ. Сагъя Лабан этеген затланы Мен барын да гёрюп тураман. ¹³ Мен чи, Оъзюм салгъан сыйлы ташны уьстюне зайдун май да тёгюп, сен Магъя ант этген Бет-Элни Аллагыман. Туруп, шу элден гет, ватанынга къайт».

¹⁴ Рагыл ва Лия Якъубгъя бурай деп жавап берелер:

— Атабызын мал-мюлкүндөн яда варислигинден бизге тиеген гъеч зат бармы? ¹⁵ Атабыз бизин ят гёре. О бизин сатып, биз саялы алгъан бары да акъчаны харжлап токътады. ¹⁶ Шолай болгъан сонг, Аллагъ атабыздан алгъан бары да байлыкъ бизинки, бизин уланларыбызыныки болуп токътай. Шо саялы да сагъя Аллагъ айтагъан күйде эт.

¹⁷ Якъуб яшларын да, къатынларын да тюелеге миндирип, ¹⁸ бары да байлыгъын да жыйып, Месопотамияда оъзю ес болгъан бары да гъайванын да алып, Гъанангъя, атасы Исгъакъын ягъына багъып ёл чыгъя.

¹⁹ Лабан шо заман къой къыркъма гете. Рагыл буса оъзю булан атасыны сужда къылагъан уй аллагъларын да ала. ²⁰ Якъуб да арамлы Лабанны шолай алдата: огъар оъзю гетегенин айтмай къоя.

Лабан Якъубнү артындан тербене

²¹ О бары малын-мюлкүн де алып, Фират оъзенден чыгъып, Гилат тавлагъа багъып бара. ²² Учциончу гюн Лабангъя Якъуб гетгенни етишдирелир. ²³ Къардашларын да алып, Лабан Якъубнү артындан тербене. Етти гюндөн сонг Лабан Гилат тавларда ону артындан етише. ²⁴ Шо гече арамлы Лабангъя тюшөндө Аллагъ гёрюнүп:

— Вёре, бирдокъда Якъубгъя къоркъув берип къойма! — дей.

²⁵ Якъуб Гилат тавларда чатырларын да къуруп токътагъан болгъан. Лабан етишгенде, о къардашлары да булан Якъуб токътагъан ерни ювугъунда орунлаша. ²⁶ Лабан Якъубгъа булай дей:

– Сен не этесен? Сен чи мени алдатып токътадынг! Къызларымны давда къолгъа тюшген есирлер йимик алып къачып токътагъансан!

²⁷ Неге менден яшыртгъын, мени алдатып, магъя бир зат да айтмай гетдинг? Мен чи сени шат йырлар булан, тепни, къомузну тавушлары булан ёлгъа салар эдим. ²⁸ Сен буса къызларымны да, оланы яшларын да оьбюп савболлашма сама къоймадынг. Сен авлиялыкъ этдинг. ²⁹ Гъакимлигимден пайдаланып, шо затлар саялы мен сизге зарал этип болар эдим. Тек бу гече тюшомде атангны Аллагы гёрюнюп, магъя: «Вёре, бирдокъда Якъубгъа къоркъув берип къойма!» – деди. ³⁰ Мен сен гетгенингни билемен, неге тюгюл де атангны ожагъына къайтма сюйгенсендир. Амма мени уй аллагъларымны урлап не эте эдинг?

³¹ – Мени къоркъувум бар эди. Сен къызларынгны къайтарып алып къояр деп ойлаша эдим. ³² Тек сени уй аллагъларынг кимде буса да биревде табулуп къалса, шо адам сав къалмажакъ! Къардашларыбыз шағъатлар болсун: мени бары затыма къарап чыкъ, сеники болгъан бары затны ал! – деп жавап бере Якъуб Лабангъа. Якъуб буса уй аллагъланы Рагыл урлагъанны билмей болгъан.

³³ Лабан Якъубну, Лияны, эки де къаравашны чатырларын тюнтоп чыгъа, тек бир зат да тапмай. Сонг о Рагылни чатырына гире. ³⁴ Шо заман Рагыл уй аллагъланы алып, тюени ерини ичине салып, оъзю буса устьюнде олтурup къала. Атасы ону чатырын да тюнтоп чыгъа, тек бир зат да тапмай.

³⁵ Рагыл буса атасына:

– Оъзюнью алдында эретуруп болмайгъаным саялы, къазапланмасын мени бийим: къатынгишилеге хас болгъан кепсизлигим бар, – дей. Лабан бары да затны хотгъап чыгъа, тек уй аллагъланы тапмай.

³⁶ Шо заман Якъуб къазапланып йиберип, Лабанны бурай айыплама баштай:

– Сен мени артымдан тербенердей не айыбым бар, не жинаятчы иш этгенмен мен? ³⁷ Бары затымны хотгъап чыкъдынг – оъзюнгю не затынгны

тапдынг дагы? Мунда мени де, сени де къардашларыбызны алдында гёрсет. Экевибюзге де олар тёре гессинлер.³⁸ Мен сагыа йигирма йыл ишледим. Шо заманы ичинде не къойларынг, не эчкилеринг иссалмады. Сени сиривюнгдеги къойларынгны мен ашамадым.³⁹ Эгер гъайванны кыыр жан талап къойса, ону сагыа гелтирмей, гъагын тёлеп къоя эдим. Гюндюз болсун, гече болсун — гъеч тас болгъан затны менден талап эте эдинг.⁴⁰ Гюндюз яллав, гече сувукълукъ инжитип турду мени, амма мен кирпик къактмай турдум.⁴¹ Йигирма йыл турдум сени ягынгда. Къызларынг саялы сагыа он дёрт йыл, гъайван-мал саялы алты йыл ишледим, сен буса дайын сёйлешинген гъагынгны оылчевион алышдырып турдунг.⁴² Эгер мени булан атамны Аллагы — Ибрагымни Аллагы, Исгъакыны Къоркъуву болмагъан эди буса, сен мени гъеч бир затсыз ёлума салажакъ эдинг. Тек Аллаты мени язықтылыгымны, тёкген къыйынларымны гёрюп турға: бу гече Озю мени янымын тутду!

⁴³ Лабан Якъубгъя булай жавап береди:

— Булар чы мени къызларым, мени яшларымны яшлары, мени гъайван-малым. Шунда сен гёрген зат бары да менини. Къызларымны, оларны авлетлерин сакъламакъ учун мен не этип боламан дагы?⁴⁴ Гел, разилемшив бегетейик, сени де, мени де арабызда шагъатыбыз да болсун.

⁴⁵ Шо заман Якъуб уллу ташны сыйлы таш йимик эретургъузуп сала.

⁴⁶ О да къардашларына:

— Тащлар жыйыгызы, — дей. Олар ташлардан тёбе этип, ону ягында ашама гиришлер. ⁴⁷ Лабан шо тёбеге Егар-Сагъадута* деп, Якъуб буса Галаад** деп ат тағыа. ⁴⁸ Лабан:

— Шу тёбе бизин разилемшивибюзню шагъатыдыр, — дей. Шо саялы шо ерге Галаад деп айталаар. ⁴⁹ Дагы да Мицпа*** деп де айталаар, неге тюгүл Лабан булай деп де къоша:

* 31:47 *Егар-Сагъадута* — бу ат арамай тилде «шагъатланы тёбеси» демекдир.

** 31:47 *Галаад* — бу ат ягъуди тилдеги «шагъатланы тёбеси» демекдир.

*** 31:49 *Мицпа* — бу атны айтылыши ягъуди тилдеги «къарайгъан ер» деген сөзлени айтылышина ошашлы геле.

– Биз бир-бирибизден айрылған сонг, Раббибиз бизин тергеп турсун дагыы. ⁵⁰ Эгер сен мени кызыларыма зулму этсөнг яда олардан къайры башгъа къатынлар алсанг, бизин шагъатыбыз инсан тюгюл, Аллагъ экенинди эсингде сакъалап къой. ⁵¹ Бу ташлардан этилген тёбе, бу бизин арабызды гъя мен салгъан сыйлы таш – ⁵² булар арабыздың разилешивню шагъаттарыдыр. Сагъа зарал гелтиирмек хыял болан тёбени ари ягъына мен де чыкъмажакъман, магъя зарал гелтиирмек хыял болан тёбени, сыйлы ташны бери ягъына сен де чыкъма. ⁵³ Ибрагымни Аллагъы, Нагъорну Аллагъы бизге дуванын этсин дагыы.

Якъуб да атасы Исгъакъыны Къоркъуву болғъан Аллагъыны аты болан ант эте. ⁵⁴ Сонг Якъуб тавда къурбан союп, къардашларын ашгъа чакъыра. Ашап битип, олар тавда гече къалалар. ⁵⁵ Эртен болғъанда, Лабан къызыларын, оланы яшларын ойбюп, барын да шабагъатлап, уйоне къайта.

Якъуб Исавнұ къарышылама гъазирлик гөре

32 ¹Якъуб ёлун узата. Огъар Аллагъыны малайиклери ёлугъя. ²Оланы гёрюп, Якъуб:

– Бу Аллагъыны асгер къонушудур, – дей. Шо ерге о Магъанаим* деп ат тағыя.

³ Якъуб Сейир топурагъына, Эдом уылкеге ағъасы Исавнұ янына ча-вушларын йибере. ⁴ Огъар бурай сёзлени етишдирмекни тапшура:

– Мени бийиме, Исавгъя. Булай сени къулунг, Якъуб сёйлей: ят ерлерде, Лабанны ягъында мен гъали болғъунча яшап турдум. ⁵ Гъали мени оығузлерим, эшеклерим, къойларым, къул-къаравашым бар. Мен сагъа, мени бийиме, шу хабарны йибере туруп, сенден рагъму къаравуллайман.

⁶ Къайтып гелип, элчилер Якъубгъя:

– Биз сени ағъанг Исавнұ янына бардыкъ. Дёрт юз адам да алып, о сени къарышылама геле тура, – дей. ⁷ Якъубнұ уллу къоркъув ва гъалеклик къуршап ала. О адамларын, гъайван-малын, тюелерин эки къонушгъа бөле.

* ^{32:2} *Магъанаим* – бу ат ягъуди тилдеги «эки къонуш» демекдир.

⁸ – Эгер Исав бир къонушгъа чапгъын этип, барын да къырып битдирип къойса, бириси къонушдагъылар сама къачып къутулма болур, – деп ойлаша Якъуб.

⁹ Якъуб Аллагъдан бурай тилей:

– Гей атам Ибрахимни Аллагы, атам Исгъакъны Аллагы, магъа уюме, къардашларымны янына къайтма буйрукъ этген, магъа яхшылыкъ этежекге въяда этген Раббим. ¹⁰ Сен гъаман да магъа, Сени къулунга, гёрсетип тургъан гъакъ герти рагьмунга мен лайыкълы да тюгюлмен. Мен Ёрданны ари ягъына чыгъып гетегендө, къолумда биргине-бир таягъым тюгюл ёкъ эди, гъали буса малым-мюлкюм эки къонушгъа бёлүнген. ¹¹ Агъам Исавдан мени къутгъар дагы! Мен къоркъуп тураман: о гелип йиберип, бизин барыбызны да, къошуп къатынланы-яшланы да оылтурюп къояжак! ¹² Сен чи магъа яхшылыкъ этежегинге въяда этген эдинг. Сен магъа наслударым денгиздеги къайыр бюртюклени санавудай кёп болажакъ деп въяда этген эдинг!

¹³ Якъуб гече онда къала. О да сиривлеринден агъасы Исавгъа савгъат гысапда ¹⁴ эки юз эчки, йигирма эркеч, эки юз къой, йигирма ирк, ¹⁵ балалары да булангъы савулагъан отуз тюе, къыркъ сыйыр, он оыгюз, йигирма тиши ва он эркек эшек айыра. ¹⁶ Якъуб оланы гъар сиривню бир гъайдавчусу болагъан күйде къулларына тапшура ва олагъа:

– Алгъа багъып, сиривлени арасында мезгил къююп юрюгюз, – дей.

¹⁷ Биринчи гъайдавчусуна Якъуб бурай деп бувара:

– Агъам Исавгъа ёлукъъанда, о да сагъа: «Кимни къулусан? Къайда барасан? Кимни гъайванларын гъайдап барасан?» – деп сораса, ¹⁸ сен: «Булар къулунг Якъубну бийим Исавгъа савгъат этип йиберген гъайванлары. Оъзю Якъуб буса артда геле тура», – деп жавап берерсен.

¹⁹ Якъуб экинчи гъайдавчусуна да, уччюнчюсюне де, оъзгелерине де, Исав булан ёлукъъанда, шолай айтарсыз деп бувара ва:

²⁰ – «Къулунг Якъуб артда геле тура», – деп къошма унутмагъыз, – дей. Алды булан савгъатлар да йиберип, Якъуб шолай Исавну рагьмусун къазанма сюе. – Сонг биз оъзюн къаршылагъанда, балики, о мени яхши

къабул этер, — деп ойлаша Якъуб.²¹ Алды булан савгъатланы да йиберип, Якъуб къонушда гече къала.

Якъуб Бирев булан ябуша

²² Шо гечесинде Якъуб туруп, эки де къатынын, эки де къараваш къатынын, он бир де уланын да турғузуп, Яббокъ деген оъзенни юроп чыгъя. ²³ Оланы барын да ва оъзюнью бары да затын да оъзенни бириси ягъасына чыгъарып, ²⁴ оъзю янгыз къала. Шонда гелип ону булан Бирев ябушма башлай ва ону булан танг къатгъанча ябушуп тура. ²⁵ Якъубдан уyst гелип болмайгъанын гёрюп, О ону бутуну сом ерине бек уруп, янчып ийбере ва Якъубгъя:

— Йибер мени, танг къатды, — дей.

— Сен мени шабагъатлагъанча, йибермежекмен, — дей Якъуб.

²⁷ — Атынг кимдир сени? — деп сорай О.

— Якъуб, — деп жавап бере.

²⁸ Шо заман О:

— Энnidен сонг сени атынг Якъуб тюгюл, Исрайыл* болажакъ, неге тюгюл де сен Аллагъ булан да, адамлар булан да ябушуп туруп, уyst гелип турдунг, — дей.

²⁹ — Магъа сени атынгны айт! — деп тилей Якъуб.

Тек О:

— Мени атымны неге сорайсан? — деп жавап бере ва Якъубну шабагъаттай.

³⁰ Бу иш болгъан ерге Якъуб Пенуэл** деп ат тагъя, шо буса «Мунда мен Аллагъны бетге-бет гёрдюм ва сав къалдым» демек бола. ³¹ Якъуб Пенуэлден чыгъып гетегенде, гюн чыгъя. О бутуну сом ери саялы акъсакъ-

* 32:28 *Исрайыл* — бу атны айтылыши ягъуди тилдеги «ол Аллагъ булан ябуша» деген сёzlени айтылышина ошашлы геле.

** 32:30 *Пенуэл* — бу атны айтылыши ягъуди тилдеги «Аллагъны бети» деген сёzlени айтылышина ошашлы геле.

лай.³² (Шо саялы бугюнге ерли де Исрайылны наслулары бутну сом ерин ашамай, неге тюгюл де Якъуб булан Ябушгъан ону тап шо ерине, бутуна къарап, ургъан).

Якъуб Исавну къарышылай

33¹ Якъуб къарап, алдына дёрт юз адамы да булан Исав гелегенни гёре. О Лияны, Рагылни ва эки къаравашны гъарисин оъзлени авлетлери булан бирче пайлай.² Оланы о булагай эретургъузуп сала: алда яшлары да булан къаравашлар, оланы артында яшлары да булан Лия, олардан сонг буса Рагыл ва Юсуп.³ Оъзю Якъуб алгъя багыып чыгъя. Агъасына ювукълашгъанча, ону алдында етти керен ерге къаплана.

⁴ Тек Исав ону алдына чабып барып, ону къучакъылап, бавруна баса, оъбе, олар экевиу де йылап алалар.⁵ Исав къатынгишилени ва яшланы гёрюп:

- Булар сени кимлеринг бола? — деп сорай.
- Булар магъя, сени къулунга, Аллагъ Оъзюню рагымусу булан берген яшлар, — деп жавап бере Якъуб.

⁶ Къаравашлар яшлары да булан ювукъ гелип, Исавну алдында тобукъдан туруп, баш уралар.⁷ Сонг шо кюйде яшлары булан Лия ювукъ гелип, баш уралар, сонг Рагыл булан Юсуп баш уралар.

- Ёлда магъя ёлукъгъан не сиривлер эди? — деп сорай Исав.
- Олар булан сени рагымунгнү къазанмана умут эте эдим, бийим, — деп жавап бере Якъуб.

⁹ — Мени бар затым магъя бола, иним. Оъзюнгнү малынгны оъзюнгэ къой, — дей Исав.

¹⁰ — Ёкъ, рагыму эт, ярай буса, савгъатларымны ал! Сени булан гёрюшмек магъя рагымулу Аллагъ булан бетге-бет гёрюшмекге teng эди, сен бусанг магъя булагай рагымулусан!¹¹ Мени савгъатымны къабул эт. Аллагъ рагымусун гёrsетди, мени бары затым бар, — дей Якъуб. Якъуб Исавгъя кёп тилей, о да савгъатланы алма рази бола.

¹² — Ёлгъя тюшнейик. Мен сени булан гелемен, — дей Исав Якъубгъя.

¹³ Тек Якъуб булагай дей:

— Сен, бийим, яшлар нечик осал болагъанны билесен. Къойларым да, сыйырларым да буса савула, оланы чалт гъайдап турса, бир гюнден къырылып къалажакъ. ¹⁴ Сен, бийим, алдым булан бар, мен буса, сени къулунг, артынгдан аста булан, яшланы да, гъайванланы да юрюшүне гёре аста булан гелермен. Артынг булан, бийим, Сейирге етишермен.

¹⁵ — Сени булан мени адамларымны да къояйым, — дей Исаев.

— Негер тарыкъдыр? Сен, бийим, магъа артыкъ рагъмулусан, — дей Якъуб.

¹⁶ Шо гюн Исаев Сейирге ёл чыгъа. ¹⁷ Якъуб буса Суккот деген шагъаргъа багъып ёл чыгъа. Онда о озынен уй къура, гъайван-малына буса аранлар эте. (Шо саялы шо ерге Суккот* деп айтыла).

¹⁸ Месопотамиядан сапарын эсен-аман тамамлап, Якъуб Гъанандагъы Шегъем шагъаргъа етише ва ону къырыйында чатырларын къура. ¹⁹ Озын чатырларын къургъан ерни топурагъын о Шегъемин атасы Гъаморну уланларындан юз гюмюш акъчагъа ала. ²⁰ Шонда о къурбанлыкъыны сала-гъян ер къуруп, огъар Эл, Исрайылны Аллагы деп ат тагъя.

Дина учун Шегъемден оыч алыв

34 ¹ Якъубнұ Лиядан болғъан Дина деген къызы ерли къызланы ягъына деп бара. ² Шо элни гъакими гъивейли Гъаморну уланы Шегъем Динаны гёре, ону тутуп, гюч булан ону хорлай. ³ О Якъубнұ къызы Динаны сююп, ону ушатып къоя, арив сёзлер сёйлей. ⁴ Атасы Гъаморгъя:

— Шо къызыны магъа къатын этип ал, — дей.

⁵ Якъуб къызы Дина хорланғъаны биле. Шо вакътиде ону уланлары авлакъыда гъайван-мал сакъылап тура болғъанлар. Олар гелгинче, Якъуб бир зат да этмей тура. ⁶ Шегъемин атасы Гъамор Якъубнұ ятына сёйлеме деп геле. ⁷ Шо заман буса Якъубнұ уланлары болғъан ишни де англап, уюне

* 33:17 Суккот — бу ат ягъуди тилдеги «аранлар» демектир.

къайтып тура болгъанлар. Олар тазза къазапланып, оьчленип тура болгъанлар, неге тюгюл де Якъубну кызын хорламакъ – Исрайыл учун уллу биябурлукъ: шолай этме ярамас!

⁸ Гъамор булай дей:

– Уланым Шегъем сени кызынгны сююп къалгъан. Ону уланыма къатын этип беригиз! ⁹ Биз сизин булан къардаш боларбыз, сизин кызылары-гызыны бизинкилеге къатынлар этип берерсиз, бизин кызыларыбызыны сизинкилеге къатынлар этип аларсыз. ¹⁰ Бизин булан бирче яшап къалыгъыз, уылкебиз сизин алдыгъызда тура. Мунда да ерлешип, эркин кюйде айланып, топуракълагъа ес болуп боласыз.

¹¹ Шегъем оъзю буса Динаны атасына ва эркъардашларына булай дей:

– Рагъму этигиз, мен сизге не айтсағыз да бережекмен! ¹² Лап уллу къалымны, лап багъалы савгъатланы токъташдырыгъыз. Сиз айтгъан бары да затны бережекмен, тек сиз шо кызыны магъя къатын этип беригиз.

¹³ Шогъар Якъубну уланлары Шегъемге ва ону атасы Гъаморгъа гылла булан жавап бере, неге тюгюл де Шегъем оланы кызардашы Динаны хорлагъан.

¹⁴ – Биз шону этип болмайбыз. Кызардашыбызыны сюннет этилинмеген эргишиге бермек бизин учун биябурлукъ болажакъ. ¹⁵ Янгыз бир шарт булан, демек, эгер де сизин эргишилеригиз бизин йимик сюннет этилинсе, биз рази болажакъбыз. ¹⁶ Шо заман биз сизге кызыларыбызыны бережекбиз, оъзюбюз де сизин кызыларыгъызын алажакъбыз. Биз де сизин булан яшап, бир халкъ болуп къалажакъбыз. ¹⁷ Эгер де сиз бизге тынгламай, оъзюгүзге сюннет этдирмесегиз, кызыбызыны да алып гетебиз, – дей олар.

¹⁸ Гъамор да, Шегъем де салынгъан шо шартлагъа рази болалар. ¹⁹ Шегъем чалтлыкъда олар айтгъан затны кютме баштай, неге тюгюл де Якъубну кызын сюе болгъан. Шегъемни атасыны ожагъында инг де кёп абуру болгъан.

²⁰ Олар шагъарны къапуларына багъып барадар. Шо ерде шагъарны жыйынлары оыттериле болгъан. Гъамор ва Шегъем шагъарлылагъа булай дей:

²¹ – Бу адамлар парахатлыкъ булан гелген. Олар бизин топуракъда ерлешип, онда эркин кюйде айлансынлар. Олар учун да ерлеребиз нечакы

да бар. Оланы къызларын къатын этип биз де алайыкъ, олагъя бизин къызларбызыны да берейик.²² Тек олар бизин булан яшап, бир халкъ болуп къалма бир шарт булан рази бола: бизин бары да эргишилеребиз олар йимик сюннетленме гереклер.²³ Эгер оланы шо шартын күтсек, оланы сиривлери, мюлкю, гъайван-малы – бары да бизинки болуп къалажакъ, олар бизин булан бирче яшап къалажакъ!

²⁴ Шагъарлылар Гъамор ва Шегъем айтгъангъа рази болалар ва шагъарны бары да эргишилери сюннет этиле.²⁵ Учюнчю гюн буса, олар авруп туралганда, Якъубну Симон ва Левий деген уланлары – Динаны эркъардашлары, къылычлар да алыш, гъеч бир пуршавсуз шагъаргъа гирелер ва шагъардагы бары да эргишилени оылтурелер.²⁶ Гъаморну ва Шегъемни къылыч булан оылтурелер. Шегъемни уюнден Динаны да алыш гетелер.²⁷ Сонг къыргъын болгъан ерге гелип, Якъубну башгъа уланлары къызардаши хорлангъан шагъарда талавур юрютелер.²⁸ Олар къойланы, сыйырланы, эшеклени гъайдайлар, шагъарда ва авлакъда тапгъан бары да затын алалар.²⁹ Шагъарлыланы бары мал-матагъын алалар, оланы яшларын ва къатынларын есир этелер, оланы уйлериндеги бары да затын талайлар.

³⁰ Симонгъа ва Левийге Якъуб буладай дей:

– Сиз мени башымга балагъ гелтиридигиз! Ерли гъананлы, перисейли халкъланы магъя ойчло этдигиз. Бизин адамларбызы кёп тюгюл, олар буса бирлешип, мени де оылтурежеклер, бизин тухумубуз да дагылып къалажакъ!

³¹ Симон ва Левий оғъар:

– Къызардашыбызгъа къаягъба къызгъа йимик янашма ярамас! – деп жавап берелер.

Якъуб Бет-Элге къайта

35 ¹ Аллагъ Якъубгъя:

– Туруп, Бет-Элге бар ва шонда ерлешип токтта. Шонда агъант Исавдан къачагъан заманда сагъа Гёрюнген Аллагъгъа къурбанлыкъыны салагъан ер къур, – дей.

² Оъзюню ағыллюсюне ва бары да адамларына Якъуб булай дей:

— Сизде бар бары да ят аллагыланы лагъ этип тайдырып, тазаланыгызы, опуракъларыгызыны алышдырыгызыз. ³ Биз ондан чыгып, Бет-Элге барайыкт. Магъя къыйынлықъларда көмекге гелген, къайда барсам да, мени булан болуп турған Аллагыгъа онда мен къурбанлыкъыны салағъян ер къуражакъман.

⁴ Олар да оъзлерде бар бары да ят аллагыларын ва къулакъларындағы сырғъаларын Якъубгъа берелер. Якъуб шоланы барын да жыйып, Шегемни къырыйындагъы эмен терекни тюбюне гёмюп къоя. ⁵ Олар ёлгъя тюшелер. Оъзлени Аллагыны къоркъуву къуршагъян айланадағы шагъарларда яшайгъанлар Якъубну уланларын гызырлап турмайлар.

⁶ Адамлары да булан Якъуб Луза (гъалиги Бет-Эл) деген шагъаргъа етише. ⁷ Шонда къурбанлыкъыны салагъян ер къура. Шо ерге о Бет-Элни Аллагы деп ат тагъя, неге тюгюл де Якъуб агъасындан къачып барағъанда, шонда огъар Аллагы гёрюнген болгъан.

⁸ Ребеканы эмчек анасы Девора гечине ва ону Бет-Элни ювугъунда эмен терекни тюбюнде гёмелер. Шо саялы эмен терекге «Ваягъыны эмени» деп ат тагъалар.

⁹ Якъуб Месопотамиядан къайтгъан сонг, Аллагы огъар бирдагы керен гёрюнене, ону шабагъаттай туруп, ¹⁰ О:

— Сени атынг Якъуб, тек энnidен сонг сагъя Якъуб деп айтмажакълар. Гъалиден сонг сени атынг Исрайылдыр! — дей. Шолай О огъар Исрайыл деген атны бере. ¹¹ Аллагы огъар дагы да булай дей:

— Мен бары да затны Еси болгъан Аллагыман. Яшлар тапдырыгызы ва артып йиберигиз! Сенден халкъ амалгъа гележек, кёп халкълар топлана-жакъ! Сени наслуладынгдан чыкъынлар пачалар болажакълар! ¹² Ибрағымге, Исьякъгъа берген топуракъыны да Мен сагъя, сени наслуладынга бережекмэн. ¹³ Аллагы Якъубну ягъындан гете. ¹⁴ Якъуб онда Аллагы оъзю булан сёйлекен ерге сыйлы таш салып, шону уьстюне чагъыр ва зайдитун май тёге. ¹⁵ Шо ерге о Бет-Эл деп ат тагъя.

Рагылни оълюмю

¹⁶ Олар Бет-Элден чыгып, Эфратагъя етише турагъанда, Рагыл тултукъакъ тутуп аврума башлай. ¹⁷ Рагыл яш табып болмай, бек инжинип тұра. Шо заман энечи къатын оғъар:

— Къоркъма! Къара чы, сени бирдагы бир уланынг бар! — дей. ¹⁸ Ахырынчы тынышын ала туруп, оъле турагъан Рагыл уланына Бен-Ани* деп къоя. Тек атасы оғъар Бениямин** деп башгъа ат бере.

¹⁹ Рагыл шолай гечине. Ону Эфратагъя (гъали Байтлагъам деп айтыла-гъан) барагъан ёлну уьстюонде гёмелер. ²⁰ Якъуб ону къабуруну уьстюне сыйлы таш сала. Рагылни къабуруну уьстюндеги сыйлы таш шонда гъали де бар.

²¹ Исрайыл ёлун узата ва Мигътал-Эдер деген ерден сонг чатырларын къура. ²² Шонда токътагъан заманны ичинде Рубим атасыны къатынларыны бириси Валла булан ювукълукъ эте. Шо гъакъда атасы билип къоя.

Якъубну он эки уланы болгъан. ²³ Лияны уланлары булардыр: Рубим (биринчи уланы), Симон, Левий, Ягъуда, Иссағъар ва Завулун. ²⁴ Рагылни уланлары булардыр: Юсуп ва Бениямин. ²⁵ Рагылни къаравашы Валладан болгъан уланлары булардыр: Дан ва Непталим. ²⁶ Лияны къаравашы Зилпадан болгъан уланлары булардыр: Гат ва Ашир. Булар Якъубну Месопотамиядыа тувгъан уланларыдыр.

Исгъакъны оълюмю

²⁷ Якъуб атасы Исгъакъны ягъына Мамреге, Къыръят-Арбагъя (гъали шо ерге Гьеврон деп айтыла) геле. Шонда бир вакътилерде Ибрагым ва Исгъакъ яшай болгъанлар. ²⁸ Исгъакъ юзексен ийил яшай. ²⁹ О къарт болуп, яшавдан тазза тоюп, гечине ва ата-бабаларыны ягъына гёче. Атасын уланлары Исав ва Якъуб гёмелер.

* ^{35:18} *Бен-Ани* — бу ат ягъуди тилдеги «мени азап чегивлеримни уланы» демекдир.

** ^{35:18} *Бениямин* — бу ат ягъуди тилдеги «онг къөлнү уланы» демекдир.

Исавну наслулаты

36 ¹Муна Исавну (оъзюне Эдом деп де айтылагъан) ва ону наслулатыны гъакындагы хабар. ²Исав къатын этип гъаналы эки къызына: хетли Элонну къызы Аданы ва гъивейли Сивеонну къызыны къызы, Ананы къызы Агаливаманы. ³Олардан къайры да, Исмайылны къызы, Невайотну къызардашы Басематны да ала. ⁴Ададан Исавгъа Элипас туба, Басематдан Рагъуил, ⁵Агаливамадан Евш, Ялам ва Корагъ тувалар. Булар Исавну Гъананда тувгъан уланлары.

⁶Исав къатынларын, уланларын, къызларын, бары да оъзюню адамларын, бары гъайван-малын, Гъананда жыйгъан бары да малын-мюлкюн де алып, иниси Якъубну ягъындан тайып, башгъа ерге чыгъып гете. ⁷Неге тюгюл де, оланы малы-мюлкю шонча да кёп бола чы, гъатта олагъа бирче турма тарлыкъ этеген бола. Олар ерлешген топуракъ экевюне де, оланы сиривлерине, туварларына етишмейген бола. ⁸Оъзюне Эдом деп де айтылагъан Исав Сейир тавланы ягъында ерлеше.

⁹Муна Сейир тавланы ягъында ерлешген эдомлуланы ата-бабасы болгъан Исавну ва ону наслулатыны гъакындагы хабар. ¹⁰Исавну уланлары булардыр: Исавну Ададан болгъан уланы Элипас, Исавну Басематдан болгъан уланы Рагъуил. ¹¹Элипасны уланлары булардыр: Теман, Омар, Сепо, Гатам ва Кенас. ¹²Элипасны экинчи къатыны Тимна оғъар Амаликни таба. Булар Исавну Ададан болгъан наслулаты. ¹³Рагъуилни уланлары булардыр: Нагъат, Зерагъ, Шамма ва Мизза. Муна Исавну Басематдан болгъан наслулаты. ¹⁴Сивеонну къызыны къызы, Ананы къызы Агаливамадан Исавну Евш, Ялам ва Корагъ деген уланлары туба.

¹⁵Муна Исавну наслулатыны тухум-тайпасы. Исавну биринчи уланы Элипасдан бу тухумлагъа баш салгъянлар туба: Теман, Омар, Сепо, Кенас, ¹⁶Гатам ва Амалик. Булар Элипасдан болгъан тухумлар, Аданы наслулаты. Олар Эдом элде яшап туралар. ¹⁷Исавну уланы Рагъуилден бу тухумланы башчылары туба: Нагъат, Зерагъ, Шамма ва Мизза. Булар Рагъуилни тухумлары, Исавну Басематдан болгъан наслулаты. Олар Эдом элде

яшап туралар. ¹⁸ Исаңнұ Ағаливамадан бу тухумланы башчылары тува: Евуш, Ялам ва Корагъ. Булар Исаңнұ къатыны, Ананы къызы Ағаливамадын тухумлары. ¹⁹ Эдом деп де айтылагъан Исаңнұ наслулары ва олары тухумлары булайдыр.

²⁰ Шо элде инг башлап да яшагъан хорлу Сейирни уланлары булардыр: Лотан, Шобал, Сибон, Ана, ²¹ Дишон, Эсер ва Дишан. Булар Эдом уылкеде яшагъан Сейирни тухумлары.

²² Лотанны уланлары булардыр: Гьори ва Гъемам. Лотанны къызардашыны аты Тимна болгъан. ²³ Шобалны уланлары булардыр: Албан, Манағыят, Эбал, Шепи ва Анам. ²⁴ Сибонну уланлары булардыр: Айя ва Ана (Сибонну эшеклерин отлатагъанда, атасы данғылда булакъ тапгъан шо баягъы Ана). ²⁵ Ананы яшлары булардыр: Дишон ва Ананы къызы Ағаливама. ²⁶ Дишонну уланлары булардыр: Гъемдан, Эшбан, Итран ва Керан. ²⁷ Эсерни уланлары булардыр: Билгъан, Загъабан ва Акан. ²⁸ Дишанны уланлары булардыр: Уц ва Аран.

²⁹ Хорлу тухумланы башчылары булардыр: Лотан, Шобал, Сибон, Ана, ³⁰ Дишон, Эсер ва Дишан. Бу Сейир топурагъында яшагъан хорлу тухумланы санаву.

Эдомны пачалары

³¹ Исрайыллылардан пачалар арагъа чыгъып битгенче, Эдомда гъакимлик этген пачалар булардыр. ³² Башлап Эдомда Беорну уланы Бела пача бола. О Дингъава шагъарда яшагъан. ³³ Бела оылгенде, ону орнун Босра шагъардан чыкъгъан Зерагъын уланы Йобав тута. ³⁴ Йобав оылгенде, Теманны наслуларыны уылкесинден чыкъгъан Гъушам пача бола. ³⁵ Гъушам оылген сонг, Бедатны уланы Гъадат пача бола (моав топуракъда мидьянлылардан уист гелген Гъадат). О Авит шагъарда яшагъан. ³⁶ Гъадат оылген сонг, Масрекиден чыкъгъан Самла пача бола. ³⁷ Самла оылген сонг, оyzен ягъадагъы Регъабот шагъардан чыкъгъан Саул пача бола. ³⁸ Саул оылген сонг, Ағьборну уланы Баал-Гъанан пача бола. ³⁹ Ағьборну уланы Баал-Гъанан оылген сонг, Гъадар пача бола. О Пагъу

шагъарда яшагъан. Ону къатыны Мезагъавну къызыны къызы, Матреди къызы Мегьетабил болгъан.

⁴⁰Муна булайдыр Исаину тухумларыны башчылары, оланы ағылупери, юртлары ва атлары: Тимна, Алба, Етет, ⁴¹Агаливама, Эла, Пинон, ⁴²Кенас, Теман, Мибсар, ⁴³Магъдиел ва Ирам. Гъар тухум оъзюню аты къоюлгъан ерде яшай болгъан. Эдомлуланы ата-бабасы Исаидур.

Юсупну тюшлери

37 ¹Якъуб буса алда атасы яшап тургъан Гъанан топуракъда ерлеше.
²Муна Якъубну ва ону наслуларыны гъакъындагы хабар.

Юсупгъя он етти йыл бола болгъан. О оъзюню ағылары, Валланы ва Зилпаны уланлары булан бирче къойлар сакълап тура болгъан. Юсуп атасына оланы сёгүп сёйлеп тура болгъан. ³Якъуб Юсупну оъзге уланларындан артыкъ сюе болгъан, неге тюгюл ону бу уланы о къарт болгъанда тувгъан болгъан. Атасы оғъар ала гёлек де тикдирген болгъан. ⁴Атасы Юсупну оъзлерден кёп сюегенни гёргенде, ағылары, иниси Юсупну бирден-бир гёрюп ярамайгъан бола ва оғъар яхши сёйлеп де болмай.

⁵Бир керен Юсуп тюш гёре. О тюшюн ағыларына, инисине хабарла-гъанда, олар ону дагъыдан-дагъы гёрюп ярамайгъан бола. ⁶О булаг деп хабарлай:

— Тынглагъыз, тюшюмде магъя не гёрюнгенни айтайым! ⁷Биз будай тарлавда күлтелер байлап тура эдик. Мени күлтем тюппе-тиоз эретургъян эди, сизин күлтелеригиз буса ону аралап алып, мени күлтеме баш ийди!

⁸Ағылары, иниси оғъар:

— Не это, сен бизге пача да болуп, бизге гъакимлик этежекмен деп ойлашамысан дагъы? — дей. Тюшлери ва хабарлары саялы ону дагъыдан-дагъы бек гёрюп ярамайгъан болалар.

⁹Сонг Юсупгъа бирдагъы да тюш гёрюне, о шону да ағыларына, инисине хабарлай:

— Тюшюмде магъя гюн, ай, он бир юлдуз баш ийдилер!

¹⁰ Шо тюшюн о атасына ва агъаларына, инисине хабарлагъанда, атасы оғъар:

— Не тюшлердир сагъа гёрюнеген? Не эте, биз барыбыз да: мен, ананг, агъаларың, ининг — гелип ииберип, алдынгда тобукъдан туруп, сагъа баш уражакъбызы? — деп къайнашып ала. ¹¹ Агъалары, иниси Юсупгъа ачувланалар, атасы буса о айтгъан затны эсинде сакълап къоя.

Агъалары ва иниси Юсупнұ саталар

¹² Бир керен Юсупну агъалары, иниси атасыны сиривлерин отлатма Шегъемни ягъына багъып гетелер. ¹³ Исрайыл Юсупгъя:

— Агъаларың, ининг сиривлени Шегъемни ягъында сакълап туралар. Гел, мен сени де ийбереийим шонда, — дей.

— Мен гъап-гъазирмен, — деп жавап бере Юсуп.

¹⁴ — Бар. Оланы ишлери нечик экен, сиривлер нечик экен, къарап гел. Къайтгъанда, магъа хабарларсан, — дей атасы. Юсуп атасы булан да савболлашып, Гьеврон къолдан чыгъя.

Шегъемге гелгенде, ¹⁵ оғъар бир адам ёлугъя.

— Не излейсен? — деп сорай о адам авлакъдан гезеп айланагъан Юсупгъя.

¹⁶ — Мен агъаларымны, инимни излеймен. Олар сиривлерин къайда отлатагъанын айтсана, — дей Юсуп.

¹⁷ — Олар мундан гетди. Мен олар Дотангъа барабыз дейгенин эшигдим, — дей о Юсупгъя.

Юсуп агъаларыны, инисини артындан барып, оланы Дотанда таба.

¹⁸ Олар буса Юсупну ариденокъ гёрюп, о ювукълашып битгенче ону оылтурме сейлешелер.

¹⁹ — Муна бизин тюшгёрювчюбоз де геле тура. ²⁰ — Ону бир бош къуюгъя ташлап оылтурейик, кыры жанлар талады деп айтып къоярбыз. Шо заман къарапбыз ону тюшлери яшавгъа чыгъағъан кююне! — дей олар бир-бирине.

²¹ Рубим шону эшитип, Юсупну къутгъара.

— Не этебиз ону оылтюрюп. ²² — Къан тёкме негер тарыкъдыр? Оыз къолларыгъыз булан оылтюргюнче, ону дангылдагы шо бош къуюгъа ташлап къюгъуз, — дей Рубим. (Гъакъыкъатда буса о Юсупну къутгъапып, атасыны ягъына къайтарма сюе болгъан).

²³ Юсуп агъаларыны, иинисини ягъына етишгендокъ, олар ону ала гёленин юлкъуп чечелер, ²⁴ тутуп, ону къуюгъа ташлап къоялар. Шо къую бош болгъан; онда сув болмагъан.

²⁵ Агъа-инилер ашама деп олтургъандокъ, Гилатны ягъындан таба исмайыллыланы кериваны гелегенни гёрелер. Оланы тюелери атири ийисли сыламалар ва балгъамлар да алыш Мисриге бара болгъан. ²⁶ Ягъуда:

— Озыбюзню инибизни де оылтюрюп, ону оылгенин яшырсакъ, ондан бизге башгъа не пайда бар? ²⁷ Ону исмайыллылагъа сатсакъ къолай, къолларыбыз да таза болажакъ. Нечик де о инибиз чи, бизин къаныбыз бир чи, — дей. Агъа-инилер рази болалар. ²⁸ Мидьянлы савдюгерчилер ювукъ гелгенде, агъа-инилер Юсупну къуюдан чыгъаралар ва исмайыллылагъа йигирма гюмюш акъчагъа каталар, олар да ону Мисриге алыш гетелер.

²⁹ Рубим къуюгъа къайтып гелгенде, онда Юсуп ёкъын гёрюп, бек къыйналмақтылыкъадан уystюндеги опуракъларын йыртып пара-пара этип къоя.

³⁰ Инилерини ягъына къайтып, Рубим:

— Яш ёкъ чу! Мен энни не этип боламан? — дей.

³¹ Агъа-инилер Юсупну гёлегин алалар, эчки союп, гёлекни ону къанына батдырып къоялар. ³² Сонг гёлекни атасына гелтирип:

— Муна биз тапгъан зат! Къара чы, шу сени уланынгны гёлекими? — деп сорайлар.

³³ Гёлекге къарап, Якъуб:

— Уланымны гёлеки! Ону къыр жанлар талап къойгъан! Паралап къойгъан, паралап къойгъан Юсупнү! — деп къычырып йибере.

³⁴ Опуракъларын да йыртып, кирлер де гийип, Якъуб уланына арт-артындан кёп гюнлөр яс эте. ³⁵ Уланлары ва къызлары ону гёнгюн алмаюрюп туралар, амма Якъуб сабурлукъ этме болмай.

– Ёкъ! Уланыма яс этип туражакъман! Яс булан ахыраттъа гёчюп гете-жекмен – деп, о Юсупгъя этеген ясын узатып туралар.

³⁶ Мидьянлылар буса шо вакъти Юсупну Мисриге гелтирелер ва Мисрини пачасыны вазири, къаравулланы башчысы болгъян Потипаргъя каталар.

Ягъуда ва Тамар

38 ¹Шо заманларда Ягъуда агъя-инилерин де къюоп, Гыра деген адулламитли бир адамны янында яшай болгъян. ²Шонда о Шуа деген гъаналы бир гишини къызы булан таныш бола. Ягъуда ону къатын этип ала. ³О айлы бола ва улан таба. Ягъуда огъар Эр деп къоя. ⁴О дагы да айлы бола ва экинчи уланын таба. Огъар Онан деп къоя. ⁵Сонг бирдагы улан таба ва огъар Шела деп къоя. (Бу иш олар Кесивде яшайгъян вакътиде бола.)

⁶Ягъуда биринчи уланы Эрге къатын этип Тамар деген къызыны ала.

⁷Эр кёп яманлыкъ этгени саялы, Раббибиз огъар рази болмай ва ол оlyюп къалагъян күйню эте. ⁸Ягъуда Онангъя:

– Агъангдан къалгъян къатын булан яшап тур. Агъангны орнун тутуп, огъар наслу болдуарсан, – дей. ⁹Амма Онан Тамар тапгъян яшлар оъзюнүки саналмажагъын биле болгъян. Шо саялы да Тамар булан ювукъулукъ этегенде, агъасына яшлар болмасын деп, о урлугъун ерге тёгюп къоя болгъян. ¹⁰Раббибиз Онанны шолай этегенине рази болмай, шо саялы ол да оlyюп къалагъян күйню эте.

¹¹Ягъуда Тамаргъя:

– Уланым Шела оьсгенче, тул къатын болуп, барып атангны ожагъында яшап тур, – дей. (Шону о: «Уллуларыны арты булан гиччиси де сама оймесин!» – деп ойлашып айта). Тамар да атасыны ожагъына къайта.

¹²Арадан кёп заман гете. Шуаны къызы, Ягъуданы къатыны гечине. Яс битгенде, Ягъуда адулламитли Гыра къурдаши да булан къойларын къыркъма деп Тимна деген шагъаргъя ёл чыгъя. ¹³Тамар къайнатасы къойлар къыркъма Тимнагъя барагъанны эшите. ¹⁴О тул къатынлар гиеген опуракъларын да чечип, бетин шаршав булан яба ва чырмалып, Тимнагъя ба-

рагъан ёлда ерлешген Энаим шагъаргъа гиреген ерде олтуруп токтатай.
(О Шела оысгенни ва оғъар оызюн къатын этип алмайгъанны гёрюп туралы).

¹⁵ Тамаргъа къарап, Ягъуда о къагъба къатын деп тура, неге тюгюл де ону бетине шаршав ябылгъан болгъан. ¹⁶ О ёлну ягъасында олтургъан Тамарны ягъына гелип:

— Мен сени булан ятма сюемен, — дей. Ягъуда о оызюню гелини экени билмей болгъан чы дагъы.

— Мени булан ятсанг, магъа не бережексен? — деп сорай Тамар оғъар.

¹⁷ — Мен сагъа бир улакъ йибережекмен, — деп жавап бере Ягъуда.

— Шону йибергинче, юк гысапда бир зат къой, — дей о.

¹⁸ — Не юк сюесен? — деп сорай Ягъуда.

— Йипге тагылгъан мюгьюрюнгню де, къолунгдагы аса таягъынгны да, — деп жавап бере Тамар. Ягъуда о тилеген бары да затны берип, ону булан ювукъылукъ эте ва Тамар ондан айлы бола. ¹⁹ Сонг о туруп гете, бетиндеги шаршавун да тайдырып, къайтып оызюню тул къатынлар гиеген опуракъларын гие.

²⁰ Ягъуда улакъ да берип, адулламитли къурдашын юк гысапда къойгъан затларын алмакъ учун йибере. Нечакъы излесе де, о Тамарны табып болмай. ²¹ Шо ерли адамлардан о:

— Энаимге барагъан ёлда олтургъан къагъба къатын къайдадыр? — деп ахтара. Тек оғъар:

— Мунда бир къагъба къатын да ёкъ эди, — деп жавап берелер.

²² Ягъуданы ягъына къайтып, о:

— Мен ону тапмадым. Ерли адамлар онда бир къагъба къатын да ёкъ эди дедилер магъа, — дей.

²³ — Шо затлар онда къалып къалсын, адамлар уьстюбюзден кюлегенни сюймеймен. Мен оғъар деп улакъ берип йиберемен, сен бусанг ону табып да болмайсан! — дей Ягъуда оғъар.

²⁴ Уъч айлар гетип, Ягъудагъа:

— Сени гелининг Тамар къагъба къатындай гюнагъ иш этген ва гъали айлы, — дейлер.

— Алып ону отда яллатыгъыз, — деп буйрукъ эте Ягъуда.

²⁵ Амма Тамарны жазалама элтип барагъанда, о къайнатасына:

— Мен шу затланы есинден айлы болгъанман, — деп етишдиригиз деп тилем.

— Шу йипге тагъылгъан мюгъюрню де, аса таякъны да таныймысан? — деп сорай Тамар.

²⁶ Ягъуда таный ва булай дей:

— О менден эссе артыкъ мұыммин. Неге тюгюл де, мен оғъар уланым Шеланы бермедин. Ягъуда да ону булан дагыы ювукъулукъ этмей.

²⁷ Тамарны яш тапма заманы етише. Ону эгизлери болгъан экен. ²⁸ Яш тапма башлагъанда, кыргъя яшны къолу чыкъында, энечи къатын яшны къолуна къызыл йип байлап: «Бусу башлап чыкъыдь», — дей. ²⁹ Амма яш къолун къайтарып гийирип къоя ва ону эгиз ёлдашы чыгъя. «Сен нечик чыгъып болдунг?» — дей энечи къатын ва яшгъя Парес* деп къоя. ³⁰ Ону арты булан къолунда къызыл йиби булангъы бириси де чыгъя. Оғъар Зарағы** деп къоялар.

Юсуп ва Потипарны къатыны

39 ¹Юсупну Мисриге гелтирелер. Онда Мисрини пачасыны вазири, къаравулланы башчысы болгъан Потипар ону исмайыллылардан сатып ала. ² Раббибиз Юсуп булан болуп, ону бары ишлерин тюзелте. Юсуп еси Потипарны уюнде яшап турға. ³ Потипар Раббибиз Юсуп булан экенни англай, неге тюгюл Юсуп не этме урунса да, Раббибиз ону ишлерин тюзелтип турға. ⁴ Потипар Юсупгъа рази болгъан ва ону оъзюню къуллукъчусу эте. Сонг о Юсупгъа уюне гъакимлик этмекни тапшура ва оъзюню бары затына ихтиярны ону къолуна бере. ⁵ Шо вакътиден тутуп Юсупну яхшылыгындан Раббибиз Потипарны бары да затын: уюн де, авлагыын да шабагъаттай. ⁶ Потипар оъзюню бары да затына ихтиярны Юсупгъа тапшурған сонг, ону ашап-ичип турмакъдан дагыы къайгысы болмай.

* ^{38:29} *Парес* — бу ат ягъуди тилдеги «къутулмакъ», «сыпкырылмакъ» демекдир.

** ^{38:30} *Зарағы* — бу ат ягъуди тилдеги «къызыл» яда «ярыкъ» демекдир.

Юсупну бети де, бою-сою да исбайы болгъан.⁷ Потипарны къатыны оғыар гёз сала ва:

— Мени булан ят, — дей.⁸ Амма Юсуп ону сёзлерин гери уруп, оғыар:

— Есим оъзюю бары да затына ихтиярны магъя тапшургъан, оъзю буса уйдеги бир затны да гъайын этмей.⁹ Шу ожакъда мен ону булан teng ихтиярлы күйде башчылыкъ этемен. Сенден къайры, мени бары да затгъя ихтиярым бар, неге тюгюл сен ону къатынысан. Шолай уллу яман ишни, Аллагъын алдындағы шолай гюнағыны мен нечик этме боларман дагы? — дей.¹⁰ Гюн сайын Потипарны къатыны оғыар тилеп тура, амма Юсуп ону булан ятма рази болмай.

¹¹ Бир керен Юсуп оъзюю къуллугъун күтмек учун есини уюне гиргенде, уйде бирев де болмай.¹² Къатын ону опуракъларындан да тутуп:

— Мени булан ят, — деп дагыы да айта. Ону къолунда опуракъларын да къюоп, Юсуп уйден къачып чыгып гете.

¹³ Юсуп къачгъанны, ону опуракълары буса оъзюю къолунда къалгъанны гёрип,¹⁴ къатын къуллукъчуларын чакъыра ва олатыа булаи дей:

— Къарагызы чы, бу исрайыллыны мунда бизин хорламакъ учун гелтирген! Мунда да гелип, о магъя гюч булан ювукълукъ этме сюйген эди! Мен бусам гъяя салып къычырдым.¹⁵ О мен гъяя салып къычырагъанны гёрдю, опурагъын да къюоп, уйден къачып гетди!

¹⁶ Юсупну еси къайтып гелгинче, о ону опуракъларын ягында сакълап тура.¹⁷ Шо заман оғыар да шо затны айттып бере:

— Сен уюбюзге гелтирген шо исрайыллы къул мени хорлама сюйген эди!¹⁸ Мен гъяя салып къычырдым. О гъатта опурагъын да къюоп, уйден къачып гетди!

¹⁹ Къатынындан къулу шолай этме сюйгенни эшитгенде, Юсупну еси бек къазапланып йибере.²⁰ О Юсупну тутуп, пачаны туснакълары сакъланағын туснакътья ташлама буйрукъ бере. Шолай Юсуп туснакътья тюше.²¹ Тек Раббибиз ону булан бола ва оғыар рагымусун гёрсетип тура. Туснакъны башчысы Юсупну ушата.²² О туснакъдагылары барын да Юсупну къолуна бере. О бары да затгъя жаваплы бола.²³ Туснакъны башчысына буса

бир затны гъайын этмесе де ярайгъан бола, неге тюгюл Раббибиз Юсуп булан болуп, ону бары да ишлерин тюзелтип тура.

Юсуп туснакъланы тюшлерин чечип бере

40 ¹Шо агъвалатлардан сонг бираз заман ойтюп, пачаны чагырып тёгеген баш къуллукъчусу ва пачаны экмекчиси ойзлени еси болгъян Мисрини пачасыны алдында айыплы болалар. ²Пача ойзюню ювукъ къуллукъчулары болгъян чагырып тёгеген баш къуллукъчусуна ва баш экмекчисине къазаплана ³ва оланы къаравулланы башчысыны уюндеги туснакъга салма буйрукъ берсе. Юсуп тап шо туснакъда олтургъян болгъян. ⁴Къаравулланы башчысы Юсупну олагып къуллукъ этме сала. Арадан заман ойте.

⁵ Бир гече пачаны чагырып тёгеген баш къуллукъчусу ва баш экмекчиси тюшлер гёрелер. Оланы гъариси ойз, бир маънасы булангы тюшлер гёрелер. ⁶Эртен оланы ягына гелген Юсуп олар бир тамаша гъалекленип турагъанын гёре. ⁷Туснакъда ойзу булан бирче олтургъян пачаны къуллукъчуларына Юсуп:

— Не къыйыныгъыз бар? — деп сорай.

⁸ Олар Юсупгъя:

— Биз тюшлер гёрдюк, амма оланы чечме бирев де ёкъ.

— Тюш чечив Аллагъандыр. Хабарлагызы магъя тюшлери гизни, — дей Юсуп.

⁹ Чагырып тёгеген баш къуллукъчу булай деп хабарлай:

— Тюшүмде магъя алдында юзюм борла гёрюндю. ¹⁰Ону учь яш бутагъы бар эди. Олар ойсюп йиберди, чечекленип гетди, юзюм салкынлар гёрюндю, олар бишди. ¹¹Къолумда буса пачаны чагырып ичеген аягъы бар эди. Салкынлары узюп алдым, оланы сыкъым, аякъы да тёгюп, пачагъя бердим.

¹² Юсуп огъар булай дей:

— Сени тюшүнгю маънасы буладыр. Учь яш бутакъ учь гюндюр.

¹³ Учь гюн гетип, пача сени янгыдан гётөрежек. О сени алдагызы къуллугъунга къайтарып салажакъ, сен де алда йимик огъар чагырып ичеген аякъ береген болажакъсан. ¹⁴Сагъа бир тилевюм бар: ишлеринг яхшы болуп геттенде, мени де унутуп къоймассан, магъя рагымунгун гёрсет: мени гъакъымда пачагъя айтып, мени шундан къуттъараңсан! ¹⁵ Мени

исрайыллыланы топурагъындан урлап гелтиргенлер чи! Мен мунда туснакъға салардай бир зат да этмегенмен!

¹⁶ Баш экмекчи Юсуп тюшню яхши чечип бажарагъанын гёрюп, огъар булагай дей:

— Мен буса тюшюмде башымда учь четен бар деп гёрдюм. ¹⁷ Уьстдеги четенде пача учун бишген затлар бар эди. Четенни ичиндеги затланы күшлар чокъуй эдилер.

¹⁸ Юсуп огъар булагай дей:

— Муна сени тюшюнгню маънасы. Учь четен учь гюндюр. ¹⁹ Учь гюнетип, пача сени де гётережек: сени асмакъда асажакълар, күшлар да сени сюэгингни чокъуп туражакълар.

²⁰ Учь гюндөн сонг пачаны тувгъан гюню бола. О оъзюню вазирлери учун той эте. Пача чагыыр тёгеген баш күуллукъчусун ва баш экмекчисин туснакъдан гелтирице. ²¹ Чагыыр тёгеген баш күуллукъчусун оъзюню алдагъы ерине къайтарып сала ва о пачагъа аякъ береген бола. ²² Баш экмекчисин буса, Юсуп айтгъан күйде, асып оълтюре. ²³ Амма чагыыр тёгеген баш күуллукъчу Юсупну да, ону тилевион де унутуп къала.

Юсуп Мисрини пачасыны тюшлерин чечип бере

41 ¹Арадан эки йыл оътюп, пача булагай тюш гёре: о Нил оъзенни ягъасында токътагъан. ² Нилден етти арив, семиз сыйыр чыгъып геле. Олар оъзенни ягъасындагы къамушлукъда отлап тура. ³ Оланы арты булан Нилден дагъы да башгъа етти сыйыр чыгъып геле. Олар осал, арыкъ. Шо сыйырлар бирисилерини кырыйында токътай. ⁴ Бирден шо осал, арыкъ сыйырлар арив, семиз сыйырланы ашап къоялар! Пача уянып къала.

⁵ Янгыдан юхлагъанда, башгъа тюш гёре: бир саптакъда бёртюп толгъан етти будайбаш оъсе. ⁶ Олардан сонг топуракъдан, къургъакъ ел къуртугъан, осал етти будайбаш оъсе. ⁷ Шо осал будайбашлар бёртюп толгъан будайбашланы ашап къоялар. Пача уянып къала ва гёрген затлары тюш экенни английскай. ⁸ Эртен бек гъалекленип, о Мисрини ичиндеги бары палчыланы ва ойчуланы чакъыра, олагъа гёрген тюшлерин хабарлай. Тек ону тюшлерин бирев де чечип болмай.

⁹ Шо заман чагырып тёгеген баш къуллукъчу пачагъя булагай дей: «Бир вакътиги гюнагым эсиме тюшюп гетди! ¹⁰ Бир керен пача къулларына къазапланып, баш экмекчи де булан бирче мени къаравулланы башчысыны уюндеги туснакъыга салма буйрукъ берген эди. ¹¹ Бир гече бизин гъарибизге оъз маънасы булангты тюшлер гёрюндю. ¹² Бизин булан буса бир къуллукъчу, исрайыллы, къаравулланы башчысыны къулу бар эди. Биз огъар тюшлерибизни хабарладыкъ ва о бизге тюшлерибизни чечип берди. Гъарибизге тюшлерибизни маъналарын англатып берди. ¹³ О бизге айтгъян күйде болуп да чыкъды: мени алдагъы ериме къайтардылар, баш экмекчисин буса асып оылтюрдюлөр».

¹⁴ Пача Юсупну артындан йибере. Ону тезлик булан туснакъдан чыгъаралар, сакъалын-мыйыгъын, башын юлуп ва опуракъларын алыщдырып, пачаны алдына гелтирелер. ¹⁵ Пача огъар:

— Мен тюш гёрдюм, тек ону бирев де чечип болмай. Мен буса сен тюшню эшитгендокъ чечип бола деп англагъанман, — дей.

¹⁶ — Иш менде тюгюл, пачагъя яхши болагъян күйде Аллагъ чечип бөрежек, — деп жавап бере Юсуп.

¹⁷ Пача Юсупгъя булагай деп хабарлай:

— Нилни ягъасында токътагъанман деп тюш гёремен. ¹⁸ Нилден етти арив, семиз сыйыр чыгъып гелди. Олар оъзенни ягъасындағы къамушлукъда отлап турға эдилер. ¹⁹ Оланы арты булан Нилден дагы да башгъя етти сыйыр чыгъып гелди. Арыкъ, къатанкъы, осал, гёнюнден де, сюегинден де къайры заты ёкъ сыйырлар эди. Савлай Мисриде де гёргеменмендер мен шолай гёлемсиз сыйырланы. ²⁰ Шо арыкъ, гёлемсиз сыйырлар етти де семиз сыйырны ашап къойдулар. ²¹ Гъатта гёлемсиз сыйырлар семизлерин ашагъанда да, бирев де олар шону этди деп айтып болмас эди. Мен уянып къалдым. ²² Сонг мен бир башгъя тюш гёрдюм: бир саптакъда бёртюп толғъан етти будайбаш болду. ²³ Олардан сонг топуракъдан, къургъакъ ел къурутгъан, осал етти будайбаш оъсдю. ²⁴ Шо осал будайбашлар бёртюп толғъан будайбашланы ашап къойдулар. Мен тюшлериимни палчылагъя хабарладым,amma олар магъя бир зат да англатмадылар.

²⁵ Юсуп пачагъа бурай дей:

— О эки тюш тюгюл, бир тюш. Аллагъ пачагъа Оъзю этежек затланы билдирип турға. ²⁶ Етти яхшы сыйыр етти йылны англата, етти яхшы будайбаш да етти йылдыр. Шо шолай бир тюш. ²⁷ Оланы артындан чыкъыган арыкъ, гёлемсиз сыйырлар да, осал, къургъакъ ел къурутгъан етти будайбаш да етти йылдыр. Олар ачлыкъыны етти йылын англата.

²⁸ — Шо саялы мен пачагъа: «Аллагъ пачагъа Оъзю этежек затланы билдирип турға», — деп айтгъан эдим. ²⁹ Мисри топурагына берекетли етти йыл геле турға. ³⁰ Тек оланы арты булан ачлыкъыны етти йылы гележек. Ачлыкъ шонча да гючлю болажакъ чы, халкъ алдагъы бары да берекетни уннутуп да къалажакъ. Ачлыкъ уылкени дагытып къояжакъ. ³¹ Алдагъы берекетден бир зат да къалмажакъ. Шонча да гючлю ачлыкъ болажакъ. ³² Тюш пачагъа эки керен гёрюнгени Аллагъ къатты күйде токъташып битгенин, узакъ къалмай О бары да затны яшавгъа чыгъара-жагъын англата.

³³ — Гъали де пача англавлу ва гъакыллы адамны айырып, Мисриге ёл-башчылыкъ этме салсын. ³⁴ Пача бютон уылкеге тергевчюлени салсын. Олар гележек берекетли етти де йыл халкъыны къайтаргъан тюшюмюндөн беш пай этгенде бир пайын жыйысынлар. ³⁵ Олагъа будай жыйып, шагъарларда ону артгъа салып сакълама гъакимлик бер. ³⁶ Шо күйде уылкени Мисриде болажакъ ачлыкъыны етти де йылына жыйылгъан ашлыгъы да болуп, уылке ачлыкъдан ойлажек!

Юсупну бютон Мисрини гъакими эте

³⁷ Пача ва вазирлери Юсупну сёзлерин арив гёрелер.

³⁸ — Дагы бурай адамны тапма къыйын. Муну ичинде Аллагъыны ругбы бар! — дей пача ювукъларына. ³⁹ Сонг о Юсупгъа бурай дей:

— Аллагъ бу затланы барын да сагъа ачыкъ этгени сенден англавлу ва гъакыллы адам ёкъ экенни исбаттай. ⁴⁰ Бутюндөн тутуп сен мени бары да уюмие гъакимлик этежексен, халкъым да сагъа тынглажакъ. Сенден янгыз бир пача атым булан артыкъ болажакъман.

⁴¹ – Муна, мен сени бютюн Мисриге гъакимлик этме сала тураман! – дей пача Юсупгъя. ⁴² О мюгьюрю булангъы юзюгун чечип, Юсупну бармагына тагъя. О Юсупгъя инг юкъкъа кетенден этилген опуракълар гийдире ва бойнуна алтын шынжыр тагъя. ⁴³ О Юсупгъя началыкъдагъы экинчи адамны ат арбасын бере. Юсуп шо ат арбагъя минип барагъанда, ону алды булан: «Юсупгъя баш ийигиз», – деп кычыра болғанлар. Шолай пача Юсупну бютюн Мисрини гъакими эте.

⁴⁴ – Муна, мен, пача, буюра тураман. Бугюндөн сонг сенден ихтиярсыз бютюн Мисри топурагъында бирев де не къолун, не бутун шытырлатмажакъ! – дей о Юсупгъя. ⁴⁵ Пача Юсупгъя Сапнат-Панеагъ деп янгы ат къоя. Огъар Гелиопол шагъарны дин къуллукъчусу Потипарны къызы Аснатны къатын этип бере. Юсуп Мисриге гъакимлик этме башлай.

⁴⁶ Мисрини пачасына къуллукъ этме башлагъанда, Юсупгъя отуз йыл бола болғъан. Пачаны ягъындан гетип, Юсуп бютюн Мисри элни айланмакъ учун ёлгъа чыгъя. ⁴⁷ Берекетли етти йылны узагъында топуракъ мол тюшюм берип тур. ⁴⁸ Шо йылларда Мисриде жыйылгъан бары да ашлыкъны Юсуп шагъарлагъа пайлап бере. О гъар шагъаргъа къырынындағы авлакълардан къайтарылгъан ашлыкъны пайлап бере. ⁴⁹ О денгиздеги къайыр бюртюклени санавудай кёп ашлыкъ жыя, гъатта гысабын юротмейген де болуп къала, неге тюгюл оылчеп билип де болмай.

⁵⁰ Ач йыллар гелип битгенче, Гелиопол шагъарны дин къуллукъчусуну къызы Аснат Юсупгъя эки улан таба. ⁵¹ Биринчи уланына Юсуп Манассия* деп къоя. Шо ат «Аллагъ магъа бары къыйынлыкъларымны ва ата ожагъымны унутма къайду» деген затны англата болғъан. ⁵² Экинчи уланына буса Ефрем** деп къоя. Шо ат «Аллагъ мен азап чегеген топуракъда мени емиш береген этди» деген затны англата болғъан.

* ^{41:51} *Манассия* – бу атны айтылышы ягъуди тилдеги «унутмакъ» деген сёзню айтылышина ошаалы геле.

** ^{41:52} *Ефрем* – бу атны айтылышы ягъуди тилдеги «эки керен емиш береген» деген сёзлени айтылышына ошаалы геле.

⁵³ Мисрини берекетли етти йылы тамамлана. ⁵⁴ Юсуп да айтгъан кюйде, ачлыкъны етти йылы етишип геле. Шо ачлыкъ бары да эллеге яйыла, амма Мисриде буса ашлыкъ бола. ⁵⁵ Ачлыкъ гелип, мисрилилер пачадан аштилеме башлагъанда, пача: «Юсупнұ яғына барығыз, о не айтса, шону этип туругъуз», – дей. ⁵⁶ Савлай дюнья ачлыкъга тарый. Гъамарлана ачып, Юсуп мисрилиеге ашлыкъны сатма баштай, неге тюгюл Мисриде ачлыкъ баргъан сайын гючлю бола. ⁵⁷ Мисриге, Юсупнұ яғына, сатып ашлыкъ алмакъ учун хоншу уылкелерден де гелип туралар, неге тюгюл ачлыкъ бютюн дюньяны къуршап алгъан болгъан.

*Юсупнұ ағъалары
Мисриге ёл чыгъалар.*

42 ¹ Мисриде ашлыкъ барны эшитип, Яқъуб уланларына:
 – Бир-биригизге неге къарап токътагъансыз? ² Мисриде ашлыкъ бар дейлер. Барығыз шонда, ачдан оылмес учун сатып ашлыкъ алыш гелигиз, – деп де айтып, оланы узата.

³ Юсупнұ он да ағъасы Мисриге ашлыкъ алмакъ учун ёл чыгъалар. ⁴ Юсупнұ бир анадан тувгъан иниси Бенияминни буса Яқъуб, оғъар да бир балагъ гелип къалар деп къоркъуп, йибермей къоя. ⁵ Исрайылны уланлары башгъа халкълар булан Мисриге ашлыкъ алма гелелер, неге тюгюл ачлыкъ бютюн Гъанан топурагъын елеген болгъан.

⁶ Олар гелген уылкени гъакими буса Юсуп болгъан, ашлыкъны да о сата болгъан. Ағъалары ювукъ гелип, ону алдында тобукъдан туруп, баш уралар. ⁷ Юсуп оланы гөргендөкъ таный, тек оызюн ят адам йимик тутуп, олагъя:

– Къайдан гелгенсиз? – деп къатдырып сорай.

– Гъанандан гелгенбиз, ашлыкъ алма, – деп жавап берелер олар.

⁸ Юсуп ағъаларын таныса да, олар танымагъан чы дагыы ону! ⁹ Оланы гъакындары тюшлерин эсина алыш, Юсуп олагъя:

– Сиз тынчыларсыз. Бизин топуракъны осал ерлерин тергеп билме гелгенсиз, – дей.

¹⁰ – Ёкъ, бийибиз! Биз, сени къулларынг, ашлыкъ алма гелгенбиз.
¹¹ Биз агъа-инилербиз, бир атаны яшларбызы. Биз, сени къулларынг, тынчылар тюгюлбюз, намуслу адамларбызы! – деп жавап бере олар.

¹² – Тюгюл, сиз бизин топуракъны осал ерлерин билме гелгесиз, – дей Юсуп.

¹³ – Биз, сени къулларынг, он эки агъа-ини бар эдик. Биз барыбыз да Гъананда яшайгъан бир атадан тувгъан яшлар эдик. Гиччибиз гъали атабыз булан. Бирибиз буса ёкъ, – деп жавап берелер олар.

¹⁴ – Муна, мен айтдым чы. Сиз тынчыларсыз. ¹⁵ Тек сизин биз тергежекбиз. Пачаны яшаву булан ант эте тураман: гиччи инигиз гелмей туруп, сизин мундан чыкъма къоймажакълар. ¹⁶ Ону артындан арагъыздан биригизни йиберигиз, къалгъанларыгъызын буса къара-вуллар сакълап туражакълар. Шо заман къарапбызы, тюзмю экен сиз айтагъан хабарлар. Тюгюл буса, пачаны яшаву булан ант эте тураман: сиз тынчыларсыз! – дей Юсуп. ¹⁷ Юсуп оланы уьч гюнге туснакъыга сала.

¹⁸ Уьчюнчю гюн Юсуп олагъа:

– Мен айтагъан кюйде этсегиз, сиз сав къалажакъсыз, неге тюгюл мен Аллагъдан къоркъаман. ¹⁹ Эгер сиз гертилей де намуслу адамлар бусагъызы, биригиз туснакъда къалсын. Къалгъанларыгъызы буса, ач къалып турагъан ожакъларыгъызға барып ашлыкъ да етишдирип, ²⁰ гиччи инигизни де алып, мени ягъыма къайтыгъызы. Эгер сёзлеригиз тюз болуп чыкъса, сиз оймежексиз, – дей. Олар рази болалар.

²¹ – Бу бизге инибиз саялы гелип турагъан жазадыр! Инибиз чегип турагъан азапланы гёрsek де, о бизге нечакъы ялбарса да, огъар языкъсынмадыкъ. Муна, гъали бизин башыбызгъа да балагъ гелди! – дейлер олар бир-бирине.

²² Рубим олагъа булав дей:

– Мен сизге: «Яшгъа зарал этмегиз», – деп айтмагъан эдимми дагъы? Амма сиз тынгламадыгъызы. Гъали буса биз ону тёгюлген къаны учун жавапгъа тартылып турабыз.

²³ Агъа-инилер Юсуп оызлени лакъырын англап турагъанны билмейлер. Неге тюгюл де, Юсуп олар булан тилмачдан таба сёйлей болгъан. ²⁴ Юсуп буса бир якъыга да тайып, йылап ала. Сонг къайтып гелип, янгыдан олар булан сёйлей. Сонг о Симонну айырып, агъаларыны гёз алдында ону бай-лама буйрукъ берсе.

*Юсупну агъалары
Гъанангъа къайталар*

²⁵ Сонг къуллукъуларына агъаларыны къапларын ашлыкъдан толтурма ва оланы гъарисини къабына оызюню гюмюшюн къайтарып салма, оғтар къошуп ёлда ашама аш да салма буйрукъ берсе. ²⁶ Агъа-инилер ашлыкъны эшклеге де юклеп, уюне багъып ёл чыгъалар. ²⁷ Гече ял алма токтатында, оланы бириси эшкеге ем берме деп къабын ачып къарай. Къараса – гюмюшюн къапны башында салынып тур!

²⁸ – Гюмюшюн магъа къайтгъан! – дей о агъа-инилерине.

– Муна къапны уystюндө салынып тур!

Оланы къоркъуп жаны гете. Къоркъымакъылкъдан олар бир-бирине:

– Недир Аллагъа бизге этеген? – деп сорайлар.

²⁹ Гъанангъа, атасыны ягына къайтып, агъа-инилер оғъар оызлеге болгъан бары да затны хабарлайлар:

³⁰ – О уылкеде гъакимлик этеген адам бизин булан къатты күйде сёйледи, бизин тынчылар деп гысаплады. ³¹ Биз намуслу адамлар экенибизни, тынчылар тюгюлюбюзню, ³² бир атадан тувгъан он эки агъа-ини бар экенибизни, бир инибиз буса ёкылугъун, гиччибиз буса атабыз булан Гъананда экенни айтдыкъ. ³³ Амма о бизге булагай деди: «Мен сиз тюз айтгъаны-айтмагъанны тергеп къаарман. Биригизни мунда къюоп тураман, къалгъанларыгъыз буса ач къалып турагъан ожакъаларыгъызгъа ашлыкъ да етишдиригиз. ³⁴ Амма гиччи инигизни де алып, мени яныма къайтып гелигиз. Шо заман мен сиз тынчылар тюгюл, намуслу адамлар экенигизге инанаарман. Инигизни де йиберермен, сизге де топурагъыбызда эркин айланма ихтияр берермен».

³⁵ Олар къаплардагы затларын чыгъарма башлайлар. Гъарисини къа-бындан гюмюшо булангъы тююнү чыгъып геле. Шону гёргенде, атаны ва агъа-инилени уллу къоркъув къуршап ала. ³⁶ Якъуб олагъя:

— Мени сиз уланларымдан бирини артындан бирин магърюм этип ту-расызы. Юсуп ёкъ, Симон ёкъ. Энни Бенияминни де алыш гетме турасызы. Бары да балагълар мени башыма геле! — дей.

³⁷ Рубим атасына:

— Эгер мен Бенияминни къайтарып алыш гелмесем, мени эки уланым-ны оылтюрюп боласан. Огъар мен жаваплы болайым, мен ону къайтарып алыш гележекмен, — дей.

³⁸ — Ёкъ, уланым сизин булан гелмежек. Ону агъасы оылген, магъа бир-гине-бир Бениямин къалгъан. Эгер ёлда огъар бир зат болуп къалса, мен ону гётерип болмажакъман: сиз мени, башы ап-акъ болгъан къартны, къайгыгъя да батдырып, къабургъа гийирежексиз, — дей Якъуб.

Агъа-инилер Бениямин де булан Мисриге ёл чыгъалар

43 ¹Тек ачлыкъ бирден-бир гючленип тура. ²Мисриден гелтирген аш-лыкъ битген сонг, атасы уланларына:

— Дагы да бираң ашлыкъ гелтиригиз, — дей.

³ Ягъуда булагай жавап берө:

— О адам бизге гиччи инибизни гелтирмей туруп, оъзюню гёзюне де гё-рюнмесин деп къатты кюйде буварды. ⁴ Эгер де ону бизин булан йибер-сенг, сагъа ашлыкъ алма баражакъбыз. ⁵ Йибермесенг, биз бармажакъбыз. О адам гиччи инибизсиз оъзюню гёзюне де гёрюнмегиз деп буварды.

⁶ — Не эте эдигиз мени башыма бу балагъны гелтирип? Сизин дагы да инигиз барны айттып не эте эдигиз? — дей Исрайыл.

⁷ Олар булагай деп жавап берелер:

— О адам бизин гъакъыбызда, къардашларыбызны гъакъында кёп со-равлар берип турду. О атабыз савму деп, дагы да агъа-инилеригиз бармы деп сорады. Биз буса жавап берип турдукъ. О гиччи инибизни гелтир деп буйрукъ этер деп кимни эсине геле эди дагы?

⁸Ягъуда атасы Исрайилгъа булай дей:

— Йибер ону бизин булан, биз де гетейик. Шолай этсек, барыбыз да сав къаларбыз, ачлыкъдан биз де, сен оьзюнг де, бизин яшларыбыз да, бирибиз де оьлмесбиз. ⁹Мен оғвар жаваптыман, ону гъайын этме сёз де беремен. Эгер де мен ону сагъя къайтарып гелтирмесем, оълюп къалгъынча, сени алдынгда айыплы къалып туражакъман. ¹⁰Эгер де биз чалт айлангъан бусакъ, эки керен барып да гележек эдик!

¹¹Исрайыл булай дей:

— Олай болгъан сонг, мен айтагъанны этигиз. Бизин топуракъ не зат булан бай буса, къапларыгъызын шо затлардан толтуруп, о адамгъа элтигиз: балгъамдан, балдан, атир ийисли сыламалардан, къоздан, бадамдан. ¹²Къапларыгъызыгъа салгъанларын къайтармакъ учун, гюмюшню эки керен артыкъ алыгъыз; олар, балики, янгылыш болуп къалгъандыр. ¹³Бенияминни сизин булан алып, о адамны янына къайтып барыгъыз. ¹⁴Симонну да, Бенияминни де йиберсин деп, бары да затны Еси болгъан Аллагъ о адамны сизге бакъыган якъда рагъмулу этсин дагыы. Эгер де мен оланы оълюмюню къайгъысын гёрге тарыкъ бусам, шолай болуп къалсын дагыы.

¹⁵Агъа-инилер савгъатлар гъазир этелер, алдагы гезикден эсе бу гезик гюмюшню эки керен артыкъ этип алалар. Мисриге гелип, Юсупну алдында токттайлар. ¹⁶Олар булан Бениямин де барын гёргенде, Юсуп баш къуллукъусуна:

— Бу адамланы мени уюме элтип, нечакъы тарыкъ буса гъайван да союп, аш гъазирлеп тур. Бугун тиょш ашны олар мени булан ашажакъылар, — дей.

¹⁷Юсупну буйругъуна гёре, баш къуллукъчу оланы Юсупну уюне багъып алып юрой. ¹⁸Тек алыш барагъанда къоркъуп, агъа-инилер бир-бирине:

— Бизин шонда алда къапларыбыздан чыкъыган гюмюш саялы элтелер! Олар бизин устьюбюзеге чабып, тутуп, къул этежеклер, эшеклерибизни чыгъарып алажакъылар! — дейлер.

¹⁹Уйню посагъасына етишгенде, олар баш къуллукъчугъа булай дейлер:

²⁰— Ярай буса, айтма къой бизин, бийибиз! Биз мунда алда бир керен ашлыкъ алма гелген эдик. ²¹Къайтагъан ёлубузда буса, гече ял алма

ятгъанда, къапларыбызын ачгъан эдик. Гәрибизни къабыбызын башында ашлықъ учун берилген гюмюшлерибиз салынып табулду. Шо гюмюшню биз къайтарып да гелтиргенбиз. ²²Дагъы да ашлықъ алмакъ учун да гюмюш гелтиргенбиз. Шо гезик къапларыбызға гюмюшню ким салгъан-ны буса биз билмейбиз.

²³ – Параҳат болугъуз. Къоркъмагызы. Сизин къапларыгызға шо гюмюшню Аллагыгызы, атагызын Аллагы салды. Гюмюшюгюз шо заман магъа бары да етишген эди! – дей олагъа баш къуллукъчу. О агъа-инилени янына Симонну чыгъара.

²⁴ Сонг оланы барын да Юсупну уюне чакырып, аякъларын жувмакъ учун сув гелтире ва эшеклерине ем сала. ²⁵Агъа-инилер савгъатларын да онгарып, тюшге Юсупну къаравуллап токттайлар. Олагъа оъзлер тюш ашны мунда ашажагъы гъакъда айттылгъан болгъан. ²⁶Юсуп уюне къайтгъанда, оғыар гелтирген савгъатларын берелер ва ону алдында тобукъдан туруп, баш уралар. ²⁷Юсуп олагъа салам берип:

– Магъа оъзюню гъактында хабарлагъан атагызыны кюю нечикдир? Савму о? – деп сорай.

²⁸ – Сени къулунг болгъан атабыз сав-саламат, – деп жавап берелер агъа-инилер ва ону алдында бирдагы да тобукъдан туруп, баш уралар.

²⁹ Юсуп къарап оъз иниси Бенияминни гёрюп, булай дей:

– Буму сиз магъа айтгъан гиччи инигиз? Сагъа Аллагыны рагымусу болсун, балам! ³⁰Юрги инисине бакъгъан якъда сюовден толуп, Юсуп йылап йиберме аз къала. Тезлик булан башгъа уйге чыгъып, онда йылап ала.

³¹ Сонг жувунуп, къайтарып къонакъланы янына геле ва оъз-оъзюн къолгъа алып, аш салма буйрукъ бере. ³²Ашны Юсупгъа айры, къонакълагъа айры, мисрилилеге айры салалар, неге тюгюл мурдар болма сюймейли, мисрилилер исрайыллылар булан бирче ашамай болгъанлар. ³³Агъа-инилени Юсупну алдында гезик булан, уллусундан башлап, гиччине ерли олтурталар. Шогъар олар тамаша болуп, бир-бирине къарайлар. ³⁴Юсуп олагъа оъзюню тепсисинден ашлар йибере. Бенияминге буса

оъзгелеринден беш керен артыкъ бере. Олар Юсуп булан тойгъунча ашап-ичелер.

Юсупну тас болған гюмюш аягъы

44 ¹Юсуп баш къуллукъчусуна:

— Оланы къапларын, нечакъыны гётерип бола буса, шончакты ашалықъдан толтур. Гъарисини къабыны башына къайтарып оъзюню гюмюшон сал. ²Гиччисини къабына буса гюмюшю булан бирче мени гюмюш аягъымны да сал, — дей. Баш къуллукъчу Юсуп айтгъян күйде эте.

³Танг вакътиде къонакъланы эшеклери де булан ёлгъя салалар.

⁴Агъа-инилер шагъардан чыгъалар. Тек олар ариге гетип де битгинче, Юсуп баш къуллукъчусуна булай дей:

— Тез оланы артындан етиш! Етишгенде буса, булай деп айт: «Неге яхшылыкъга яманлыкъ этдигиз? ⁵Неге бийимни гюмюш аягъын урладыгъыз? О чу ону пал салагъан, ичеген аягъы. Намарт иш этгесиз сиз!»

⁶Баш къуллукъчу оланы артындан да етишип, оъзюне буюрулгъан затланы айта. ⁷Агъа-инилер булай жавап берелер:

— Бийибиз, шолай затланы сен неге айтасан? Биз, сени къулларынг, шо затны этип боларбызы дагы? ⁸Биз чи къапларыбыздан чыкъгъан гюмюшню де Гъанандан тутуп шунда ерли къайтарып гелтирген эдик! Биз сени бийингни гюмюшон яда алтынын урлап не этейик? ⁹Эгер де урлангъан зат бизин бирибизден чыгъып къалса, ону оълтюрюп къойсунлар, биз буса бийинге къуллар болуп къаларбыз.

¹⁰ — Яхшы, сиз айтагъан күйде болсун. Тек урлангъан зат кимден чыкъса, о къул болуп къалажакъ, оъзгелер буса парахат күйде гетежеклер, — деп жавап бере баш къуллукъчу.

¹¹Агъа-инилер алъасавлу күйде къапларын да ерге салып, оланы башларын чечелер. ¹²Баш къуллукъчу оланы уллусундан башлап гиччисине ерли барын да тюнтюп чыгъа. Аякъ Бенияминден табулуп къала. ¹³Къайгъырмакъыны гючлюлюгүндөн агъа-инилер опуракъларын йыртып пара-пара этелер ва эшеклерин янгыдан ерлеп, шагъаргъа къайталар.

¹⁴ Ягъуда агъа-инилери де булан гелгенде, Юсуп уйде болгъан. Олар Юсупну алдында тобукъдан туруп, баш уралар. ¹⁵ Юсуп буса олагъя:

— Сиз этген недир? Мени йимик адамланы пал салма пагымусу бола-
гъанны билмейми эдигиз дагъы? — дей.

¹⁶ — Не айтайыкъ биз бийибизге? Нечик жавап къайтарайыкъ? Айыбы-
бызыны нечик жувайыкъ? Бизин айыбызы Аллагыны алдында ачылып
къалды. Бугюндөн сонг биз барыбыз да — оъзунде аякъ табулгъан да, оъз-
гелер де — бийибизни къулларыбыздыр, — дей Ягъуда.

¹⁷ — Ёкъ. Мен шолай этмесмен! Аякъ кимден табулгъан буса, о мени
къулум болажакъ, сиз буса парахат атагызыны янына къайтыгъыз, — дей
Юсуп.

Ягъуда Бениямин учун ялbara

¹⁸ Шо заман Ягъуда Юсупну янына гелип, бурай дей:

Бийим, магъа, сени къулунга, сёйлеме ихтияр бер. Ачувланма магъа,
бийим! Сен чи оъзю пачадайсан! ¹⁹ Сен, бийибиз, бизге: «Атагызы да, да-
гъы агъа-инигиз де бармы?» — деп сорагъан эдинг. ²⁰ Биз сагъа атабыз сав,
тек къарт деп, ону дагъы да гиччи уланы бар деп жавап берген эдик. Бу
ону къарт чагында болгъан авлети. Анасындан тувгъан авлетлерден о
янгыз къалгъан, ону агъасы да оылген. Атабыз ону бек сюе. ²¹ Сен де бизге
гиччи инибизни гелтирмекни талап этген эдинг. ²² Биз сагъа, бизин бийи-
бизге, эгер о атасындан айрылса, ону атасы оълюп къалажагъын айтгъан
эдик. ²³ Тек сен бизге: «Гиччи инигизсиз дагъы гёзюме гёрюнмегиз», —
дединг.

²⁴ Биз уйге, сени къулунг болгъан атабызыны янына къайтгъанда, сени
сёзлерингни оғъар етиштирдик, бийим. ²⁵ Атабыз янгыдан бираз ашлыкъ
гелтиригиз дегенде буса, ²⁶ биз гиччи инибизсиз бармажагъыбызын, осуз
сені гёзюнге гёрюнме де ярамайгъын айтып бердик. ²⁷ Атабыз да бизге
бурай деди: «Къатыным магъа эки улан тапгъанны сиз де билесиз. ²⁸ Бири
гетди мени янымдан. Шексиз күйде, къыр жанлар ону паралап къой-
гъандыр, неге тюгюл де шондан берли мен ону гёргеменмен. ²⁹ Гъали

екинчисин де алып гете турасыз. Огъар да бир зат болуп къалса, мен ону гётерип болмажакъман: сиз мени, башы ап-акъ болгъан къартны, къайгъыгъа да батдырып, къабургъа гийирежексиз».

³⁰ Атабызын шонча бек сюеген уланын да къюоп, мен уйге къайтма боларманмы дагы? ³¹ Бизин булан о ёкыну гёргендокъ, атабыз ойлюп къалажакъ. Атабыз, сени къулунг, акъсакъаллы къарт, биз саялы къайгъыра туруп, ахыратгъа гёчежек! ³² Мен, сени къулунг, инибиз къайтажакъга атама ант этдим. Эгер ону уйге къайтарып гелтирмесем, атамны алдында айыплы къалып туражакъман. ³³ Шо саялы ону орнуна мунда мен, сени къулунг, къалайым! О буса агъалары булан къайтып гетсин. ³⁴ Атамны янына осуз мен нечик къайтып боларман? Мен атамны къайгъысын гёрме болмажакъман!

Юсуп оъзю ким экенин ачыкъ эте

45 ¹ Юсуп къуллукъуларыны арасында дагы чыдан болмай.

— Барыгъыз да чыгыгъызы! — деп къычыра Юсуп. Янындан бары да халкъ тайгъан сонг, Юсуп агъаларына, инисине оъзю ким экенин ачыкъ эте. ² Тек о шонча да гючлю йылай чы, гъатта мисрилилер эшитип, хабарны пачагъа етишдирелер.

— Мен Юсупман. Атабыз сав-саламатмы? — дей о агъа-инилерине. Олар буса, бир сёз де айтма болмай токътайлар, неге тюгюл бек къоркъалар. ⁴ — Ювукъ гелигиз, — дей Юсуп. Агъа-инилери ювукъ гелелер. Юсуп буладей:

— Мен Юсупман. Сиз Мисриге сатгъан инигизмен. ⁵ Тек къыйналмагъызы, гъёкюнмегиз шо ишигиз саялы. Мени мунда сизин къутгъармакъ учун Аллагъ йиберди. ⁶ Ачлыкъ узатылып турагъаны эки йыл болуп тура. Дагъы да беш йылны узагъында не сюрюв, не орув болмажакъ. ⁷ Ер юзүндө сизин гъайран күйде къутгъарсын, наслуларыгъыз сав къалсын учун, мени мунда сизден алда Аллагъ йиберди. ⁸ Тап шолай, сиз тюгюл, Аллагъ йиберди мени мунда. О мени пачаны маслагъатчысы, ону бары да затыны бийи, бютюн Мисри топуракъгъа гъаким этди.

⁹ Атамны ягына алғасағызыз, оғар бурай деп айтығызыз: «Сени уланынг Юсуп шулай деп айта: Аллагъ мени бютюн Мисриге гъаким этди. Тезлик булан мени ягыма етиш. ¹⁰ Сен уланларынг, уланларынгны яшлары булан, бары тыйван-малынг, бары малынг-матагынг булан мени ювугъумда, Го-шен топуракъда ерлешерсен. ¹¹ Шонда мен сени яшавунгну не сен, не сени ожагынг, не сени гъайван-малынг тарчыкъга тарымасдай онгарарман, не-ге тюгюл энниден сонг дагы да беш йыл ачлықъ болуп туражакъ».

¹² Юсуп бурай давам эте:

— Сиз де, иним Бениямин де сизин булан мен, инигиз, сёйлейгенни оyzююз гёрюп турасыз чы. ¹³ Атама Мисриде мени нечик абурум барны, шунда гёрген бары да затны гъакында хабарлагызыз. Тезлик булан ата-бызын мунда гелтиригиз.

¹⁴ О иниси Бенияминни къучакълап йылай. Ону къучакълап, Бениямин де йылай. ¹⁵ Сонг Юсуп йылай туруп, бары да ағыларын да къучакълай, ойбе. Сонг олар ону булан сёйлемеге гиришелер.

¹⁶ Юсупну ағылары, иниси гелген деген хабар пачагъа етише. Пача ва ону вазирлери сююнелер. ¹⁷ Пача Юсупға бурай дей:

— Ағыларынга, инингэ эшклерин де ерлеп, Гъанангъа барсын деп айт.

¹⁸ Атагызыны да, оyzлени ағылюлерин де гелтирсинар. Мен олагъя Мис-риде бар бары да тизив затны бережекмен. Бизин топуракъны берекетин-ден лezзет алсынлар! ¹⁹ Олагъя Мисриден яшлар, къатынлар учун ат арба-лар алсын деп айт. Олар оyzлар булан атасын да гелтирсинар. ²⁰ Олар он-да къалгъан мал-матагыны гъакында ойлашмасынлар. Мунда оланы Мисриде бар инг тизив затлары болажак!

²¹ Исрайылны уланлары шолай этме де этелер. Юсуп олагъя пача буюр-гъян күйде ат арбалар, ёлгъя азыкъ, ²² ва гъарисине янгы гийим бере. Бе-нияминге о уьч юз гюмюш акъча ва беш янгы гийим бере. ²³ О атасына, он эшекге де юклеп, Мисрини ныъматларындан йибере. Дагы да он эшекге юклеп, ёлгъя ашлыкъ, экмек ва башгъя азыкъ йибере. ²⁴ О ағыала-ры, иниси булан савболлаша туруп, бурай дей:

— Ёлда эришмегиз!

²⁵ Мисриден чыгып, олар атасыны янына Гъанангъа къайталар.

²⁶ – Юсуп сав. О гъали бютюн Мисриге гъакимлик этип туралар, – дей олар Якъубгъя. Якъубну юреги титиреп гете. О инанып битмей. ²⁷ Амма уланлары оғзар Юсупну сёзлерин айталарап. Озы гёзлери булан о Юсуп оъзун гелтирилген деп йиберген ат арбаланы гёре. Шо заман Исрайыл, ругъланып йиберип:

²⁸ – Яхшы, буса! Уланым Юсуп гъали де савму? Мен оылгюнче, барып ону булан гёрюшнейим, – дей.

Якъуб бютюн наслусу булан Мисриге ёл чыгъя

46 ¹ Бары мал-матагъын да жыйып, Исрайыл ёлгъя тюше. Бер-Шеба-гъя етишгенде, о атасы Иsgъакъын Аллагына къурбанлыкъ эте.

² Гече бир гъайран гёрюньюшде Аллагы ону:

– Якъуб, Якъуб! – дей чакъыра.

– Вай, – дей Исрайыл.

³ – Мен Аллагъман, сени атангны Аллагыман. Къоркъмай, Мисриге бар, онда Мен сенден таба бек уллу халкъны амалгъя гелтирежекмен.

⁴ Мисриге сени булан Мен Оъзюм гележекмен, шондан сени наслунгну Мен Оъзюм чыгъаражакъман. Юсуп озы къоллары булан сени гёзлерингни ябажакъ, – дей Аллагы.

⁵ Якъуб да Бер-Шебаны къюоп гете. Исрайылны уланлары Якъубну, яшланы ва къатынгишилени пача оъзлеге берген ат арбалар булан алып юрүйлер. ⁶ Олар гъайван-малын ва Гъананда жыйгъян бары мал-матагъын да алып барадар. Шолай Якъуб бютюн наслусу булан Мисриге гете. ⁷ О Мисриге оъзюню бютюн наслусун: уланларын, кызылларын, оланы уланларын-кызылларын – барын да гелтире.

⁸ Исрайылны Мисриге гёчген наслуларыны атлары булардыр. Якъуб ва ону уланлары. Якъубну биринчи уланы – Рубим. ⁹ Рубимни уланлары булардыр: Гъаногъ, Паллу, Гъесрон ва Карми. ¹⁰ Симонну уланлары булардыр: Эмуел, Ямин, Агъад, Ягъин, Согъар ва гъананлы къатынындан тувгъян уланы Саул. ¹¹ Левийни уланлары булардыр: Гершон, Кегъат ва

Мерари. ¹² Ягъуданы уланлары булардыр: Эр, Онан, Шела, Парес ва Зарагъ. Эр ва Онан Гъананда турагъанда гечинелер. Паресден буса Гъесрон ва Гъамул деген уланлар тува. ¹³ Иссагъарны уланлары булардыр: Тола, Пувва, Йов, Шимрон. ¹⁴ Завулунну уланлары булардыр: Серед, Элон, Ягъел. ¹⁵ Булар Якъубнұ Месопотамияда Лиядан тувгъан уланлары. Дағызы да Лиядан Дина деген къызы тувгъан. Уланлары-къызлары булан барысыны да санаву отуз уъч адам болгъан.

¹⁶ Гадны уланлары булардыр: Сипион, Гъагти, Шуни, Эсбон, Эри, Ароди, Арели. ¹⁷ Асири уланлары булардыр: Имна, Ишва, Ишви ва Берия. Оланы Серагъ деген къызардашы да болгъан. Берианы Гъевер ва Малкиел деген уланлары болгъан. ¹⁸ Булар Якъубнұ Зилпадан тувгъан наслуладыры. Барысыны да санаву он алты адам болгъан. Зилпа – Лабан къызы Лиягъа берген къуллукъчусу.

¹⁹ Якъубнұ Рагылден болгъан уланлары булардыр: Юсуп ва Бениамин. ²⁰ Мисриде Гелиопол шағъарны дин къуллукъчусу Потипарны къызы Аснат Юсупгъя Манассия ва Ефрем деген уланланы таба. ²¹ Бениаминни уланлары булардыр: Бела, Бегъер, Ашбел, Гера, Нааман, Эгъи, Рош, Муппим, Гүппим ва Ард. ²² Булар Якъубнұ Рагылден тувгъан наслуладыры. Барысыны да санаву он дёрге адам болгъан.

²³ Даннны Гъушим деген уланы болгъан. ²⁴ Непталимни уланлары булардыр: Ягъсел, Гуни, Есер ва Шиллем. ²⁵ Булар Якъубнұ Валладан тувгъан наслуладыры. Барысыны да санаву етти адам болгъан. Валла – Лабан къызы Рагылге берген къуллукъчусу.

²⁶ Якъуб булан Мисриге гелгенлени санаву (ону тувра наслуадын, гелиннерин санамағъанда) алтмыш алты адам болгъан. ²⁷ Ондан алда Мисриде Юсупдан эки улан тува. Якъубнұ Мисриге гетген наслуадында етмиши адам болгъан.

Юсупнұ ва Якъубнұ ёлугъеву

²⁸ Юсуп оyzлени Гошенде къаршыласын деп, Якъуб алды булан Ягъуданы ону ягъына йибере. Олар Гошенге етишгенде, ²⁹ ат арбасын да егип,

Юсуп атасы Исрайылны алдына багып онда тербене. Атасыны алдына да гелип, ону къучакъылап, о бир хыйлы йылап ала.

³⁰ — Гъали энни сени сав гёрген сонг, мен оылсем де къайымайман, — дей Исрайыл.

³¹ Агъаларына, иинисине ва атасыны ожагына Юсуп булай дей:

— Мен барып пачагъя ягыма Гъанандан агъаларым, иним, савлай атамны ожагы гелген деп айтажакъман. ³² Мен олар къойчулар, къойлар багъя деп, оызлер булан гъайван-малын, мал-матагын да гелтирген деп де айтажакъман. ³³ Сиз буса, сизге пача не иш юрютегенигизни сорагъанда: ³⁴ «Биз, сени къулларынг, яш чагыбызыдан берли ата-бабаларыбыз йимик къойчуларбыз», — деп жавап беригиз. Шолай этсегиз, сизин Гошен топуракъда къююп къояжакълар, неге тюгюл къойлар багъагъан бары да адамланы мисрилилер мурдар эте деп гъисаплайлар.

47 ¹ Пачаны ягына гелип, Юсуп огъар:

— Гъайваны-малы, мал-матагы да булан Гъанандан мени атам, агъаларым, иним гелген. Гъали олар Гошен топуракъда токътап туралар, — дей.

² Агъаларыны бешисин Юсуп пачаны алдына гелтире. ³ Пача олагъа:

— Не иш юрютесиз? — деп сорай.

— Биз, сени къулларынг, ата-бабаларыбыз йимик къойчуларбыз. ⁴ Биз бу элге бир гесекте яшама гелгенбиз, неге тюгюл Гъанангъя уллу ачлыкъ къопгъан, онда къойлар отлатма ерлер ёкъ. Бизге, сени къулларынга, Гошен элде ерлешме ихтияр бер, — дейлер олар.

⁵ Пача Юсупгъя булай дей:

— Сени ягынга атанг, агъаларынг, ининг гелген. ⁶ Бютюн Мисри сени алдынгда тура. Оланы бизин элибизни инг тизив ерлеринде ерлешдир. Булар Гошен топурагъында яшасын. Эгер сен оланы арасында къыйышывлу адамланы биле бусанг, оланы мени сиривлеримни сакълама сал.

⁷ Сонг Юсуп пачаны алдына атасы Якъубу гелтире. Якъуб пачаны ша-багъаттай. ⁸ Пача огъар:

— Сагъа нече йыл бола? — деп сорай.

⁹ — Мени бу дюньядагы яшавлукъ ёлума юз отуз йыл болуп тура. Шо кёп тюгюл, тек шо яшавлукъ ёлум кыйын йыллар эди. Мени ата-бабала-рым яшагъан йыллар булан тенглештиргенде, бу йыллар бир зат да тю-гюл, — деп жавап бере Якъуб. ¹⁰ Пачаны бирдагы керен шабагъатлап, Якъуб гете.

¹¹ Оъзюне пача айтгъан күйде, Юсуп атасын, агъаларын ва иинисин Мисрини инг тизив еринде, Рагъамасес вилаятында ерлещидре ва олагъа шондан топуракъ бере. ¹² Атасына, агъасына, иинисине ва савлай оъзюню ожагъына Юсуп оланы санавуна гёре ашлыкъ берип тура.

Мисридеги ачлыкъ

¹³ Бу ерлерде буса ашлыкъ къалмай — Мисриге ва Гъанангъа къопгъан ачлыкъ шонча да յочлю болгъан. ¹⁴ Ашлыкъны ерли халкъга сата туруп, Юсуп Мисри ва Гъанан топуракъларында бар бютюн гюмюшню пачаны хазнасына жыя. ¹⁵ Мисриде ва Гъананда бары да гюмюш битген сонг, мисрилилер Юсупгъа гелип:

— Бизге ашлыкъ бер! Сени гёз алдынгда ачдан оълюп къалайыкъмы? Бизин гюмюшюбюз битди, — дей.

¹⁶ — Гюмюшюгюз битди буса, гъайван-малыгъызын гелтиригиз, ашлыкъны гъайван-малгъа алышдырарман, — дей Юсуп. ¹⁷ Олар гъайван-малын гелтирелер. Юсуп да ашлыкъны атлагъа, къойлагъа, эчклигеге, сыйырлагъа ва эшеклеге алышдырма башлай. Ашлыкъны шо йыл Юсуп олагъа гъайван-малгъа алышдырып берип тура.

¹⁸ Артындагы йыл буса олар гелип буладай дей:

— Сенден яшырып не этайик, бийибиз, бизин бары да гюмюшюбюз де, гъайван-малыбыз да сагъа гёчдю. Сагъа берме къаркъарабыздан да, топурагъыбыздан да къайры бир затыбыз да къалмады. ¹⁹ Гертилей де, топурагъыбыз да булан бирче сени гёз алдынгда оълюп къалайыкъмы? Бизин де, бизин топурагъыбызын да ашлыкъга алышдырып ал. Топурагъыбыз да булан бирче биз пачаны къуллары болуп къалайыкъ. Тек биз ачыбыздан

оюлюп къалмасын учун, сен бизге урлукъ бер, топурагъыбыз да бошуна къалмасын.

²⁰ Шолай Юсуп пачагъя Мисридеги бары да топуракъланы сатып ала. Бары да мисрилилер авлакъыларын сатып бере, неге тюгюл ачлыкъ шолай гючлю болгъян чы. Пача бютюн топуракъгъа ес болуп токтатай. ²¹ Мисрини бары халкъын Юсуп пачаны къуллары эте. ²² Юсуп янгыз дин къуллукъчуланды топуракъларын сатып алмай, неге тюгюл дин къуллукъчулагъя пачадан пай тие болгъян, олар да шо пайындан амал эте болгъянлар. Шо саялы олар оъзлени топуракъларын сатмайлар.

²³ Юсуп мисрилилеге булай дей:

— Тынглагызы! Мен сизин авлакъларыгъызыны да, сизин оъзюгюзню де сатып алдым. Гъали урлукъ алыш, авлакълагъя чачыгъыз. ²⁴ Энниден сонг тюшюмюгюзню беш пайындан бир пайын пачагъя бережексиз. Къалгъан дёрт пайын буса урлукъгъа да, оъзюгюзге де — уьюгюздегилеге, яшларыгъызыгъа — ашама къояжакъсызы.

²⁵ — Сен бизин оълюмден къутгъардынг! Сен бизге рагьму этдинг, би-йибиз. Энниден сонг биз пачаны къулларыбыз, — деп жавап берелер мисрилилер.

²⁶ Юсуп токъташдыргъан къайда Мисриде буссагъат да юрюлюп туралы: пачагъя тюшюмню беш пайындан бир пайын берелер. Янгыз дин къуллукъчуланды топуракъларына пача ес тюгюл.

Якъубну тилевю

²⁷ Исрайыллылар Мисриде, Гошен топуракъда ерлешелер. Шонда олар топуракълагъя ес болалар ва шонда оланы яшлары туруп, артып тербейлер. ²⁸ Мисриде Якъуб он етти йыл яшай, савлай алгъанда буса юз къыркъетти йыл яшай.

²⁹ Оылме заманы етишгенде, Юсупну чакъырып, о булай дей:

— Магъя рагьму эт, бутума да тийип, тилевюмню күтежекге ант эт: мени Мисриде гёмюп къойма! ³⁰ Мен оылгенде, мени Мисриден алыш гетип, ата-бабаларымны къабурунда гём.

— Сен айтгъан кюйде этермен, — деп жавап бере Юсуп.

³¹— Ант эт, — дей Исрайыл. Юсуп ант эте. Тёшекде ятып турагъан Исрайыл башын ие.

Якъуб Манассияны ва Ефремни шабагъаттай

48 ¹Шо агвалилардан сонг бираз заман ойтуоп, атасы авругъанны эшитип, уланлары Манассияны ва Ефремни де алыш, Юсуп ону ягъына геле. ²Якъубгъа:

— Уланынг Юсуп геле тура, — дейлер. Гючюн-къуватын да жыйып, Якъуб ятгъан еринде олтура ³ва Юсупгъа булагай дей:

— Гъанан топурагъындагы Луз шағарда магъа бары да затны Еси болгъан Аллагъ гөрүндю. О мени шабагъаттай туруп: ⁴«Мен сағъа наслу бережекмен ва артдыражакъман, сенден таба хыйлы халкъланы амалгъа гелтирежекмен. Бу топуракъны сени наслуларынга даймликке есликге бережекмен», — деп айтды.

⁵Якъуб булагай давам эти:

— Мен Мисриге гелгинче, сени Ефрем, Манассия деген уланларынг түвдү. Гъали буса сени уланларынгны меники болажакъ. Олар Рубим, Симон булан бир teng болажакъ. ⁶Олардан сонг тувгъан уланларынг буса сеникидир, амма олар озлени варислик пайларын агъаларыны пайларындан таба алажакълар. ⁷Мен Месопотамиядан къайтагъанда, Гъанан топуракъда, Эфратаны ювугъунда Рагылим гечинди. Шонда, гъали Байтлагъам деп айтылагъан Эфратагъа барагъан ёлда, ону гёмме де гёмдюм.

⁸Юсупну уланларына къарап, Исрайыл:

— Булар кимлердир? — деп сорай.

⁹— Булар Аллагъ магъа Мисриде берген уланларым, — деп жавап бере Юсуп.

— Мени ювугъума гелтир, мен оланы шабагъатлайым, — дей Якъуб.

¹⁰Къартлыгъындан Исрайылны гөзлери бек осал гөре болгъан. Юсуп яшларын ону къырыйына гелтире. Исрайыл яшланы къучакъылап, оьбе.

¹¹О Юсупгъа булагай дей:

— Мен сени гёрермен деп умут да этмей эдим, амма Аллагыны яхшылығындан сени яшларынгны да гёрдюм.

¹² Исрайылны тобукъларында олтургъян яшланы да алып, Юсуп атасыны алдында тобукъдан туруп, баш ура. ¹³ Уланларын Исрайылны алдына гелтиргенде, Ефрем Юсупну онг ягында (Исрайылны буса сол ягында), Манассия буса сол ягында (Исрайылны онг ягында) болгъан. ¹⁴ Тек Исрайыл онг къолун гиччиси Ефремни башына сала, сол къолун буса уллусу Манассияны башына сала. Шоллукъда Исрайылны къоллары чатыраш салынп къала.

¹⁵ Исрайыл Юсупгъа булай дей:

— Озыню алдында аталарым Ибрагым, Иsgъакъ яшагъян
Аллагым бу яшланы шабагъатласын.

Гъар заман да, бугунге ерли де мени Къойчумдай болгъан
Аллагым,

¹⁶ бютюн яманлықълардан мени Къутгъаргъан Малайик бу
яшланы шабагъатласын.

Мени атым да, аталарыбыз Ибрагымни, Иsgъакъны атлары да
шо уланъяшлардан таба яшап къалсын.

Олагъа кёп наслулар болсун.

¹⁷ Атасы онг къолун Ефремге салгъанны гёрюп, Юсуп бу затгъа рази болмай, Манассияны башына салмакъ учун, атасыны къолун ала.

¹⁸ — О тюгюл, атам. Муна биринчи уланым, онг къолунгну ону башына сал, — дей Юсуп.

¹⁹ — Билемен, уланым. Манассиядан да уллу халкъ амалгъа гележек. Амма гиччиси Ефрем оyr чыгъажакъ, ону наслуларындан кёп халкълар амалгъа гележек, — дей Исрайыл.

²⁰ Шо гюн Исрайыл оланы булай шабагъаттай:

— Исрайыллылар бир-бирин сизин атларыгъыз булан
шабагъаттай туруп: «Аллагъ сени Ефремдей, Манассиядай
этсин дагъы», — деп айтажакълар.

Шолай Исрайыл Ефремни даражасын Манассиядан артыкъ эте.

²¹ Сонг Исрайыл Юсупгъя:

— Мен узакъ къалмай ойлажекмен. Тек Аллагы сизин булан болуп турражакъ, сизин аталарыгъызы топуракъларына къайтаражакъ. ²² Сагъа мен агъаларынгдан, инингден артыкъ затны беремен: Шегъем тавну беремен. Мен ону аморлулардан къылычымны, огъумну гючю булан алгъянман, — дей.

Якъуб уланларын шабагъаттай

49

¹ Якъуб уланларын да чакъырып, булай дей:

— Жыйылыгъыз, сизге гележекде не болажагъын айтып берейим.

² Жыйылып тынглагъыз, мени уланларым. Тынглагъыз атагъыз
Исрайылгъя!

³ Рубим, мени биринчи уланым, мени къуватым, эргишилик
къуватымны башлапгъы емиши, намусда, къудратда
барындан да ойредеги!

⁴ Амма сен ташгъын сувлардай къавгъалап айландынг, сен дагы
биринчи болмажакъсан. Атангны орунлугъуна гирип, мени
ятывумну биябур этдинг!

⁵ Симон, Левий — агъа-инилер, оланы къылычлары вагьшиликтин
савутудур!

⁶ Мен олар булан тилбир болмасман, оланы жыйыны булан
да гъеч аралыгъым болмас. Къазапланып, олар
адамланы оылтурдюлер, йыбанч учун да оыгюзлени
параладылар.

⁷ Налат болсун оланы шо вагьши ойчлююне де, шо къагърулу
къазапланывуна да! Оланы Якъубу уланларыны арасында
яйып къоярман, Исрайылны уланларыны арасында да
чачып къоярман!

⁸ Ягъуда, агъа-инилеринг сени макътар! Сени къолунг
душманланы елкелерине салынып тура. Агъа-инилеринг
сени алдынгда тобукъдан туруп, баш урап.

- ⁹ Сен яш арсланкъаплан йимиксен, Ягъуда, гъавдагы тюшюмюнгден къайтып гелесен, уланым. О эрекк арсланкъапландаи, тиши арсланкъапландаи тизден туруп токътагъан: ким турғузуп болур ону?
- ¹⁰ Ягъуданы къолундан пачаны таягъы тюшмес, гъакимликини таягъы ондадыр. Заман гелер, огъар абур этилер, кёп халкълар огъар бойсынар.
- ¹¹ Эшегин о юзюм борлагъя, къодугъун да инг тизив борлагъя байлар. Опуракъларын о чагъырда, гийимин де юзюмню къанында чаяр.
- ¹² Ону гёзлери чагъырдан да къара, тишлери сютден де акъ.
- ¹³ Завулун гемелер гелип токътайгъан денгиз ягъада яшар. Ону топурагъыны дазусу Сайданны ягъында.
- ¹⁴ Иссағъар юклени арасында ятып токътагъан къатты эшекдири.
- ¹⁵ О ял алагъян ери яхши экенни, бу топуракъ гёzel экенни гёргенде, аркъасын юкню тюбюне салып, къулдай загымат тёкме гиришежек.
- ¹⁶ Исрайлыйны бир къавумуна йимик Дан оъзюню халкъына гъакимлик этежек.
- ¹⁷ Дан ёлдагъы йылан, ёлдагъы агъулу йылан болажакъ. О атны аягъындан тигежек, атлы да ерге йыгъылып тюшежек.
- ¹⁸ Сенден къутгъарылыв къаравуллайман, Раббим!
- ¹⁹ Гадгъа талавурчулар чапгъын этежек, амма Гад оланы къувуп чангын чыгъаражакъ.
- ²⁰ Асири топурагъы яхши рyzкъыны, пачагъа лайыкълы рyzкъыны гелтирежек.
- ²¹ Непталым тизив балалар къозлайгъан эркинликдеги маралдыр.
- ²² Юсуп берекетли юзюм борладыр, булакъыны къырыйындагъы берекетли юзюм борладыр. Ону бутакълары тамгъа ябушуп оъсюп къалгъан.

- ²³ Окъчулар огъар чапгын этдилер. Олар огъар атышдылар, артындан тербендилер.
- ²⁴ Тек ону жаясы гъаман да къатты болуп турду, неге тюгюл де ону къолларындагы гюч Якъубну Къудратлы Аллагындан, Къойчудан, Исрайылны Ярындан амалгъа геле!
- ²⁵ Сени ата-бабаларынгны Аллагы сагъа кёмек этежек. Бары да затны Еси болгъан Аллагы сени бийик кёклени шабагъаты, терен айланманы шабагъаты, эмчеклени ва ана къарынны шабагъаты булан шабагъатлажакъ.
- ²⁶ Сизин атагызыны шабагъатлары бырынгы тавланы шабагъатларындан, эсги тёбелени чомартлыгындан артыкъдыр. Шо шабагъатлар Юсупну башыны уystюнде, агъа-инилени оyz арасында тангланғынаны башыны тёбесинде болсун дагы.
- ²⁷ Бениямин йыртгъыч бёрюдюр. Эртенлер гъавдан тюшгенин ашар, ахшамлар къалғынан пайлар.
- ²⁸ Муна Исрайылны он эки де къавуму ва атасы оланы гъарисине этген шабагъаты. Гъар къавумгъа о оyz шабагъатын эте.

Якъубну оълюмю

²⁹ Якъуб уланларына бурай дей:

— Узакъ къалмай мен атамны янына, ахыратгъа гёчежекмен. Ата-бабаларымны янында, хетли Эпронну авлагындағы анақъда гёмерсиз мени.

³⁰ Шо анақъ Гъанан топурагында, Мамрени ювугъундагы Магъпелни авлагында ерлешген. Авлакъыны гёмелеген ер этмек учун Ибрагым хетли Эпрондан сатып алғъан. ³¹ Шонда Ибрагым булан ону къатыны Сара, Истъакъ булан ону къатыны Ребека гёмюлгенлер. Шонда мен Лияны да гёмгенмен. ³² Авлакъ да, ондагъы анақъ да хетлилерден сатылып алынгъан.

³³ Якъуб уланларына шулай насиғыят да этип, тёшегинде ятып гечине ва ата-бабаларыны янына гёче.

50

¹Юсуп атасыны сюегине къапланып йылай, ону бетинден ойбюп тербей. ²Оъзюно эмчи къулларына о Исрайылны сюегин, дарманлап, чиримейген этмеге буйрукъ эте. ³Эмчилер тишили күйде кыркъ юнню ичинде, сюекни дарманлап, ону чиримейген эте. Мисрилилер оълюгө етмиш гюн яс этелер.

⁴Яс битген сонг, Юсуп пачаны вазирлерине булай деп тилей:

— Ярай буса, пачагъя айтыгъызы: ⁵оългенде оъзюн мен Гъанан элде алданокъ гъазирлеген къабурда гёмежекге атам магъя ант этдирди. Магъя барып атамны гёмюп гелмеге ихтияр берсин деп тилеймен, сонг буса къайтып гележеккмен.

⁶Пача да оғъар:

— Барып, атангны гёмюп гел. Берген антынгны кют, — деп, изну бере.

⁷Юсуп атасын гёмме барма чыгъя. Ону булан пачаны бары да вазирлери, баш къуллукъулары, Мисрини бары да тамазалары, ⁸Юсупну бары да уюндерилер, бары да агъалары, иниси ва атасыны уюндерилер ёлгъя тюше. Гошен топуракъда янгыз яшлар ва гъайван-мал къала. ⁹Ону арты булан ат арбалар ва атлы асгерлер юрой. Олар кёп болгъан.

¹⁰Ёрданны ари ягъындагъы Атаданы иннырына етгенде, олар уллу ва гючюло яс этелер. Юсупну атасына олар етти гюн яс этелер. ¹¹Атаданы иннырында этилеген ясны шо ерде яшайгъан гъананлылар гёрюп:

— Не гючюло йылай мисрилилер! — дейлер. Шо саялы Ёрданны ари ягъындагъы шо ерге Авел-Мисрайим* деп айтыла.

¹²Шолайлыкъда, уланлары атасыны буйругъун күтөлөр. ¹³Ону сюегин Гъанангъа гелтирип, бир заман хетли Эпрондан гёмелеген ер этмек учун Ибрагым сатып алгъян Мамрени ювугъундагъы Магъепелни авлагында гёмелер. ¹⁴Гёмюп битген сонг, Юсуп, ону агъалары, иниси ва булар булан гелгенлени барысы да Мисриге къайталар.

* ^{50:11} Авел-Мисрайим — бу ат ягъуди тилдеги «мисрилилени ясы» демекдир.

Юсуп ағыларына ва инисине рагъму эте

¹⁵ Атасы оылген сонг, Юсупну ағыларына ва инисине ой тюше ва олар:

— Балики, Юсупну бизге гвали де ачуву бардыр? Балики, оызюне этген затларыбыз саялы о бизден ойч алмагъя сюер? — дейлер.

¹⁶⁻¹⁷ Олар Юсупгъя булай айттып йиберелер:

— Оылгунче атабыз сагъа: «Тилеймен, ағыларынгны, инингни гюнагын, оланы айыбын, сагъа этген яманлыгын гечип къой», — деп айтартсыз деп наисигъат этген эди. Гечип къой чу бизден, сени атангны Аллагыны күулларыбыз чы! Бу сёзлеге тынглай туруп, Юсуп йылай.

¹⁸ Ағылары ва иниси, гелип ону алдында ерге къапланып ятып:

— Муна, биз сени күулларынгбыз! — дейлер.

¹⁹ Юсуп булай дей:

— Къоркъмагъыз! Мен Аллагымны дагы? ²⁰ Сиз магъя яманлыкъ этме сюйген эдигиз, Аллагыны къадарына гёре буса шо магъя яхшылыкъ болуп айланып къалды. Нечесе адам къутгъарылды шо саялы! ²¹ Къоркъмагъыз! Мен сизин, сизин яшларыгызын гъайын этежекмен. Юсуп шолай оланы рагъатландырып, гёнгюн алыш турла.

Юсупну оълюмю

²² Шолай Юсуп савлай атасыны тухуму да булан Мисриде ерлеше. О юз он йыл яшай. ²³ Юсуп Ефремни яшларыны яшларын да гёре. О Манасси-янны уланы Магъирни янгы тувгъян яшларын да къучагъына ала.

²⁴ Юсуп ағыларына, инисине булай дей: «Узакъ къалмай мен оълежекмен. Амма Аллагы гертилей де сизге көмек этежек. Сизин Ибрагымге, Истъакътья, Якъубгъя бережекмен деп ант этген топурагъына алыш гете-жек». ²⁵ Сонг Юсуп Исрайылны уланларын, Аллагы оызлени шо топуракъгъя алыш гетгенде, олар оызюню сюегин Мисриден алыш гетежекте ант этдире. ²⁶ Юсуп юз он йыллыкъ чагында гечине. Ону сюегин дарманлап, чиримейген этип, Мисриде бир къабургъя салалар.